


Hethadenee
waunauyaunee vadan
Luke Vanenāna



The Gospel According to Luke in the Arapaho Language of the
United States of America

Hethadenee waunauyaunee vadan Luke Vanenā^{na}
The Gospel According to Luke in the Arapaho Language of the United States of America

Public Domain

Language: Arapaho

Translation by: Michael White Hawk and John Roberts

2015-05-06

PDF generated using Haiola and XeLaTeX on 18 Apr 2025 from source files dated 31 Aug 2023
49903679-7190-57d9-b73a-1c2da4854577

Contents

Luke	1
----------------	---

Hethadenee waunauyaunee vadan Luke Vanenāna

¹ Hanau waunauthathee hadnedanuu hejadenenau hadjenanuu hauthase vavesee hauthedau hena hayauhuhau nanāe hājavaānethauwuthajauthaunin,

² Hasevenānauau nanaa hehethee jasesee vasesā hāenuu nau nejaanuu hanadedau-nau;

³ Hasethajaunau hethadee heee nananenau jea, vavesethaugudenau vahee hayauhuhau hehetheejasesee hadnewauthaunauwunathane nedānee, javaānethadee Theauthenus,

⁴ Hadeaenauwu hethauwuu hena hayauhuhau nesechauhauthehane.

⁵ Hena hese Herod, naja Judea, jasia vevethahehe Zacharias haseede, hadauchenanede Abia: nau henene hedaunāhene Aarauneau, nau heneseedaunin Elisabeth.

⁶ Nau haenesauuthāhenauau hathaāhenith Hejavaneauthu, thaunaugudethee vahee nanavaavedaunau nau hauchuwudaunau Vahadāde dejauthauwuvade.

⁷ Nau hehauwunesaunenauau, hanau henee hehauwunesaune Elisabeth; nau wauwu haenesauu vaehahenenauau.

⁸ Nau hethauwuu, henee daunausuvadanaude hathaāhenith Hejavaneauthu hāenauauchaude,

⁹ Nesedaunethe vevethahehehau, nesedaude hadnejaāde yehauthe hevadan-nauauwunene Vahadāhenith.

¹⁰ Nau haunauude henanedanede haevethahedaune jathee nauaichuu jaa.

¹¹ Nau haenauhauva hautheaune Vahadāde haetheaugune hejavese jaanaa.

¹² Nau hāenauhauwaude Zacharias, haejanethajau, nau nāthajaude haedasaa.

¹³ Hau nuu hautheaune, jevanāthajau hathāhuk, Zacharias: havevethahede nanedauwuhuu; nau hadasea Elisabeth hadjaneseewaude hāau, nau Jaun hadeseau.

¹⁴ Nau nananin hadaunauwuthajau nau hadeneethajau; nau hadnewauthathee neethajauthee hāejanesee.

¹⁵ Hanau haudvasāthaa hathaāhenith Vahadāhenith, nau haudnehauwuvane daudause dadajevenenaje, wauāthe neauthunaje; nau haudnechauchaunaude Hevadanauwauthauwunene Hejavaneauthu, haa hehethee hāejanesee.

¹⁶ Nau haudnewauthaa dāeyaunenede Israel hadjaechuwayūāaunaude hese Vahadāhenith Henesaunaunenau.

¹⁷ Nau haudnedauwaunaude nauguu Vadanauwauthauwu nau neesenaudāhenith Elias hadjaechuwayūāauau vadauhau henesaunaunenau hese dāeyaunauauau nau ne-jenedauvathee gaugauuthajaudenau hadauethadee; hadnesaanudede henanedanede hesanaa hese Vahadāhenith.

¹⁸ Nau Zacharias naudedusaene nuu? wauwu vanaehahenenau nau nadasea wauwu vadavehahenede, hathauhuk hautheaune.

¹⁹ Nau hautheaune hanaāauchuhananadethāde, Nananenau Gabriel henee theaugudaunauau hathaāhede Hejavaneauthu; nau janeauthavānau haudnāedauwunathana, nau hadnauhauthehathana nuu neethajaude waunauyauau.

²⁰ Nau, naune, nananin haudnejanadene nau haudnehauwuneeanade, haunaude hese nuu hayauhuhau nauauchaugu hethauwuu, hanau nananin daujethauwau-dauwu nadanadede, nuu hadnethauwunauaichuu nauauchaugaune.

²¹ Nau henanedanede haedauyauhauvanauau Zacharias, nau haegauguanadauwu henee dauguthetheaugude vadannauauwuu.

²² Nau hāejenauāhede, haejaneanadetha: nau haeenauwu daunauhauthāde vadan-nauauwuu: haevathasauwuna nau haejanade.

²³ Nau hethauwuu, henee, chauchaunu hese hāesevadanedaude haeyehau hesee nehayau hedauauwuu.

²⁴ Nau heee hena hese henene Elisabeth hanaāenesaunenith, nau haegauduse nehayau hayauthaunenethe hesese heee, hanaāenehede,

²⁵ Hesau Vahadāde naasehānau hese hāedaugauhauvānau hadgudanauwunānau nāedayāhede henaneda.

²⁶ Nau nanedauchaauwaude hesese hautheaun Gabriel haejeauthewau hehethee Hejavaneauthu hese hedan Gananee haseenaugu Nazareth,

²⁷ Hesāhedāeyaun haenenehauwaune henanin Joseph haenaneeseenith, hehethee hedauauwuu David; nau hesāhedāeyaun Mare haenaaseede.

²⁸ Nau hautheaun haedasaa, nau hanaāenehethāde, Haunauwuthajau, nananin vechauthane, Vahadāde hanedaunaunāne: hauwunaunane hesānaa.

²⁹ Nau hāenauhauwaude, haejanethajaude hedanadedauin, nau haegaugauanade daun hadnesenaunenechuhude nuu hadnesauau.

³⁰ Nau hautheaun, Jevanāthajau, hathāhuk, Mare: hanau nananin vechauthāne Hejavaneauthau.

³¹ Nau, naune, nananin hadnensesaunin, nau hadneahene, nau JESUS hadeseau.

³² Hadvasāthaa, nau Vāā Hejavaa hadethauva: nau Vahadāde Hejavaneauthau hadvenaude naja theaugudau henesaunaune David:

³³ Nau hadnajawaudauau hededanin Jacob jethauujenee; nau henajanede hadnehauwuthauvadauaune.

³⁴ Hanaāenehethaude Mare nuu hautheaune, Haddusenesau nuu hanau nāhauwāenaunau henane?

³⁵ Nau hautheaun hanaāauchuhananadethāde, Hejavaneauthau Hevadanauwauthauwu hadnedasāne: nau naunauthauau Hejavaa haddugaüyāaunāne; henaheee jea henee Naunaudāde hadnensesaunewaude Heau Hejavaneauthau hadnethade.

³⁶ Nau, naune, have Elisabeth, jea wauwu henesaunede hadneahede wauwu dauvadavehahenede: nau nuu nanedauchaunethe hesese wauwu hehauwunesaune neethade.

³⁷ Hanau Hejavaneauthau vahee nenedede hayauhuhau.

³⁸ Nau naune, Vahadāde daununānau hahagu Mare, hadnaasauau nuu hasenehene, nau hautheaun hanaāenauthāde.

³⁹ Nau Mare hanaāethauwauthede hena hese, nau hanaāehaude jauaudanenauauwuu nauhauhaunee hese hedan Juda;

⁴⁰ Nau hanaejedāde hedauauwunene Zacharias, nau haenaunenechautha Elisabeth.

⁴¹ Nau hethauwuu, henee, Elisabeth hāenedauwauthaude daunaunenechuhunith Mare, dāeyaunaa haenauauwuja hethauwaudauau; nau Elisabeth haechauchaunaude Vadanauwauthauwu:

⁴² Nau haevasanade, nau hanaāenehede, Hauwunaunane hesānaa, nau hauwunau-nade dāeyaunaa hethauwaudauau.

⁴³ Nau naudauhuthedasaa nuu, henee henaune Navahadāhewaunāde hadnedasānau?

⁴⁴ Hanau, naune, chauchaunu hanadedaunau haunaunenechauhude hāenedauwaudauwau naunaudaunuu, dāeyaunaa naunauauwujahede naunaudauau heee haunauwuthajaude.

⁴⁵ Nau hauwunaunade hesā henee hethauwuthajaude: hanau hena hayauhuhau hadnethauwunaasauau neethāedauwunade hehethee Vahadāhenith.

⁴⁶ Nau Mare hanaāenehede, Navadathuwu hauwaunehāde Vahadāhenith,

⁴⁷ Nau navadathuwu neethajaudaunaude Hejavaneauthu Nānayahāde.

⁴⁸ Hanau nedaugauhauwaude hadavenuhuhau hedaununaunau: hanau, naune, hewaunehaa heejasee vahee henaededaunau hauwunaunade hadnethanau.

⁴⁹ Hanau hena Naunaudāde vanasaunee hayauhuhau hasehānau; nau vadanaunee heneseede.

⁵⁰ Nau nauwunaunaude henee headaunādaunau henajāthee henaedede nau nausunee henaedede.

⁵¹ Nenauhauthethāde hedāahede hejadena; neneāsauaunaude hesāethajauhuhau hedāhene.

⁵² Nejananaude naunaudāhenethe hehethee hetheaugudaunene, nau nejejenanaude hadavenuhuhau.

⁵³ Negaudauhaude hasenahehau nauguu hethadene; nau nethauyādahehehau negudanaude jessaa.

⁵⁴ Nenedahewaude heau Israel, nedauyewuwude hedauwuyau;

⁵⁵ Neesenehethaude havasevāene, Abraham nau hedāeyaunewau jethaujenee.

⁵⁶ Nau Mare haenedauguva hanāenethe hesese heee, nau hanaāejaehaude nehayau hedauauwuu.

⁵⁷ Wauhā Elisabeth hanaāevadaudaude hadneejanēsāde; nau hanaāeahede.

⁵⁸ Nau henedaudevādaunau nau henethesaunau haenedauwauthaa hasauwunaunāde Vahadāhenith haenauhauthehaa vanasaunee hauwunaunadede, nau haenetheneethajauvaa.

⁵⁹ Nau hethauwuu, henee hāenasaudaichunesee haejenauusanauau hadgauguusenith dāeyaunauau; nau haedethanauau Zacharias, thauguu henesedaunin henesaunaune.

⁶⁰ Nau henaune hegau, hāheyaugaune, Jaun hadnethade,

⁶¹ Nau hathauhaugaunee hehauwuseenauau hādauānauau nuu neseede,

⁶² Nau haevathasauwunanauau henesaunaunin, haadeneseenethe.

⁶³ Nau haenaude dasewauthaunauha, nau haewauthaunauhā, Jaun haseede, hahagu. Nau haunauude haegaugauuthajaudene,

⁶⁴ Nau haegaunadenanauau, nau henethaune haegauchauunauaune, nau hanaāanadede, nau haevaveenethedauna Hejavaneathu.

⁶⁵ Nau nāthajau haeedasā haunauude henee hathāeouchaunauthee: nau vahee nuu nehedaunau haegaugauudedaune jedauwuu hathāauau jauaudanenauauwuu Judea.

⁶⁶ Nau yahee hathāenedauvade haejenanauwu hedahenauau, haudduthā naa dāeyaunaa, hahagaunee? Nau hejadenene Vahadānith haenedaundaunaa.

⁶⁷ Nau henesaunaune Zacharias haechauchaunaudene Vadanauwauthauwu, nau haeayānautheda,

⁶⁸ Vaveenethedaunaa Vahadāde Hejavaneauthau Israel; hanau haenauujāda nau daujauaudaunaudauau hedenanedanede,

⁶⁹ Nau thauwaudanaude henenese hadnenayauhānauau jedauwuu hedauauwunene hedaununaune David;

⁷⁰ Dau nausunadede hedenaa Hevadanaeyāhewau neenaedenethe hājeenaedenauau:

⁷¹ Henee hadnenanedanenauau hehethe haujauthavene, nau hehethee hejadena vahee hāthāasānavādaunene;

⁷² Hethauwuu hauwunaunadede nesayānāedauwunaude havasevāene, nau hadnedauyewuwude Hevadanenesedauwau;

⁷³ Deneauwauhude yese havasevāene Abraham,

⁷⁴ Henee hadvenānauau, jenāthajau hēhethee hejadenene haujauthavene hadnenayauhānauau hadnevevethedaunaunauau.

⁷⁵ Nauguu vadanaunee nau chuwwu hathāāhede, vahee hese hadenaededaunene.

⁷⁶ Nau nananin, dāeyaunaa, haeyāhe Hejavaa haudnethane: hanau nananin hadnedauwaudauwu Vahadāde hadnesaanudene hevaunaa;

⁷⁷ Hadvāde haeyaude hadnenanedanedaunee hededane hadjaegudanauwunaude hewauchudaunenenenau,

⁷⁸ Hehethee havathee hauwunaunadede Hāsaunaunene; nanaa Naugusaje hehethee hejavaa hadnenauujādaunānauau,

⁷⁹ Hadvenaude hesee hathāetheaugunethe hadauveeyaunee nau hadaudugauyāsaa gaujauaudahede, hadnedauwaudauau hauauthene hesee hadaudādayaunee.

⁸⁰ Nau dāeyaunaa haeeseau, nau hevadathuwu haedāeaune, nau haenaadaude hadaunechaudanee haunaude hesee hadneenauhauthethāde Israel.

2

¹ Nau hethauwuu hena hese hauchuwude haeneāsanau hehethee Caesar Augustus henee vahee henanedanede hadnayāadee.

² (Nau nuu nayāadede haenedauwunesede deauchuwunanenede Cyrenius Syria.)

³ Nau vahee haeauāchaudene hadnayāadee haunauude hanesāde hesee nehayau hededan.

⁴ Nau Joseph jea haeyehau hehethee Gananee, hehethee hedan Nazareth, jedauwuu Judea, jedauwuu hededan David Bethlehem neseee, (hanau naadahagu hedauauwunene nau nedānee David,)

⁵ Hadnethenayāade naguu Mareheau heauthehewauthādaune hadnewaune wauwu haehāthane heee henesaune.

⁶ Nau hethauwuu, henee hajesenausunanedauthee, hese haevadaunau hadnee-janesāde.

⁷ Nau hanaāejanesāde henedauwusaune heau, nau haeajetha, nau haeesevana hewauchuhauchave nedau vethehenethe; hanau haeneau vethehedaunauauwuu.

⁸ Nau hena vavade vedauauwuu haudānajauāhehauau haeaudenauau, haeaunaunehanaauau haeaunauyauhauvanauau hedajauanenau vegau.

⁹ Nau, wauhā, Vahadāde hedautheaune haedasā, nau havathee hae-seenausaunauau Vahadānith; nau haevasenāthajauau.

¹⁰ Nau hautheaun jevanāthajauau hathāhaugaunee: hanau, naune, nauuchau-daunathana hethadee waunauyauau havathee neethajaude, nanaa heee vahee henanedanede.

¹¹ Heee nananena janesee nuu desenee hededan David Henayauthāhe, nananede Chris Vahadāde.

¹² Nau nuu hadneaenauwuna; Nananena hadveehauna dāeyaunaa hanajehede, sae-see hewauchuhauchave nedauvethethee.

¹³ Nau nauhauhaunee hena haewauthanauau hejavaa hautheaunauau nauguu naa hautheau haevaveenethedaunanauau Hejavaneauthu, nau hasenehehaugaunee,

¹⁴ Havathee hauwaunede hesee Hejavaneauthu hejavaa, nau dasee vedauauwuu nanethauaunee, hethadee hathanavana henanedanede.

¹⁵ Nau hethauwuu, hautheaunauau haejaenauthā hesee hejavaa, Wauhā hadeehau-nau Bethlehem, hanathadagaunee nuu haudānajauāhehauau, nau nauhaudauwuu nuu hayewhu javeauau, nanaa Vahadāde hāēdauwunādaunene.

¹⁶ Nau haenauchuhanauusanauau, nau haeveehanauau Mare nau Joseph, nau dāeyaunauau haesaeseene hewauchuhauchauwauauwuu henee nedauvethethee hewauchuhauchāve.

¹⁷ Nau hāenauhauwauthee, haeneānauthedanauau nuu hathauthedaunāhethee heee dāeyaunauau.

¹⁸ Nau vahee hathāenedauvade haegauguanadauwu henee hayauhuhau nuu hathau-thedaunāthee haudānajauāhehau.

¹⁹ Nau Mare haeaunaunede vahee nuu hayauhuhau, nau haegauguanade hedahaa.

²⁰ Nau haudānajauāhehauau haejaesanauau, haevaveenethedaunanauau nau haevaveenethedaunanauau Hejavaneauthu heee vahee hanathadavuthee nau hathauhauthāthee, neethāedauwunāhethee.

²¹ Nau hāenasaudaunese hadneegauguusede dāeyaunaa heneseede Jesus, haseadagu nuu haseede haenaneeseāde hautheaunau haunauau deejethāsee.

²² Nau hesee hāewaudeauchaude hasaunee hedauchuwude Moses hāevadauaunee, haeyehauthanauau hesee Dadaunedan hadjenanauwunauthee Vahadāhenith;

²³ (Hathauthanauhunee hauchuwudaunaa Vahadāde, Dajee haunauahee henee nedauwusau vadade hadnethade hesee Vahadāhenith:)

²⁴ Nau hadnausāyauundenee neesenedaunee hauchuwudaunaa Vahadāde, Hanesethee vedāenauau, wauāthe hanesethee neauthuvedāesaunauau.

²⁵ Nau, naune, hena henane haenedau Dādaunedan, Simeon haenaneeseede; nau naa henane haechuvā nau haethauwuthajau, haeejauwuwude hadneneethajauthee Israel: nau Vadanauwauthauwu haethāsade.

²⁶ Nau haeeauthedaunaa Vadanauwauthauwu, henee hadjenauhaudauau gaujauaudahede, haunaude hadnauhauwaude Vahadāhenith Chris.

²⁷ Nau haeyeheenuusa Vadanauwauthauwu jedauwuu Vadannauauwuu: nau hāene henehā Hejavaeneauthusau jedanāde hadnesehāde thauguu hasauau hauchuwude,

²⁸ Hanaāejavethenauanaude hejadena, nau haevaveenethedauna Hejavaneauthu nau hanaāenehede,

²⁹ Vahadāhene, hewaunehaa nanehāejenanaude hauwauwaunave hadnaudauau nanethauaunee, hasauau hadanadede:

³⁰ Heee nasesā naunauhauwauau havāde Henayauthāhe,

³¹ Naa nananin hadnesaanudene hathaāhedaunee vahee henanedanede;

³² Hesee hadneesenee Hathāauau henanedanede, nau havathee hadnanedanede Israel.

³³ Nau Joseph nau henaune haegaugauanadauwu hena hayauhuhau hanasenehethavathe.

³⁴ Nau Simeon haeevethasa, nau haeeāedauwuna Mareheau henaune, Naune, Naa dāeyaunaa hanejeenanade hadneaunenauaudenenee nau hadneejaegauhadenenee hauwauhuu Israel; nau hanau nauhauthethau hadnevathevade;

³⁵ (Haa, gaugauchu hadneegauchuguhune nehayau havadathuvaa jea;) henee gaugauthajaudenau hauwauhuu vadauhau hadneauthasuu.

³⁶ Nau hena haenesā Anna, haeyāhe, hedaunau Phanuel, hanaadāde Aser: haewauthanenau hejajenewau, nau haenethenaedeva hechu nesaudauchu jajene hehethee neeseede;

³⁷ Nau haeevevesāne heee nasaudausauau yānenee jajene, nananede haeejethaunaude vadannauauwuu, hau haenesedauna Hejavaeneauthu nauguu naugauyaude nau vevethahede dajāee nau hesee.

³⁸ Nau haeejedā heee haevaveene jea Vahadāhenith, nau haeeauthedauna vahee nethāejauwuwudethee jauaudaunauthadede jedauwuu Dādaunedan.

³⁹ Nau hāesedauthee vahee hayauhuhau hasauau hauchuwude Vahadāde, haeejaesanauau hesee Gananee, hadahethee hedan Nazareth.

⁴⁰ Nau dāeyaunaa haeseau, nau haedāeaune hevadathuwu, haeechauchaunaude haeyaude: nau Hejavaneauthu vadaude haethāsade.

⁴¹ Nau wauhā henehā haeehaunenau hesee Dādaunedan hadauchuvejanenee vasevadanese Hadavechauthadede.

⁴² Nau denesenenee hejajenewau, haeehaunauau hesee Dādaunedan hanau nesedaundenee vasevadanese.

⁴³ Nau hese hāevadauaunee, hāejāesathee, dāeyaunaa Hejavaneauthusau haenasedaunaa Dādaunedan; nau Joseph nau henaune haajaenauwu.

⁴⁴ Hau henaneda haenehauvā hathanauwauhaugaunee, nau haejanaugudaunee; hanaāenaudehauthee henedauānene nau henedaehāhene.

⁴⁵ Nau hāejeveehauthee, haeejaesanauau hesee Dādaunedan, daunaudehauthee.

⁴⁶ Nau hethauwuu hāenasese hanaāeveehauthee jedauwuu vadannauauwuu, haetheaugune nahethāe hauthedahehau, haeejaathea, nau haenaunaudedauna.

⁴⁷ Nau vahee hathāenedauwauthāthee haegaugauanadauwu hedaeyaunene nau hedauchuhanehedaunene.

⁴⁸ Nau hāenauhauwauthee, haegaugauanavanauau: nau henaune, Nā, nau du hane-sehāane? hathāhuk, naune hāsaunau nau nananenau nenaudehane nejeneethajaunee.

⁴⁹ Nau hathauhuk, nau du haenaudehena? gauhajaene nauchāe wauwu hanedau-dauwau Nāsaunau henesethaude?

⁵⁰ Nau haejaenauwu hasenehethāthee.

⁵¹ Nau hanaāenethaunaude, nau haenauusanauau Nazareth, nau haeethauwaudaunā: hau henaune haeaunaunedene vahee nuu nehedaunau hedahaa.

⁵² Nau Hejavaneathusau haeneenaneane hedaeyau nau hajedāde nau vechau-thaude Hejavaneauthu nau henanedanede.

3

¹ Wauhā yauthaunenee jajene wauwu neenajanede Tiberius Caesar, Pontius Pinade nausunajawaudauau Judea, nau Herod nanajawaudauau Gananee, nau henauhauwauau Theneb nanajawaudauau Iturea nau vedauauwuu Trachonitis, nau Lysanias naja Abilene,

² Annas nau Caiaphas vevethahenajanauau, Hejavaneauthu nanadede haedasaa Jaun heau Zacharias nauaunee.

³ Nau haedade vahee vedauauwuu hanathaudanee Jordan, haeauthedaude dusaa-hede haudneaugauthuu gaugauuthajaudenau hadneegudanee wauchudaudenau;

⁴ Naathauthaunauhuu wauthaunauhanaa hedanadede Esaias haeyāhe, Jasaye haevasenehe nauaunee, Hesaanuu hathaāhede Vahadāhede, nesedee hevau chwuwuu.

⁵ Hadauchugauaudayauau hadnechauchaunaa, nau hadauchāe hauane nau jauau-dane hadjananee, nau jajāvāe hadchuvanee, nau hadauhauauyauau bau* hadneyauthauau;

⁶ Nau vahee henanedanede hadnauhaudauau Hejavaneauthu hedenayauthaunene.

⁷ Haenaāenehethaude waunauthanee henanedanede henee hedaedaunau haddusaunaude, Hau hedenaededaunenau seseyānauau, hanaa hāedauwunādaunenau haddaugauhudaunau nauthee hasenaunaude hadnauusanauau?

⁸ Hethadee nesedee hadeheanaunee hadnaugauthuu haugaugauuthajaudenenau jevaauthenehee hadahenauau, hāsaunaunene Abraham: hanau nāedauwunathana, Hejavaneauthau neene nesehaude nuu hauunaugānau Abraham hedāeyaunewau.

⁹ Nau wauhā jea hauunauchu janenanee hethājee hauhaudee: vahee hauhaudee jeneeaudehuk vevenaundenau haddauwauhude, nau hadneewaudedaunaunee.

¹⁰ Nau henanedanau haenaudedanaa, hauddusedaune? hathāhuk.

¹¹ Hanaāēdauwunaude, Daun nanesevechudaunade, jvena daun janevechudaunenith; nau daun hevethenede jenaasedaude, hahagu.

¹² Wauhā haenaāenuusathee hauāyāhehauau haddusaahethee, Hechauhauthethāhe hauddusedaune, hathāhuk,

¹³ Nau hathāhaugaunee, javaauthaunaundaunāthe henee nethautheavane.

¹⁴ Nau vanenanenau hanaasedaunethe, hanaasenehethāde, Nau haddusedaune, hathāhuk? Nau javaauthasenehaa henaneda, hathāhaugaunee, javaauthenandedaunevaa henaneda, nau hadnanethauaunahedava haunaudaunadenenau.

¹⁵ Nau henanedanau hathanavāhuk, nau vahee henanedanede haegaugauanavaa hedāhenenau Jaun wauau Chris haenane, nau wauāthe hajee;

¹⁶ Jaun hanaāaachuhanehethaude, hathauhuk vahee, Hadneedusaanathana hee naje; hau hanesāde javaānaudāde javaāhenau jaunaude hewauhugu hewauaunaa

* 3:5 "Bau" probably should be "vau" (meaning "way" or "road"), in line with the rest of the text, since the letter "b" appears nowhere else except in foreign names.

nāhauwuneaugunavane, hadneedusaanāna heee Hejavaneauthu Vadanauwauthauwu heee heseda.

¹⁷ Henaunasāhau nanewauunauau, nau hadgaunauhauau heyauthee nedauthauayāde, nau hadnauānauau wauchuunethauauhanau nedauthānauau jenayaunau; hau jenethauayaunau hadvadauchauauau hesedaa nedaujesaundaunahēe.

¹⁸ Nau waunauthanee hanasejāesaunee hayauhuhau hanathauthedaunaude henanedanau.

¹⁹ Hau Herod naja haeaunaunewau heee Herodias henauhauwauau Thenebeau henenene, nau vahee hathāewausaunee hanasedaude Herod,

²⁰ Haewauhaunene nuu vahee henee dauaugauhude Jauneau duguhunauauwu.

²¹ Wauhā hāevahesedusaahedaunee henanedanede, hethauwu henee Hejavaneauthusau haenethedusaā, nau haevevetha, hejavaa hanaāegaunanenee,

²² Nau Hejavaneauthuvadanauwauthauwu haejejanauhusane hedanayaunaa hedanayau haenaasaunee waude vedāene nau hanadede haejenauusa hehethee hejavaa, hasenehēhuk, Nananene vechauthauau Nāa, nananene vaveenethedaunathane.

²³ Nau Hejavaneauthusau nehayau wauwu wauau hanasauau jajeneva, hanane (hathanavade) heau Joseph, nananenith heau Heli,

²⁴ Nananenith heau Matthat, nananenith heau Levi, nananenith heau Melchi, nananenith heau Janna, nananenith heau Joseph,

²⁵ Nananenith heau Mattathias, nananenith heau Amos, nananenith heau Naum, nananenith heau Esli, nananenith heau Nagge,

²⁶ Nananenith heau Maath, nananenith heau Mattathias, nananenith heau Semei, nananenith heau Joseph, nananenith heau Juda,

²⁷ Nananenith heau Jonanna, nananenith heau Rhesa, nananenith heau Zorobabel, nananenith heau Salathiel, nananenith heau Neri,

²⁸ Nananenith heau Melchi, nananenith heau Addi, nananenith heau Cosam, nananenith heau Elmodam, nananenith heau Er,

²⁹ Nananenith heau Jose, nananenith heau Eliezer, nananenith heau Jorim, nananenith heau Matthat, nananenith heau Levi,

³⁰ Nananenith heau Simeon, nananenith heau Juda, nananenith heau Joseph, nananenith heau Jonan, nananenith heau Eliakim,

³¹ Nananenith heau Melea, nananenith heau Menan, nananenith heau Matthatha, nananenith heau Nathan, nananenith heau David,

³² Nananenith heau Jesse, nananenith heau Obed, nananenith heau Booz, nananenith heau Salmon, nananenith heau Naason,

³³ Nananenith heau Aminadab, nananenith heau Aram, nananenith heau Esrom, nananenith heau Phares, nananenith heau Juda,

³⁴ Nananenith heau Jacob, nananenith heau Isaac, nananenith heau Abraham, nananenith heau Thara, nananenith heau Nachor,

³⁵ Nananenith heau Saruch, nananenith heau Ragau, nananenith heau Phalec, nananenith heau Heber, nananenith heau Sala,

³⁶ Nananenith heau Cainan, nananenith heau Arphaxad, nananenith heau Sem, nananenith heau Noe, nananenith heau Lamech,

³⁷ Nananenith heau Mathusala, nananenith heau Enoch, nananenith heau Jared, nananenith heau Maleleel, nananenith heau Cainan,

³⁸ Nananenith heau Enos, nananenith heau Seth, nananenith heau Adam, nananenith heau Hejavaneauthau.

4

¹ Nau Hejavaneauthusau wauwu haechauchaunaude Vadanauwauthauwu haejeehedesa hehethee Jordan, nau haeyehauthaa Vadanauwauthauwu nauaunee,

² Yāyauau hese hananeedauchunese haenayāthehaa Haujaune, nau hena hesee hae-heevevethē: nau hāevathenese, haenaāsenade waunee.

³ Nau Haujaune hathāhuk, hith nananene Haāthauwuāvaa Hejavaneauthau hāedauwunene naa hauunauga hadejauaujaunenede.

⁴ Nau Hejavaneauthusau haeauchuhanehe hathauhuk, Wauthaunauhuu henane hehauwuunaede jauaujaunau jasaa, hau hee haunauude hedanadedauunene Hejavaneauthu.

⁵ Nau Haujaune haenauauhuchauhaa hauanee hadaujauudanene, nau haenauhau-thehaa vahee najanede hathāauauvaa henanedanede chauchaunu.

⁶ Nau vahee nuu najawaude hadvenathane, nau hauwaunede, hathāhuk Haujaun: hanau hene nananenau devenanau; nau daun navadaunenau hadevenauau.

⁷ Hith nananene henaheee hevevethedaunenagu, vahee hadnehanāhene.

⁸ Nau Hejavaneauthusaun hanaāauchuhananadethāde nau hathāhuk, Hedehau naugauvaa, Haujau haugau hathauthaunauhuu, Nananene hadevevethedaunaude Vahadāde Hāsaunau, nau hanesāde haudnevevethedaunaude.

⁹ Nau hanaāehauthāde Dādaunedan, nau haejenanaa naunauchuu vadannauauwuu, nau hith Haāthauwuāvaa Hejavaneauthau hauwujanauau hede hehethee, hathāhuk:

¹⁰ Haugau hathauthaunauhuu, Hadāedauwunaude hedauteaunau haddunānaune:

¹¹ Nau hejadenenau hadejedunānaune, havaaugugausene headaa dasee hau-naugāe.

¹² Nau Hejavaneauthusaun hanaāauchuhananadethāde nau hathāhuk, Hasenehee, Nananene jevanayāthehene Vahadāde Hāsaunau.

¹³ Nau hāevathenayāthedaude vahee, hanaāejathāde haujau najee,

¹⁴ Nau Hejavaneauthusau hanaāejaenaudāhede Vadanauwauthauwu haduu Gananee: nau hanaāauthedaunenede hanaāeneāsanaunee vahee hathāauau Gananee nauanee.

¹⁵ Nau haechauhauthēha vevethahenauauwuu, nau vahee haevaveeneha.

¹⁶ Nau haenauusa Nazareth, needaunauuchauhade: nau dajauaunee nesedaude haeyehau vevethahenauauwuu vadanese, nau haetheaugu dasauhaudauau wauthau-nauha.

¹⁷ Nau haevenau hewauthaunauhanene haeyāhew Esaias. Nau hāegaunanauau wauthaunauha, haevēde hadauwauthaunauhunee,

¹⁸ Vahadāde Hedauwauthauwu nanadeaunānau, hanau dehedusaanānau javeda hadnauthedaunu hethadene waunauyaunee hadavenuhethee: hanejevāde haudnenayahu naudauwuthajauthee, hadnauthedanau haudjaejenanathee wauwaunauau, nau hadnejanauhauthāthee nanenauguthee, haud-jaejenanathee* hasenethaunauau,

¹⁹ Haudnauthedaudauwau hethadee jaunaunauau jaje Vahadāde.

²⁰ Nau haeauavane wauthaunauha nau haejaevēna vevethahehew, nau hanaāejanaugude. Nau vasesā vahee hathāanedauthee vevethahenauauwuu haenāuhauvanauau.

²¹ Nau hanaāejasesenehethaude, nuu desene nuu hathauthaunauhuu hethauvaa haunaudaununenau.

²² Nau vahee haesegaugauudedauunene, nau haegaugauanadauwu hethadene hedanadedauunene hethāenehethaunene. Nau gaunuu jee heau Joseph? hahagaunee,

²³ Nau hanaāenehethaude, Nananena hadethauwunehesena nuu heeejegausudede, Naudaunehāhe, nehanenayauhade: hene nanāthadauwaunee nanāsedaunee Capernaum nanehasedaunee nechau hede nehayau havedauauwuvaa.

²⁴ Nau hathauhuk hethauwuu nehethathana, Hegau haeyāhe hehauwuvechauthau nehayau hevedauauwuvaa.

* **4:18** There is a midline hyphen in “haud-jaejenanathee” which doesn’t appear in same word earlier in the verse. There are no other midline hyphens in this text at all, and this hyphen is probably without significance.

²⁵ Hau hadauthedaunathava hethauwuu, waunauthathee henevesānauau neanedauthee Israel, hese deanedaude Elias, hejavaa denausunaugauhuu nasau jajene nau nedaudachu hesese, devasauau hasenaude denanadesanauau vedauauwuu;

²⁶ Hau hehauwunesāhene hejevādaunene Elias, vavade Sarepta, hedan Sidon, hesā nananede henevesā.

²⁷ Nau newauthathee naugaugauwuhuhauau neanedauthee Israel deanedaude Eliseus haeyāhe; nau hehauwunesā henayauhade vavade Naaman Syrian.

²⁸ Nau vahee hathāetheauguthee vevethahenauauwuu, hāenedauwauduu nuu hayauhuhau, haechauchaunaudenenau hasenaunaude,

²⁹ Nau haegauhānauau, nau haenunanat heguthanauau hedan, nau haehauthanauau hauchauguu jauaudanee haduunee hededanenu needaunesehene neaudnedauauwuguthauthee hauthedaunaānee.

³⁰ Hau haejavechautha hehethee nahethāe, haejathāau,

³¹ Nau haenauusa Capernaum, hedan Gananee, nau haeauthedauna vadanesenene,

³² Nau haegaugauanadauwunenau hasechauhauthehaude hedanadedau, hanau hedanadedau nau haenauthaunenau.

³³ Nau vevethahenauauwuu henane haenedau hevadathuwu haewauchāhene haujaun, nau haevasanade,

³⁴ Jenehāaa; hathāhuk, haudduseha nananene Jesus Nazareth? gauhāejau haudnauauhāane? Haenaunathane hadāhene; Vadanauau Hejavaneauthau.

³⁵ Nau Hejavaneauthausau haeneuva, dādaunauguu, hathauhuk, nau jenauchune. Nau haujau hāegausagewaude nahethāe hanaāejenauthaude nau haejaseneha.

³⁶ Nau vahee haegaugauanavaa, nau haeanadethadenenu jae, nuu hayew hanadede; hathāhuk, hethauwuu nauguu haenauthenehetha haenesedauwauna wauchāhenethe haujaunau, nau hanaāejenauāhethee.

³⁷ Hanaāauthedaunenede nanadee jasee gauānee vedauauwuu,

³⁸ Nau haegauhā haenauā vevethahenauauwuu, nau haejedā Simon hedauauwuu. Nau Simon henene henaunene haenaudauwauvāhene; nau haeauthewaunauthasanauau.

³⁹ Nau haetheaugudauna, nau haeneude hasauwauvahede; nau haenauthaa: nau nauhauhaunee haegauhā nau haedauyauhauvanauau.

⁴⁰ Wauhā hesese hāenaesade vahee hathāenethenauthee hasauwauvahehehau hanasejaechauwauvāhenethe haenauuchaudaunau; nau haedajevasana nau haenayauha.

⁴¹ Nau haujaunauau nauguu haevanauusanauau haewauthanauau, haeneānadenauau, nau haenehenauau, Nananene Chris Heau Hejavaneauthau. Nau haeneueva haejechuwauanadeha: dauhaenauwunethe dau Chris denede.

⁴² Nau hāesenene, hanaāejathāaude hese hadaunechaudanee, nau henanedanau haenaudehaa, nau haedasaa, nau haedauduvaa, haudjenauthaude.

⁴³ Nau hanaāēdauwunaude, haudnauthedaudauwau najanede Hejavaneauthau gauchuhene hedanau nauguu: haugaunaasejejenanau.

⁴⁴ Nau haeautheda vevethahenauauwuu Gananee.

5

¹ Nau hethauwuu, henanedanede haeneenavadaunedauwaudauwu hedanadedauene Hejavaneauthu, haetheaugu sathauwu neajee Gennesaret,

² Nau haenauhaude hanesanene thewaunau haetheaugunenau sathauwu neajee: hau naunauyāhehauau haeyauhaudesanauau, nau haenanahesadenauau henauyaudenenu.

³ Nau haejedā jasaa hethewaunene, Simon, nau haenehetha hadwauauwuhude vanehaa hehethee vachuwauauwuu vedauauwuu. Nau haejanaugu, nau haechauhautheha henanedanau hehethee thewaunaa.

⁴ Wauhā hāevadauthedade, hanaāenehethaude Simon, wauauwuhude hadaudavee, nau henuwunau haunauyaude hadjathāne.

⁵ Nau Simon hanaāauchuhananadethaude, Hechauhauthethāhe, naunaugaunene-sethānauau, nau nāhauwuthauujathāva: hau hegaugaunauau hadnaenauwuaudenau nauyaude haugau hasenehene.

⁶ Nau hāesedauthee nuu haewauthanenau hejathaunenau, nau haethauwunauaune henuyaudenenu.

⁷ Nau haedethanauau henedaehahenu danachaugunethe jasaa thewaunaa, haudjaunethe, nau haudnedāhevāthee. Nau haenauusanenu, nau haeechauchaunaudenau hanesanene thewaunau hanaāenauwuu.

⁸ Hāenauhaudauau Simon Peda, haechauāgujanaugu hejaedayānene Hejavaneauthusaun, nauchu, hathāhuk; haugauhauhauganenau, Hau Vahadāhene.

⁹ Haejenaunethajau, nau vahee hethāenethaunādaunau daunauanauthee nauwu hejathaunenau.

¹⁰ Nau nauguu James, nau Jaun, heauhau Zebedee, henedaehauhau Simon. Nau Hejavaneauthusaun hanaāēdauwunaude Simon, Jevanāthajau, hewaunehaa hee nananene haudnesedanaude henanenauau.

¹¹ Nau hāenauuchaudethee hethewaunenau vedauauwuu, hanaāenauuu vahee, nau hanaāenethauguhauthee.

¹² Nau hethauwuu, hāanedaude jasaa hedan, naune henane haeechauchaunaude naunaujaunee haugauwude; hāenauhauwaude Hejavaneauthusaun haeuāneseve, nau haeautheava, Vahadāhene, vathehānenagu hadeneeyaudanene hathauhuk.

¹³ Nau haeyethauha, nau haevasana, vanathehānau: heyaudāhe, hathaukuk. Nau nauhauhaunee naunaujaunee haugauwude haenauthaa.

¹⁴ Nau haenesedauwaunā haudjāedauwunaunith henanedane: hau najesa hadnauhauthehau hadanayau vevethahevāhe, nau hadvā dauhenayauhane, Mosase neesedauvade, haudneāenuu.

¹⁵ Hau haeneenanauthedaunene neānee: nau havathee haewautha henanedanede haeuānauuchaudene daujewaunejaathededaunee, nau haudnenayauhāthee hedaauwauvahedaunenau.

¹⁶ Nau haejathāau hese nauaunee, nau haeevetha.

¹⁷ Nau hethauwuu jasaa hese, hajesechauhauthethāde, Nesethajauhuhauau nau hechauhaudauwuhuhauau nanavaavede haetheaugunauau hejava, haejeehedesanauau hadauchāe hauwauhauauwudan Gananee, nau Judea, nau Dādaunedan: nau naunaudāde Vahadāde haetheaugu hadnenayauhaude.

¹⁸ Nau, naune, henanenauau haenauuchauhanauau henanene hee hedauwune haesevāhene nau haenayāthejedananauau, nau hadjenanauwunauthee hathaājenith,

¹⁹ Nau hāejevedethee haudnethejedanauthee hanau dauwauthaa henanedanede, hanaāenauauhusathee dasee hauauwuu, nau haejanauhaujānanauau, hehethee dasee hejavaa hauauwuu nauguu hedauwune nahethāe hathaājenith Hejavaneauthusaun.

²⁰ Nau hāenauhaudauwunith hedethauwuthajaudenenau, hanaāēdauwunaude, Henane, hauwauchudaude gaunudanauwunane.

²¹ Nau wauthaunauhāhehauau Nau Nesethajauhuhauau hanaāejasesegaugauuthajauthee, Hanaa naa hananadede nehedaduhude Hejavaneauthu? hathāhuk. Hanaa haudgudanauau wauchudaude, vavade Hejavaneauthu, naanesāde?

²² Hau hāenauwunith Hejavaneauthusaun hegaugauuthajaudenenau, Haudusethajauva hadahenauau? hathāhaugaunee,

²³ Hayew gauchauaa, nehehāgu, Hauwauchudaude gaunudanauwunana; nau wauāthe gauhā nau javesa heheagu?

²⁴ Hau hadaenauwu henee Heau henane naunaudāde dasee hathāauuvadee negudanauau wauchudaude, (naasenehethauhaugu neasauwauvahedauwunith heseva-

hede) Hāedauwunathane, Gauhā, nau hedanau hauddau nau najesa nananene haudauwuu.

²⁵ Nau nauhauhaunee haethauwauthe hathaājenethe nau haedane heaugusenadenau nau hanaāejathāude hedauauwuu haevaveenethedauna Hejavaneauthu.

²⁶ Nau vahee haegaugauuthajaudene nau haevaveenethedaunanauau Hejavaneauthu, nau haechauchaunaudenauau nāthajau, Naunaudauhauthānauau nuu desene, hāheagu.

²⁷ Nau hāevathedaude haejathāau nau haenauhauva hauāyāhe Levi hanaaseenith, haetheaugune nedauudanauau hauāyaunau, nau jethauguhu hathauhuk.

²⁸ Nau haevanauthā, haegauhā, nau haethauguha.

²⁹ Nau Levi haevasevethheha nehayau hedauauwuu, nau haewauthanauau hauāyāhehauau nau hauthauau haenedauguvā.

³⁰ Hau wauthanauhāhehau nau Nesethajauhuhauau haeaunevā hethauguhādaunau, naudu haenethevethewau nau haenedaveyāwauna hauāyāhehauau nau wauchudauhuhauau, hathāhaugaunee?

³¹ Nau Hejavaneauthusaun hanaāauchuhananadethāthee, hathāedāenaedethee hehauwuvathehā naudaunehāhew; hau hathāasauwauvahethee.

³² Nāhauwujenauusa haudnadethu hethahethee hau wauchudauhuhauau hadnaugaudanene hegaugauuthajaudenenau.

³³ Nau hathāhuk naudu hethauguhādaunau Jaun denauaunenaugauyānethe, nau devevethahethee, nau naasedauthethee hethauguhādaunenau Nesethajauhuhauau; hau hanethenauauau havethehethethee nau havaveyāthee?

³⁴ Nau hathāhaugaunee, Gauhājeneenesehauva dāeyaunauauau nedauenenedaunee hauauwuu naugauyaude hajesanedaunāthee waunenenehew?

³⁵ Hau hese haudnauauchuu, haudneedanauwunana waunenenehe, nau heee hadnaāenaugauyāthee hena hese.

³⁶ Nau hanaāanadethaude jea jegausauhānee; Henane hehauwu jenane waunauyaunee neauthayew hadaugauthāyaunee, hith hesedauhuk, nau hadauwayaunee needaunauuu, nau jasaa needanee hadau wayaunee hehauwunehauna gauthāyaunee.

³⁷ Nau hegau henane hehauwujenane waunauyaunee vasevenenaje gauthānevajana; nau wauāthe wayaugu vasevenenaje haddaudeauau nevajana, nau hadgusenauauau, nau nevajana haddenanaunauuu.

³⁸ Hau waunauyauau vasevenenaje hadedaunee hadauwayauau nevajau, nau nanesauuthadee.

³⁹ Nau hegau henane hesevanaagu gauthānevasevenenaje nauhauhaunee haevatheta waunauyaunee; hanau gauthāyauau hethadee, hathauhuk.

6

¹ Nau hethauwuu naneseauwauau vadanese, haehedesa jenayaunaa; nau hethauguhādaunau haegaugauunauwu wauchuunethauuhanau, nau haevethenauau, haegaunee gudenauau hejadenenau.

² Nau hauthauauau Nesethajauhuhau, Naudu hanesedauna waujaa nanavanau nesedaude vadanese hathauhaugaunee?

³ Nau Hejavaneauthusaun hanaāauchuhananadethaude, Gauhājethaunauhaude nuu hasauau David neesedaude, nehayau deasenade, nau neethāenethaunāde.

⁴ Neesejedāde Hejavaneauthu hedauauwunene, nau needanauau nau nevethethee nauhauthethājauaujau, nau haevana heethāenethaunaunau; waujaa nanavanau veyāgu hau jasaa vevethahevahehauau?

⁵ Nau hanaāāedauwunāthee, Heau henane nanethadāde vadanese.

⁶ Nau hethauwuu jea jasaa vadanese haejedā vevethahenauauwuu nau haeautheta: nau henane haenedau hejavese hejadena haesevane,

7 Nau wauthaunauhāhehau nau Nesethajauhuhau haeaunauyauhauvaa, wauau haadenenayauthā vadanese; hadnejauaudaunauthee dauhanājauwauaunauthee.

8 Hau haeaenauwu hegaugauuthajaudenenau nau hanaānadethaude henanene hes-evenasanith, Gauhā nau yethaagu nahethāe. Nau haegauhā nau haeyethaagu.

9 Hejavaneauthusau hanaāēdauwunaude, haudnaudedauunathana nananena hanesadee; Gaujenanavanau vadanese hethadāgu hasedaunee, nau wauāthe wauchudauneagu? henayauhāgu henaedede, nau wauāthe nanaunehāgu?

10 Nau hanaāenaunauānede vahee, hanaāēdauwunaude henanene, Segauha hajade. Nau hanaasedaude: nau hejade haenayauhune jasaa hasaunee.

11 Nau haechauchaunaudenauau hasenaunaude: nau hanaāaunauchuwuhadethee daun haudnesehauthee Hejavaneauthusaun.

12 Hethauwuu hena hese, haehau hauanee haudnevevethahede, nau haunaude nauhaunee haevethedauna Hejavaneauthu.

13 Nau hāesenee, hanaāadethaude hethauguhādaunau; nau haedana vadadauchunese-nee, hanaāeneseaude vadauhanauau.

14 Simoneau (jea haeaugauthea Peda haseauhuk), nau Andwheau henauhauwauau, James nau Jaun, Thenib, nau Bathaunaumew,

15 Matthew, nau Taumis, James heau Atheas, nau Simon Zenautes haseadagu,

16 Nau Judas James henauhauwauau, nau Judas Iskariot,* hanane jea nehaudau-nade Hejavaneauthusaun.

17 Nau haejenauunethauna nau haetheaugunauau hethauauwuu, nau hadauchu-nanenethe hethauguhādaunau, nau haevasenauthenedau henanedanede hehethee vahee Judea nau Dādaunedan, nau hehethee sathauwu hadajee Tyre nau Sidon hethājenauujaathēhādaunau, nau haudnenayauhāthee hedaunauwauvahedaunenau;

18 Nau hathāenaunauthauwauvahethee wauchāhenethe haujaunau: nau haenayauhau-nauau,

19 Nau haunauude hadaucha haevadauvasanau hanau daunudesanaunee hevadaude nau haevahenayauha.

20 Nau hanaāenāuhauwaude hethauguhādaunau, Hauwunaunana nananena hadav-enuhunena; hanau nananena najanede Hejavaneauthau, hathauhuk.

21 Hauwunaunana nananena hathāasenana hewaunehaa: hanau nananena hadne-gaudana. Hauwunaunana nananena hathāevewauhuna hewaunehaa, hanau nananena hadnauchaunena.

22 Hauwunaunana nananena, henaneda hasānavānā, nau jaasauaunānā, nau nau-naunauthevānā, nau hausāgudenauthe haneseadaunenau hadauwausaunee, haugau Henane Heāhene hee.

23 Haunauwuthajauau henee hesee heee, nau jajanauauau hee haunauwutha-jaude: hanau, naune, hanavanasauau hadaugautheavadenenau hejavaa: hanau na-neesedaugaunee henesaunaunenau naneesehauhaugaunee haeyāhehau.

24 Hau naunauthauau hadnauauchaudaune hathāeveaunauaune; haugau hanesedanauwuna hauwauthenaedede.

25 Naunauthauau hadnauauchaudauna hathāegaudana; haudnasenana. Naunau-thauau hadnauauchaudauna hathāauchaunena hewaunehaa, hadnaudauwuthajauna nau hadvewauhuna.

26 Naunauthauau hadnauauchaudauna, daunhāene vahee henaneda hāethadenee hasenehethānā, hanau henesaunaunenau naneesehauyaugaune jayaudauwaeyāhehau.

27 Hau hadāedauwunathava nananena hathāenedauvana, Vechauthaa nananena haujau-thavenau, heneehaa hasānavādaunenau,

28 Hauwunaunaa hāwauwauchuvādaunenau, nau hevevethasaa hāwauwauchuhādaunenau nananena.

* **6:16** "Iskariot" is spelt with a "k" here but in 22:3 with a "c". Biblical names in this text generally but not always follow the spelling of the King James Version (KJV).

29 Nau henee haudauuvāde hajāeaunaa nau naugautha venene; nau hedanauaugu nananene hauddu jevaedanau jea naudauguvechude jevaethaa.

30 Hevenaa daun henaneda hānedauwunādaunenau nananene; nau jeva jaenedauwunaa hedanauwunānagu daun hanetheyaunenau.

31 Daun hasevathehānaune henaneda hesehānenagu, nechau jenaasehaude.

32 Hith nananena vechauthaunagu daun havechauthādaunenau nananena, haddusevaveeneva nananena? haugau wauwauchudauhuhauau nechau nevechauthauthee hethāvechauthādaunenau.

33 Nau hith nananena hethadāgu hasehaunā daun hāneneehādaunenau, haddusevaveeneva nananena? hanau naneesedaugaunee wauwauchudauhuhauau.

34 Nau hith nananena hehaunagu daun hāneejauaunaudaunādaunenau, haddusevaveeneva? hanau wauwauchudauhuhauau nechau neehaugaunee wauwauchudauhuhau, hadnejanaasesedanuu.

35 Hau vechauthaa nananena haujauthavenau, nau hethadeha hasedauna, nau hehānagu, jevajavathehāe; nau nananena haudaugautheavadenenau hadvasauau, nau nananena hadnaēdēyaunenena Javaājauuthee: nau nenenehaude nethājevaveenenethe nau hauhauganau.

36 Hedauwuyaunee nananena, nananena Hāsaunaunenau jea hasedauwuyaunede.

37 Jevaauchuwuu, nau nananene hadnaajachuwuhane: nau jevaduguthāe nau nananena hadnehauwuduguhuva: hejaegudanauwuyāe nau hadnejaegudanauwunane nananene:

38 Vāe, nau hadnevenana nananene, vavesethajauauthāe, dāayāe, nau dāesathāe, nau haunauwauauthāe, hauchauva, henane hadvenāna. Nechau hadnaasethajauaudaunāna hasethajauauthānā hadnanesethajauaudaunana.

39 Nau hanaānadethaude haejeregausuhu, Gaunanenauguhu jenenauājetha nanenau-guhu? Gauhaudjenesauujanesenauau gauhanaa?

40 Thauguthāhe hehauwujavaāhe hechauhauthehādaune: hau haunauude hanesāde daun haunauudaunāde hathāhenith hechauhauthehādaune.

41 Nau naudu hanauhaudauwu nananene hahavaa hejaheede hesesāe, hau haājevesehau havadauhaude hathāsewau hasesāe?

42 Wauāthe hauddusenehethau nananene hahavaa, Jāedaā, hadaugauhauwunathe hajaheede hasesāe, hau daujenauhauwaude havadauhaude hathāsewau nehayau hasesāe? Nananene jayaudauwunaedehe, nedauau haugauhune havadauhaude hathāsewau nehayau hasesāe, nau hadenaāeneauvane hadenaāeneaugauhauwu jaheede hethāsathau hahavaa hesesāe.

43 Hanau hauhaude hethahagu hehauwuseaude wausaunee vevenaundenau; nau wauāthe wauchahagu hauhaude hehauwuseaude hethadenee vevenaundenau.

44 Hanau hadauchude hauhaude neaenaunede hanasaunee hevevenaundenau. Hanau hauchahevesee henanenauau hehauwunaadauhauānuu hauuyauchuwunau nau dauchuwusee hehauwunaadauguunee dadajevenau.

45 Henane hethāde hehethee hethadenee heda nenauchaude hethadenee; hau wauchāhede henane wausaunee heda nenauchaude wausaunee: hanau waunauthaa hehethee hedahaa hede nanadenaunee.

46 Nau naudu, Vahadāhene, Vahadāhene, haesena, hau nejesedauna hayauhuhau hasenehethathana?

47 Daun nādasāde nau nedaunānagu hasenehenaunauau, nau hesedauhuk, haudnauhauthehathana haudnethāde:

48 Henanene henee nenesedenethe hauauwu naathāde, nau henee nejayauchauhuu, nau naneenanaunauau hauauwuu dasee hauunaugāe: nau nauunauuu naje neje nau-nauthuu jaathāsāe henee hauauwuu, nau hehauwunauauvathāau: hanau daunāaudaa hauunaugāe.

⁴⁹ Hau jaathedehe, nau janenaasedauthe, naathāde henanenau henee nedasauauvānethe vedauauwuu; nau neje jaathāsāe naunauthuu, nau nauhauhaanee naunenauau; nau thauwusāe henee hauauwuu nevasauau.

7

¹ Wauhā hāevathanadede vahee hanasenehede daujajaathehade henanedanede, haejedā Capernaum.

² Nau jasaa vanenenaja hewauwaune haevechautha haeaugauwune, nau haeyānajane.

³ Nau hāenedauwauthaude Hejavaneauthusaun, haeautheava vachaugananenau Jews, haeadetha hadjaunith nau hadnenayauhaunith hewauwaune.

⁴ Nau hāedauchauthee Hejavaneauthusaun, haeautheauwaunauthasanauau haugau-naunee, hanau hethāde naa henane naa haudneenesedaude, hathauhaugaunee:

⁵ Hanau vechaudauau nadedanenau, nau nenesedaunānauau vevethahenauauwuu.

⁶ Heee Hejavaneauthusau hanaāejasesenethaunāde. Nau hāeouchauau hauauwu, vanenenaja haejedauaunanenau henedaehauhau, Vahadāhene, jevawauchuthajau Nananene: haugau wauchāhenau hadjedāne naudauauwuu, hathauhuk:

⁷ Nanaa nājewauchanavadede dauudasathane: hau vavade nehedaun hanadede, nau naudautheau hadeenanedanede.

⁸ Hanau nananenau nanethenanenenau naunaudāhenau, nanethenu vanenane-nauau, nau naāēdauwunauau hanesāde yehau nau naāejathāaude; nau jasaa, Nahāje, hathauau nau jaunaude; nau naudautheau, Nesede, hathauau, nau nanesedaude.

⁹ Hejavaneauthusau hāenedauwaudauau nuu hayauhuhau, haegaugauanava, nau haenauthegauthaagu, nau hanaāēdauwunaude henanedanau hethāethauguhādaunau, Hadāedauwunathava, Haunauau nāhauwuveehau vasee hethauwuthajuhu (naa hathāde henane), hegau, hehauwuu haduu Israel.

¹⁰ Nau henee hathāautheavathee, hāejaenuusathee hauauwuu, haeveehanauau wauwaune haenanedanene henee neasauwauvāhenith.

¹¹ Nau hethauwuu jasaa hese, hanaāehaude hedan Nain haseenaüyāgu; nau haewauthanenau hethauguhādaunau henethaunādaunau, nau hauwauhuu henanedanede.

¹² Wauhā hāyānauusade hejavaaa dajanaunaa hedan, naune, naa najaa henane naunudanade, jasāsau henaune, nau haenevesānene: nau haewauthane henanedanede hehethē hedan haenethaunaa.

¹³ Nau hāenauhauwaude Vahadāde haeauwunauna, Najenaudāve, hathauhuk.

¹⁴ Nau haedasa nau haevasane nauaunechauthau: nau hethāenauaunechauhādaunau haedādauyaunēnau. Haunaua, hāedauwunathane, Thauwauthe, hathauhuk.

¹⁵ Nau henee nenajaa haethauwaudaagu, nau haenaāejasesanadede, nau hanaāevenaude henaunene.

¹⁶ Nau nāthajaude haedasā vahee: nau haevaveenethedaunanauau Hejavaneauthu, Havathee haeyāhe hanejauaude hadedanene; nau, Hejavaneauthau haenauujādauna henesaunau, hahagaunee.

¹⁷ Nau nuu dauauthedaunenede haenanadesanaune vahee Judea, nau nanadee gauānee vedauauwuu.

¹⁸ Nau hethauguhādaunau Jaun haeauthedaunaa vahee nuu hayauhuhau.

¹⁹ Nau Jaun haeadetha hanesenethe hethauguhādaunau haeyethautheava Hejavaneauthusaun, Gauhanane henee waudaudjaude? nau wauāthe gauhadnaudenauhauwau jasaa?

²⁰ Hāedauchauthee henanenauau, Jaun Dusaayāhe janādautheavānauau Nananene, hathauhaugaunee, hanaāenaudedauauthē, Gauhanane henee waudaudjaude? nau wauāthe gauhadnaudenauhauwau jasaa.

21 Nau vavade hāauchauau haenayauha haewauthanenau vavavāauhuhau nau havathee haugauwude, nau wauchāhenith haujaun; nau haewauthanenau nanenau-guhuhau haevena nauhauthau.

22 Hejavaneathusaun hanaāāedauwunāthee, Najajathāauau, nau hadāedauwunauva Jaun hathāhaugaunee, hayewhu hanathauhauthāna nau hathadauvana; hasejaenauhauthāde nanenauguhu, jeneejavesāhe daujavesade, naunaujaunee hedaugauwudaunenau dau-uyaudahethee, hayājadāhe daunedauvade, gaujauaudahehe daujaethauwauthede, hadavenuhu hethadenee waunauyaunee dauauthedaunade.

23 Nau hauwunaunade daun najewauchuthajaudaunāde.

24 Nau hāejathāaunethe Jaun hedauthaunau, hanaāejasesanadedauau henanedanede hasenaedenethe Jauneau, Hayew nananena haewaunenauhauthaunenau nauaunee? gaugauguyāse daunauauvasee?

25 Hau hayew nananena hāewaunenauhauthaunenau? Gauhenane hedāchaunau heja-jehaunenau hedāchaunau? Naune, nethāeneenuhuthee, nau neneenaedethee thanāsee nenauchuwunethe hedauauwunenena.

26 Hau hayew hāewaunenauhauthaunenau? Gauhaeyāhe? Haa, hadāedauwunathava nananena, nau javaāsee haeyāhehau.

27 Naa nananene, wauthaunese, Naune, hadjejenanauau Naudautheau hathaaguna, hadnesedaunāna hauvaunenau sayānee Nananena.

28 Hanau nāedauwunathana, hadedanenu nethāenesaunevāna hesānauau hehauwu-javaāse haeyāhe hathāde Jaun Dusaayāhe: hau hena haugajehede hanedauhuk hena-janedaunene Hejavaneauthu javaāhehuk.

29 Nau vahee henanedanede hathāenedaunāde, nau hauāyāhehauau, hanaāechuwauthethajaudaunauthee Hejavaneauthu, haenethedusaanā dusaayāhew Jauneau.

30 Hau Nesethajauhuhauau nau nanavaavehehau yese nehayau haeausagudenaunau hevathēhādaunene Hejavaneauthu, haejenethedusaanā (Jauneau).

31 Nau Vahadāde hahagu, Hayew naudneedajenehethau henanedanede nuu henaedede? nau haethahenauthe?

32 Waude dāeyaunauauau hathahethee theaugunauthe haudaunanauauwuu, nau danadethadethee, nau nanāhethee, Nevadauhana, hau nananena nejevadana; nau-dauwuthajaudauwunana nananena, hau nejevewauhuna.

33 Hanau denausade Jaun Dusaayāhe dejevethee jauaujaunau nau deejevanaa v-sevenenaje; nau nananena nanethenaude haujaun, nethauna.

34 Heau henane daunausade dauvethede nau dauvanaa; Nauhauvaa naa henane naudaudāhe, nau vasevenenajevanehe, henedaehauhau hauāyāhehau nau wauwauchudauhuhau, nethauna.

35 Hau haeyaude chaunuwuthajaudaunaude vahee hedāeyaunewau.

36 Nau hanesāde Nesethajuhu haeadetha haudjewaunenethevethehevāde, nau haeyehau haejedā Nesethajuhu hedauauwunene, nau haejanaugu hadvethede.

37 Nau, naune, hesā hedan, haeauhaugane, hāaenaunaude Hejavaneauthusaun daujanaugunith hadvethehenith Nesethajuhu hedauauwunene, haejāchaude jāvasaa chauayau,

38 Nau haetheaugu hegauwune heauthene haevewau, nau hanaāejasesahesadede heauthene hee hedejee nau haehaenauwu hee henethaanene, nau haenedane heauthene, nau haechauane hee chauayau.

39 Wauhā Nesethajuhu hādethaude hāenauhauwaude, haejaevenanadethade, Naa Henane, haeyāheyaugu, hanaenaunaude daunhadāhenith nau daunhathāhenith nuu hesāne hevasanādaune: hanau wauwauchuduhu, hahagu.

40 Nau Hejavaneauthusau hanaāāedauwunaude, Simon, haudnāedauwunathane nananene. Nau hanaāenehethaude, Hechauhauthethāhe, nanehe.

⁴¹ Hena jasaa sayānedanauwuyau haenesenenau hesayānedanauwunādaunau: hanesāhenith yauthaunevadadausauau vāejethā, nau jasaa yauthauyauau.

⁴² Nau hāeyauhuunee haunaudauhudaunene, haenanethauaunegudanauwuna ne-sauuu Jeāedauwune, hanaane hevechauthādaune javaānee?

⁴³ Simon hanaāējaāedauwunaude, Nauchāe nananenith heneehejavaāgudanauwunaune. Nau hanaāāedauwunaude, Nananene neaenauwu.

⁴⁴ Nau hanaāeyethaagude hesāne, nau hanaāāedauwunaude Simoneau, Gauhau-nauhauwau nananene naa hesā? Nananenau nejedānau haudauauwuu, nananene hāehauwuvene naje heee nauaudau: hau neheahesadede nauaudau heee hedejee, nau neheahenauau henethaa.

⁴⁵ Nananene hāehauwunedane hau naa hesā hāenauusanaunauau hehauwuthauu-jenedane nauaudau.

⁴⁶ Nauauguhua nauguu javeda nananene hajechauusānene hau naa hesā nechau-nauau nauaudau heee chauyau.

⁴⁷ Naa hāedauwunathane nananene hewauchudaudenau waunauthanee gaunudanauwunade; hanau dauvechauthāde javaānee hau daun vanehaa gaunudanauwunade vavade hasevechauthāde vanehaa.

⁴⁸ Nau hanaāāedauwunaude hesāne, nananene hauwauchudaudenau jaegudanauwu-nane.

⁴⁹ Nau hethāenedauguvādaunau dauvethethee hanaāejasesanadethee hegaugauutha-jaudenenuau hanaa naa negudanauau wauchudaudenau jea?

⁵⁰ Nau hanaāāedauwunaude hesāne, Nananene hadethauwaudaude henayauhāne nananene; najesa hadnauwauthenesane.

8

¹ Nau hethauwuu waunee haejathāau nanadee hadauchanene hedan nau hajasee-hedan, dauaunauthedade nau daunaunauhauthethāde neethajaude waunauyaunee hasaunee henajanedanene Hejavaneauthu: nau vadadauchunesene haenethaunaa,

² Nau jasaa hesānauau, haenayauhau dewauchāhenethe haujaunau nau vavavāuhuhauau, Mare haseadagu Magdalene, naunudanavathe nesaudauchu wauchāhenethe haujaunau,

³ Nau Joanna henene Chuza Herod hadāhevāhe, nau Susanna, nau haewauthanauau hauthauauau, hevenādaunau hethāenetheyaunenenu.

⁴ Nau hāeneenawauthaa henanedanede dauauāchaudenee, nau haedasaa hehethee nanadee hedane, hanaāeanadede jegausauhānee:

⁵ Jenayāhe haewauneneāgude hejenayaunau: hauthauau haejajanesanau vaunaa; nau haeauguhudaunene, nau neahehauau hejavaa haeaudauvanauau.

⁶ Nau hauthauau haedasegaugauusanau hauunagāe; nau chauchaunu hāeveseeu, haenadadanau, hanau daujenajenee.

⁷ Nau hauthauau haejajanesanau hegauau dauchuuwusee; nau dauchuuwuse hae-nauguveseaunau, nau haeajedaunanā.

⁸ Nau hauthauau haegaugauusanau dasee hadauuthadee vedauauwuu, nau haeveseaunau, nau haeneeaunau vadadausauau jenayaude. Nau hāenehedauau nuu hayauhuhau, haevasenehe, Daun henaudaununede, nanehanedauvade.

⁹ Nau hethauguhādaunau haenaudedanau, duthanau nuu jegausudede, hathāhuk?

¹⁰ Nau hahagu, Nananena vanenana haudnaenauwuna jaeyaunau henajaned Hejavaneauthu: hau hauthauauau janegausauhuthee; hadnenauhauthāthee havajenauhauwuu, nedauvāhehauau havajaenauwu.

¹¹ Wauhā, heyew hasauau jegausudede: Jenayaunau hedenehede Hejavaneauthu.

¹² Henee vaunaa nanathee nenedauvathee; hanaāenuusade haujau, nau nedanauwunāthee hanadede hedahenauau, naseduhuu hethauwuthajauau, nau hadenanedanena.

¹³ Henee hauunaugāe nanathee, nenedauvanauthe nседанuu hanadedau nau nau-guu haunauwuthajaude; nau nuu hehauwuthājenenauau, vanehaa nethauwauduu, nau nauauchaudauvauthe vasehadede naneenaunegauhuthee.

¹⁴ Nau henee nejajanesāe thauhauthauchauyauau dauchuuwusee nanathee, hanesenedauvanauthe, naneejathāauthee, nau neenadejethathee hee haunaunethaude nau nethauyādahede nau haunauwudaude, hee nuu henaedede, nau hehauwunauuchaudenauau vevenaundenau hadauuyauthaunee.

¹⁵ Hau henee hadauvuthadenee vedauauwuu nanathee, hethauvahethee nau hethadenee hedahenau nenedauwauduu hanadedau nau nau-naunedethee, nau nenauuchaudethee vevenaundenau hee jenauwauaunee.

¹⁶ Hegau henane, hāesedeauchauuu nauauvuthayau, hehauwaugau hee vasaunau, nau wauāthe hehauwujenane thānee hauvaa; nau nethānauau nauauvuthayau neetheaugunee daun janedāde hadenauhaudauau nauauvuthayāgu.

¹⁷ Hayewhu hehauwuyauthesa, haudjauthasenesee; wauāthe hayewhu hehauwuyau hadjaenaunee nau hadnejaunauau hauthasauau.

¹⁸ Haunauyauhaudauwuu hanathadaunā: daun nanethenaude, nananede haudnevenade; nau daunjanenethenaude, nananede haudnedanauwunade daun henetheyaunau.

¹⁹ Hanaāedasāde henaune nau henethesaunau, nau haejenedasaa hee dauneethenedaunenee.

²⁰ Nau haeāedauwunaa jachau hathāhuk, Hānau nau hāthesaunauau theauguthee jathee, vanadaunauhauvānaune.

²¹ Nau hanaāauchuhananadede nau hanaāāedauwunaude, Nānau nau nāthesaunauau nuu nanathee nenedauwauduu hedanadedauvane Hejavaneauthu, nau naasedauthee.

²² Wauhā hethauwuu jasaa hese, haejedā thewaunaa nauguu hethauguhādaunau: nau hanaāāedauwunaude, hadeyhaunau hauchaunau neajee: nau hanaāejathethuauthee.

²³ Hau hajecheuauthee haenaugau: nau hanaāenuuasaa neajee haenaudasa; nau haechauchaunane naje, nau haeanedauwugaujauaudahede.

²⁴ Nau hanaāedauchauthee, nau haeauwaudananauau, Hechauhauthethāhe, Hechauhauthethāe,* gaujauaudāhenauau, hathauhaugaunee Hanaāethauwauthede, nau hanaāeneudauau hasāse nau dasenaunanaunee naje: nau hanaāedaunauuu, nau hanaāedādauyauau.

²⁵ Nau hanaāenehethaude, daude hadethauwaudadenenau? Nau haenāthajaunauau haejenaunethajaunauau, Dauhuthenane naa, hanathadagaunee; haauchuwude hasāse nau naje, nau hanaāethauwaudaunāde.

²⁶ Nau hanaāenuusathee vedauauwuu Gadarenes, hauchaunau Gananee.

²⁷ Nau hāeyehaude vedauauwuu, hena haenuchaunaa jathee hedan jachau henanene, haenethena haujaun dajechauau, nau haevedauauchauna, haejenaede hauauwuu, nau nedauthānavathe gaujauaudahehehau.

²⁸ Hāenauhauwaude Hejavaneauthusaun haevasanade, nau haechaagujanaugudauna, nau hanaāevasanadethaude, Hauddusehathe, Hejavaneauthusau, Nananene Heau Hejavaneauthau javaājauuthee? Nenedauwunathane Nananene jevanaunauchauthehe.

²⁹ (Hanau haenesedauwauna wauchāhenith haujaun hadjenauhenith hehethee henanene. Hanau nauaunee dauhusedanāde: nau nau-naunehade neduguhude hee vāejethāduguthaunau nau nesaunajethaunau; nau haegaugauchauagude heeduguhudaunau, nau haejathethasauaunaa haujaun hese nauaunee.)

* **8:24** Possible missing “h” in “Hechauhauthethā(h)e” (“Master”).

30 Nau Hejavaneauthusaun haenaudedanaa, Haudusee? hathāhuk, Nau hanaāēdauwunaude, Waunauthade: hanau dewauthanethe haujaunau hethāchaudaunādaunau.

31 Nau haenedauwunanauau hadjenesedauwaunathee hadjeyehauthee hethauvaa.

32 Nau hena haewauthanauau neauthuwauchu nevethehethee hauanee: nau haenedauwunanauau hadjenanāthee wauhaunee. Nau haejenana.

33 Hanaāenauahethee haujaunauau hehethee henanene, nau haewauhaunesanauau neauthuwauchuu: nau vahee neauthuwauchu haejathegauhunauau neenanee janahuu yesee neajee, nau haevanadeavenauau.

34 Hāene henee nauchauwauthee daunauhauduu hasedaudenenee, haedaugauhunauau, nau haejathāaunauau nau haeaunauthedanauau hedan nau vedauauwuu.

35 Hanaāeyehaudenee hadnauhauwuu daun hasedaudenee; nau haedauchau Hejavaneauthusau, nau haeveehau henane, heneenenauthāde haujaunau, haetheaugu heauthene Hejavaneauthusaun, haedāchaunene, nau haechuwuthajaune: nau haenāthajaudene.

36 Henee nenauhauwauthee haeauthedanauau neesenayauhade nenethenaude haujaunau.

37 Hadauchaa hathāauauvaa Gadarenes gauānee haejathethajenāhenauau; hanau dau-sāhede: nau hanaāeyehaude nauauhuu jethee thewaunaa, nau hanaāējaesade.

38 Wauhā henane nenauthāde haujaunau haenehethaa hadnenethaunāde: hau Hejavaneauthusau haejathethajenāhe, hathauhuk,

39 Jaeyehau haudauauwuu, nau hadnauhauthethā hathāenavasauau hayewhu Hejavaneauthau hasehāne nananene. Nau hanaāejathāaude, nau haeautheda nanadee hathāaunee hedan hathāenavasaunee hayewhu Hejavaneauthusaun hasehāde.

40 Nau hethauwuu hāējaenauusade Hejavaneauthusau, henanedanede haeneethajaudanaa: hanau haevadauyauhauwau.

41 Nau, naune, haejenauusa henane Jairus haseagu, nau hadāhevāhe vevethahenauauwuu: nau haeuāneseve Hejavaneauthusaun heauthene, nau haeadetha hadjewaunejedānith hedauauwuu:

42 Hanau haenesāhene hedaunau wauau hanesenee jajenevāhe, nau haeayānajane. Hau hajesesade henanedanede haevauhaunaa.

43 Nau hesā haevathaude nesenee jajene heee, haevathede haunauude hevāejethāwau heee naudaunehāhehau, hau haejenayauhau,

44 Haeedasa hegauwune, nau haevasane naunauchuu heduwune: nau chauchaunu haejenevathaude.

45 Nau Hejavaneauthusau hanaa navasanāde hahagu? Hāevahethedauwaudenee, Peda, nau hathāenethaunāde, Hechauhauthethāhe, henanedanede vauhaunane nau naneethenane, nau hanaa navasanāde, nesehene? hathauhaugaunee.

46 Nau Hejavaneauthusau, hanaadee vasanānau, hahagu: haenauwau daujasesenauauau vadaude hehethee nananenau, hahagu.

47 Nau hāenauhaudauau naa hesā daujeyauthesee haejeyehau haeahenauau, nau hanaāechauāgujanauaunaude, haeauthedauna hauthasee vahee henanedanede hathavasanaude, nau hasenayauhāde chauchaunu.

48 Nau hanaāēdauwunaude, Nauddau, nanehāauwauthenaedene: nananene hade-thauwuthajaude henayauhāne nananene; najesa haunauwuthajau.

49 Hajesanedede, hena haejau hanesāde hehethee hadāhevahew vevethahenauauwuu, haeāedauwuna, Haudauna najaa; jevajenaunevene Hechauhauthethāhe.

50 Hau hāenedaunāde Hejavaneauthusaun, haenaāēdauwunāde, jevanāthajau: hethauwuthajau vavade, nau haudnenayauhade, hathāhuk.

⁵¹ Nau hāejedāde hauauwuu, henanedane haejevadaujedāne, vavade Peda, nau James, nau Jaun, nau henesaunaune nau henaune hesāhedāeyaune.

⁵² Nau vahee haevewauhudaune, nau haeaudauwuthajauhā: hau hanaāenehede, Jevavewauhuu; hehauwunaja, nauthe naugauhude.

⁵³ Nau haeauthanauau haevachunaunanauau, dauaenaunauthee daunajanethe.

⁵⁴ Nau haevanudana, nau hanaāedanaude hejadenene, nau hanaāanadethaude, Hesāhee, thauwauthe, hathauhuk.

⁵⁵ Nau hevadathuwu haejaedasaa, nau haethauwauthe chauchaunu nau hanaāenehede hadnauchauvavathe.

⁵⁶ Nau henehā haegaudauwuthajaunenau: hau haeāedauwuna hadjāedauvanethe henanedaa hasedaude.

9

¹ Hanaāadethaude vadadauchu nesenee hethauguhādaunau hauānee, nau haejaanauwuna naudahede nau hadvaheneedauthee nanadee vahee haujaunaa, nau hadnenayaudethee haugauwude.

² Nau haejenana hadnauthedaudauwunethe henajanedauene Hejavaneauthu, nau hadnenayauhaunethe hasauwauvahehehau.

³ Nau hanaāāedauwunaude, Jevaedanauwuu hayewhu heee hajavechaudenenu, daudause haugaudauhunau, daudause newaugusajaānauthau, daudause jauaujau, daudause vāejethā; daudause jevanesauguvechudaunaa.

⁴ Nau daun hauauwuu hadaujedānā jenaadauna, nau jenaathejathāauna.

⁵ Nau daun hajethauhauvādaunenau, hāenauahenā hena hedane, hadegauyāejaheva naudauuyāgu hadneaenaunathee.

⁶ Nau hanaāejathāuthee, nau haehedesanauau hauauwudan, haeauthedaudauwu hethadenee waunauyaunee, nau haevahenayauthānauau nanadee.

⁷ Wauhā Herod naja haenedauva vahee hanasedaudenenee heee: nau haejaene, hanau haenaasenehedaunee gauuu, henee Jaun jaegauhāde hehethee denajaa;

⁸ Nau gauuu, henee Elias naunauthethāde hedanayau: nau hauthauauau, hanesāde dajechauau haeyāhehauau jaegauhāde.

⁹ Nau Herod haenehe, Jaun nedavaāsauau: hau hanaa naa, nanedauwauthau? Nau haevadaunauhauva.

¹⁰ Nau vadauhanauau, hāejaenuusathee, haevahauthedaunaa hanasedaunethe. Nau hanaāedanaude, nau hanaāejathāuthee hevenanee hese hadaunechaudanee hathauau hedan Bethsaida haseāgu.

¹¹ Nau henanedanede hāaenuu, hanaāethauguhauthee: nau haeesedana, nau haeauthedauna hasaunee henajanedauene Hejavaneauthu, nau haenayauha hathāevadaunayauhathee.

¹² Nau hāayānaesade, hanaāejenuusathee nesenee, nau hanaāenehethāde, Nanehāejathāaudenee henanedanede, hadeehaudenee hauauwudan nau vedauauwuu nauanee, nau hadenethee, nau hadejasedauthee vethewau: daunechaudaa hadaunauau.

¹³ Hau, Venaa nananena hadevethehedaunee, hathauhuk. Nau hanaāāedauwunauthee, Hau nanethenauwunauau hehauwujavaānee hayauthaunāe jauaujaunau nau hanesethee nauwu; hanāyehaunee nau haunaudaunauhuu vethewau heee vahee nuu henanedanede.

¹⁴ Hanau wauau haeyauthaune vasevadadausauau henanenauau hanaadauchuthee. Nau hanaāāedauwunaude hethauguhādaunau, Janauguhāa yauyauthauyauaugunauha.

¹⁵ Nau hanaasedauthee, nau haevajanauguhanauau.

16 Hanaāedanauau hayauthaunanenee jauaujaunau nau hanesenethe nauwu, nau hanaāejenāauguaude hejavaa, haevevethasa, nau haenaāejeanauau, nau hanaāevenaude thauguthāhehau haudjenanauwunethe hathaājedaunenee henanedane.

17 Nau haevethehedaune, nau haevahegaudaudene; nau haeauānenau jeyauwaunau hathāenathaudāe nesenee hanaadauchāe hanechauchaunāe nenethaudanee.

18 Nau hethauwuu, haenesenane, dauvevethahede, Hethauguhādaunau haenethaunaa: nau hanaāenaudedadaunaude, Hanaa nenehede henaneda daunanenau? hathauhuk;

19 Hanaāauchuhananadethauthee, Dusaayā Jaun; hauhauthauauau nethee Elias; nau jasae nethee hanesāde dajechauau haeyāhehauau jaegauhāde.

20 Hanaāenehethaude, hau hanaa nenehede nananena daunanenau? Peda hanaāauchuhanāedauwunaude, Chris Hejavaneauthau.

21 Nau haeneenadauduvā, nau haenesedauwaunā hadjāedauwunaunethe henanedanau henee;

22 Heau henane hadnasenede wauthanee heee hayewhu, nau hadnausāguthāde vachaugānanenau nau naja vevethahevahehauau nau wauthaunauhāhehauau, nau hadnaade, nau hadjaegauhāsanade nasese, hanathauhuk.

23 Nau hanaāevahāedauwunaude, Hith henaneda jethauguhānaugu nanehanaunauchauthehadede, nau jeedane henaugauchu hayauwusenenee, nau najeethauguhaa.

24 Daun haunaugaunayaude hedenaedede hadnanadede: hau daun hanadede hedenaedede heee nadanayau, nananede hadnenayauhadede.

25 Hauddusedau henane, vahesedanauaugu hathāauauvadenee, nau hanahadagu, nauwauāthe hausāguthadagu?

26 Daun naudauthedaunāde nau nadanadedauau, nananenith Heau Henane haudnaudauthedaunaunith, hāenauusathe nehayau hadauvasāthanith, nau Henesaunaune hadauvasāthanith, nau vadanee hautheaunauau hadauvasāthanethe.

27 Hau hadethauwauthedaunathava hauthauauau theauguthee hede, haudnehauwuvajadauwu gaujauaudahede, haunaude haudnauhauuu henajanedauene Hejavaneauthu.

28 Nau hethauwuu wauau hanasaudauchuse hāesenehede, Hanaāedanaude Peda nau Jauneau nau Jameseau, nau hanaāenauauihusathee hauanee hadnevevethahethee.

29 Nau hajesevevethahede haenauasāaune hedauchaveau haeanathadene, nau hedāchaunau haenaujaunenau nau haenaunauaugausauaunenau.

30 Nau naune haeanadethaa hanesenethe henanenau, haenanenenau Mosaseau nau Eliaseau;

31 Daunauhauthethāde hedanayau haenauasāaune, nau haeauthedaude haudgaujauaudāde hadvathechauchaunaude hehethēe Dādaunedan.

32 Hau Peda nau hethāenethaunādaunau haenauwaunanenau: nau hāauwaudauaunethe, haenauhauwunenenau henaupasāaude, nau hanesenethe henanenau haenethauguvaa.

33 Nau hethauwuu, hāenauthāde, Peda hanaāanadethaude Hejavaneauthusaun, Hechauhauthethāhe, hethadee hasanedaunee hede: nau hadenesedauna hanasāe nenaunau; hanesadee Nananene, nau hanesadenee Mosese, nau hanesadenee Elias; haejaene daunhasenehede.

34 Hajesanadede, haejenauusanau henaunauade, nau haeduguaunā: nau haenāthajaunaunauau daujedāthee henaunauadee.

35 Nau haejanadedaune hehethēe henaunauadee, Naa nananede Navechauthau Nāa: nedaunaa, hāheagu.

36 Nau hāesanededaunee, Hejavaneauthusaun haenesenane. Nau haeyaudenauau, nau haejāedauwunauau henanedane hena hese neanāthauhauuu.

³⁷ Nau hethauwuu, dauauthesenenee, hāejejanauhusathee hehethee jauaudanee, hae-gauāhenenau henanedanau hejajedauaunādaunenau.

³⁸ Nau, naune, henane hehethee henanedaa haevasanade, Hechauhauthethāhe, nenedauwunathane Nananene, daugauhauwune nāa: vavadenaanesāde nadāeyauneve, hathauhuk.

³⁹ Nau, naune, haujaun hedanāde, nau chauchaunu haedauyānade; nau haethauwuguthaa haevevechauchaunade jeda, nau haeasenehaa haejechuwau-thenauthaa.

⁴⁰ Nau nananenau neauthewu hāthaughādaunauau hadnausāguthauthee; nau neje-needauthee.

⁴¹ Nau Hejavaneauthusau hanaāauchuhananadethaude, Hau hāhauwuthauwuthajau nau daujechuwauthenaedene, haudedauhujesenedauguvathe, nau haddauhujesenethau-guvathe? Jāsene nananene hāa hede.

⁴² Nau hajesejaude, haujaun haeuneguthaa, nau haethauwuguthaa. Nau Heja-vaneauthusau haeneneuva wauchāhenith haujaun, nau haenayauha dāeyaunauau, nau haejaevena henesaunaunene.

⁴³ Nau haevagaugauanadauwu hasevasenaudāhenith Hejavaneauthu, Hau haje-segaugauanaduu haunauude vahee hayauhuhau Hejavaneauthusaun hanasedaunith, Haeāedaunau hethaughādaunau,

⁴⁴ Chuwauthee nuu hanadedaunau jedānauha haunaudaununenau; hanau heau henane hadvenavathe hejadenene henanenau.

⁴⁵ Hau haejaenauwu nuu hasenehenith, nau haeyaudaunaunauau, haejaenauwu: nau haeedaunaudedaunauau hasenehenith.

⁴⁶ Hanaāegaugauudedaunee, hanaadee haudvasāthaa.

⁴⁷ Nau Hejavaneauthusaun, haeenauwu hanasethajauthee hedahenauau, haedana dāeyaunauau, nau haeauyejanauguna,

⁴⁸ Nau hanaāāedaunauau daun hanesedanaude nuu dāeyaunauau naneseedau-naa hadnesedanānau: nau daun nāsedanāde haudnesedanaude nājejenanādaune; daun javaānadavenuhunede haunauude nananena vahee nananede hadnaasevasāthaa.

⁴⁹ Nau Jaun hanaāauchuhanāedaunauau, Hechauhauthethāhe, neenauhauwaunauau hanesāde nenuguthaude haujaunau hee haneseede; nau needauduwaunauau, hanau dauhujenethaunānauau.

⁵⁰ Nau Hejavaneauthusaun hanaāāedaunauau, Jevadauduvaa hāhauwasānavāne nanesevānauau.

⁵¹ Nau hethauwuu, hāenauauchaunee hadneejejanauhudanāde, haechuwuyethāne hadnehaude Dādaunedan,

⁵² Nau haeautheava sayānee: nau hanaāejathāaunethe, nau hājedāthee hajasee hauauwudan Samaritans, hadnesaanudaunāde.

⁵³ Nau haejesedanaa, hanau dauyethaāsade Dādaunedan.

⁵⁴ Nau hāene hethaughādaunau James nau Jaun daunauhaudauwunethe nuu, hanaāenehenethe, Vahadāhene, gaujevadaunedauwaune heseda hadjejanauhusanauau hehethee hejavaa, nau hadnevadauchauthee, neesedaude Elias?

⁵⁵ Hau hanaāeyethaādausade, nau haeneneuva, Nananena hāhauwaenava daun va-dathau nananena hadahena, hathauhuk.

⁵⁶ Hanau Heau henane hehauwuujau hadnenauadede henanedanau hedenaededaunenenu, hau hadnenayauhaude. Nau hanaāeyehauthee jasaa hajasee hauauwudan.

⁵⁷ Nau hethauwuu, hajesethaugudethee vau, jachau henanene hathāhuk, Vahadāhene, nananenau hadnethaughathane nananene daun nananene hanasesanaune.

⁵⁸ Nau Hejavaneauthusau hathauhuk, Gauauwuauau neyāethee, nau neaheauau hejavaa nenauhuchaunethee; hau Heau henane heyauhuunee nedauusevānede.

⁵⁹ Nau hanaāenehethaude jachau, Jethauguhu, hau hathāhuk, Vahadāhene, nedauau nawaunejenanau nāsaunau.

⁶⁰ Hejavaneauthusaun hanaāēdauwunāde, Nanehajenanuthee gaujauaudahehehauau negaujauaudāhenethee: hau jathāau nananene nau haddauthedaude henajanede Hejavaneauthau.

⁶¹ Nau jachau jee, hathāhuk, Vahadāhene, hadnethauguhathane nananene; hau jechuwauthehe nedauau nawaunenaunenechauthaunauau, hanedauthee nayāenau naudauauwuu.

⁶² Nau Hejavaneauthusaun hanaāēdauwunāde, Hegau henane, dunauaugu thauauauwujethau, nau jaaāyangu, hehauwunaathā henajanedanene Hejavaneauthu.

10

¹ Nuū hee Vahadāde haeauthēava hauthauau nesaudausauau jee, nau haeyeyethauthēava hanenesenethe sayānee haunauude hedan nau vedauauwuu, haudnanādaunauusade.

² Henaheee hanaāenehethaude, Jenayaunau hethauwuwauthāe haneseuu, hau nesehāhehauau hajewauthathee: vevethahee nananena hee Vahadāde deseujenayauau, hadejejenanaude nesethāhehau hejenayaunaa.

³ Jathāauau nananena hathaāsana; naune nananenau janenanathana neānee waude haudāsaunauau hejee hauchāhee.

⁴ Jevanewuunauwuu nesevāejethāwaunau, newaugusajaānauthau, nau wauaunau: nau jevanaunenāthedaunaa henane hauvaunenau.

⁵ Nau daun hauauwuu nananena hadaujedānā, Dādauyauha nuū hauauwuu, nedauau hadeva.

⁶ Nau hith heau dādaunee hanedaulyaugaune, nananena hadādaunahedaunenau hadnaadaudauyānusaa: hau jene hadjaegauusedaunāna.

⁷ Nau vavade hauauwuu hadanedauva, hadevetheva nau hadevanava daun hayauhuhau hauchauvadenenau: hanau nesethāhe naunaudaunade. Jevaenejedāe hauauwuu.

⁸ Nau daun hedan nananena hadaujedānā, nau hesedanānagu, hadevetheva daun hayauhuhau hajenanauwunādaunenau:

⁹ Nau hadenayauhauva hasauwauvahehe daun hanedaude, nau hesau jeenanethāedauwunauna, Henajanede Hejavaneauthau hayāedasāna.

¹⁰ Nau daun hedan nananena hadaujedānā, nau jesedanānagu hadjajathāauva hasesana hehethēe hadaugauchaudāe hauauwudan, nau hesau jeenanesenehethauna,

¹¹ Daudause nauthejahathaugu nananena hadedanaunenau, heejahadāheagu, neyeseгаunuhudee nananena: hau nananena hadethauwaenava nuū, henajanede Hejavaneauthau hayāedasāna.

¹² Hau hadāedauwunathava, hadjavaānanethauayauau hena hesee hee Sodom, javaānee hee hena hedan.

¹³ Naunauthauau hadnauauchaudauna, Chorazin; naunauthauau hadnauauchaudauna, Bethsaida; hanau havathenayauthau heheenesedaudeneagu jedauwuu Tyre nau Sidon, nuū hasehana nananena, dajechauau neaunaunevethajauduuhewauchaudenenau, needanaugudaunee neachuwaudeneee naujuwau nau jaetha.

¹⁴ Hau hadjavaānanethauayauau hee Tyre nau Sidon hāenaudedaudaunee, javaānee nananena.

¹⁵ Nau nananena, Capernaum, hanejanana yesee hejavaa, hadjaejanauhaneē yeseē hadauveeyauau.

¹⁶ Daun hajaathehādaunenau nananena hadjaathehānau; nau daun hauwauchānavādaunenau nananena haudwauchānavānau; nau daun nauwauchanavāde hadwauchanauwaude najejenanādaune.

17 Nau nesaudausauau haejaenusanauau nauuu neethajaude, hanaāēdauwunauthee, Vahadāhene, daudause haujaunauau hanechauwauaunaunauau hee nananene haneseede.

18 Nau hanaāēdauwunāthee, Nenauhauwauau Haujau waude jahagude hasejanesaa hehethēe hejavaa.

19 Naune, Nananenau vanenathana nananena naudahede hadnauguhudaunauna seseyānauau nau hauwauhaudathee, nau nanadee vahee henaudahede haujau: nau hegau hadneaseneva.

20 Hau vahee nuu jevaneethajaudauwu, haujaunauau dauchauwauaunauna; hau henauthauneneethajauau hanau nananena haneseedaunenau dauwauthaunauhuu hejavaa.

21 Hena hāauchauau Hejavaneauthusau haeneethajaune hevadathuwu, nau hanaāenehede, Nananenau vaveenethedaunathane Nananene, Hau Nāchau, Vahadāhene hejavaa nau vedauauwu, hanau Nananene dauyadaunaude nuu hayauhuhau hehethēe nadaunahehehauau nau hathauwunanenauau, nau hadnauhauthehauva dāeyaunauauau: hethauwu, Nāsaunau; waude hethadee nananena hasesānenau.

22 Vahee hayauhuhau vanenānau Nāsaunau: nau hegau henane haenauna hanaadāne Heāhene, vavade Vāsaunau; nau hanaadāne Vāsaunau, vavade Vāa, nau nananede hanaadāne Heāwaune hadnenauhauthehāde.

23 Nau hanaāējaedaugauhauwaude hethauguhādaunau, nau hanaāanadethaude hevenanee, Haunauwuthajaunauha hasesānenau dauhunauhauwuna hayauhuhau hānauhauthaunenau:

24 Hanau nananenau hāedauwunathana, waunauthathee haeyāhehauau nau nenauchuwuthee nevadaunauhauduu hena hayauhuhau hānauhauthaunenau, hau hehauwuthauunauhauwau; nau devadaunedauwauduu hena hayauhuhau hānedauwauthaunenau, hau hehauwunedauwauwau.

25 Nau, naune, jasaa nanavaavehe haetheaugu, nau haenaudayādauna, Hechauhauthethāhe, nauddusesedane jethaujenee henaedede? hathauhuk,

26 Hanaāēdauwunāde, Hayew wauthaunesaa nanavaavedaunaa? Hādusasauhaude nananene?

27 Nau hanaāēdauwunaude, Nananene hadvechauthau Vahadāde nananene Hejavaneauthau nauuu vahee nananene hadahaa, nau nauuu vahee nananene hadathuvaa, nau nauuu vahee nananene hadāahedaunaa, nau nauuu vahee nananene haugaugauuthajaudenaa; nau nananene hanedaudewau waude nehayau nananene.

28 Nau hanaāēdauwunaude, Nananene hethauvāne: nanehasedaune, nau nananene hadnenaedene.

29 Hau nananede, vanadauchuvanadede, hanaāenehethaude Hejavaneauthusaun, Nau hanaa nanedaudewau? hathauhuk,

30 Nau Hejavaneauthusau hanaāauchuhanāedauwunaude, Jasaa henane haejathāau hehethēe Dādaunedan hese Jericho, nau haeesedanaa havedehehau, haethauwujedanaa hedāchaunau, nau haenesenehaa, nau haejathāaunenau, haenauthaa dauhayānaja.

31 Nau haejathedasaa jachau vevethahevahew hehethēe: nau hāenauhauvāde, haejavechauthaa gauchuhunee.

32 Nau vavade Levite, hāedadauau hadaunith, haeda sa* nau haenāuhauva, nau haejavechautha gauchuhunee.

33 Nau jasaa Samaritan, daujādade, haedasa hadaunith: nau hāenauhauwaude haauwunauna,

34 Nau haeyehau, nau haedugudauna hadaunenesenith, haedaunauwuna javeda

* 10:32 Two words across a page (“haeda” and “sa”) perhaps should have been hyphenated, giving “haedasa” which, together with “haedasaa”, occurs eleven times elsewhere in the text. There are no other occurrences of “sa” standing alone.

nau vasevenenaje, nau haedasana nehayau hedauneau, nau haenauuchauha vethehedaunauauwuu, nau haeaunauneha.

³⁵ Nau daunauganenee hāejathāaude, haeadane hanesanenee hevāejethāwau, nau haevena hadāhevahew, nau hadaunaunehau, hathauhuk; nau daun hasegaujauau-thedanānaune jee, hāejaenauusanaune nananenau hadaunaudaunathane nananene.

³⁶ Hayewnau nuu hanasāe, hadeanathaunau, henedaudevādaune henee neesedanāde havedehelhau?

³⁷ Nau hanaāāedauwunaude henee heauwunaunādaune. Hanaāenehethaude Hejavaneauthusau, nau jenaenesedaune nananene.

³⁸ Wauhā hethauwuu, daunausujavesathee, haenauusanauau jasaa hajaseehauauwudan: nau jasaa hesā haseagu Martha haejedana hedauauwunin.

³⁹ Nau haenahavāe Mare haseeyaugaune, jea haejanaugude Hejavaneauthusaun heauthene, nau haenedauwaude hedanadedauene.

⁴⁰ Hau Martha haedauwauchune dauwauthanee hasedaude, nau haejeedasa, nau hanaāenehethaude, Vahadāhene, gauhajegaudauvanade daujenauthānau nahavaa daunesenesethānau? hāedauwunene hadenedahevānau.

⁴¹ Nau Hejavaneauthusau hanaāauchuhanehethaude, Martha, Martha, nananene haunaunāhene nau dejanethajaudauwu waunauthāe hayauhuhau:

⁴² Hau hanesadee hayewhu chaunaugauau: nau Mare hayāchauhauau henee het-hadenee hadāde, hehauwuneejathechauhau nauthee.

11

¹ Nau hethauwuu, henee, daunausuvevethahede haedaunanenee, hāejenedaude, hanesāhenith hethauguhādaune hathāhuk, Vahadāhene, jeechauhauthehāa hadnesevevethahee, waude Jaun jea neesechauhauthehaude hethauguhādaunau.

² Nau hanaāāedauwunaude, hāene nananena vanevethahenā jeenanesehena, Hāsaunaunene Nananede hanedaude hejavaa, Vadanauha Nananene haneseede. Nananene hanajanede hanājaunauau. Nananene hathanavāane hadnaasedaunee hasauau hejavaa, nau jee nuu vedauauwuu.

³ Hejevenāa hadauchusenee hayauwusenee vethewau.

⁴ Nau jejaegudanauwunāa hewauchudaudenedaunau hanau nechau nejaegudanauwunade haunauude hanesāde nethāesayānedanauwunāade. Nau jevaechauhāa nedauvasehadee; hau haugaunayauhāa hehethee hadau wausauau.

⁵ Nau hanaāāedauwunaude, hanaa nananena hadnenedaehahede, nau hadneyehaude thaudajaa, nau hadethaude, Va, jeehe hanasāe jauaujaunau;

⁶ Hanau nādae daunauujādaunānau, nau nananenau haeyauhuunee nachauwaude?

⁷ Nau hehethee jedauwuu hadnauchuhanehede nau hadnenede, Jevajanethajuhu: dajanau wauwu haugauhude, nau nanesaunauau nanejauwu naudauvaa;* nananenau nāhauwuneethauwauthe nau hajeneevenathane.

⁸ Nananenau hāedauwunathana, hadnehauwuthauwauthene nau hadvenāde hanau dauhunedaehāwaude, auhanau dauneenāhede hadthauwauthenith nau hadvenāde daun hadauchuvathehāthe.

⁹ Nau nananenau hāedauwunathana, Henedauwauau, nau hadnevenana; henaude-thāe, nau hadnevedena; hewaūdāhee (dajanau), nau hadnegaunedanauwunana.

¹⁰ Hanau haunauude hanesāde nethāenedauwaude neneaudauwaude; nau henee nenaudethāde neveenauau; nau henee newaūdāhaude (dajanaune) hadgaunanauwunade.

* **11:7** Mid-verse punctuation could be either a colon or semicolon as the lower part of the punctuation is malformed. It was decided to use the semicolon, in line with the KJV, as the punctuation of the two texts often coincides.

11 Hith hāahenau nedauwunānagu jauaujaunau jasaa nananena henesaunaune, gauhadvenaa hauunaugane? wauāthe nedauwunāhuk nauwu, gauhadvena hauchuha-nee gauhadnanene nauwunenith seseyāne?

12 Wauāthe nedauwunāhuk naunau, gauhadvena hauwauhaudanethe?

13 Hith nananena, hauhauganenagu, hadaenava hadnesevenauna hethadenee venadedaunau nananena hadāeyaunevenau: duthāee nananena hejavaa Hāsaunaunenau hadvenāva Vadanauwauthauwu nethāenedauwunauna?

14 Nau neausāguthaude haujaun, nau heehauwanadene. Nau hethauwuu hāejathāaude haujau, hanaāejaanadede; nau henanedanede haegaugauuthajaudene.

15 Hau jasaa hahagu, Nausāguthaude haujaunau heee Beelzehub najane haujaunaa.

16 Nau hauthauau, haenaundayādaunaa, haenehethaa hadnauhauthaudenenee hehethee hejavaa.

17 Hau haeaeene hedenethajaudenene, haeāedauwuna, Hadauchaa najanede nanayāsenauaugu nehayau hadneyauhuu; nau hauauwuu hasānavadenaugu hauauwuu hadjanesaa.

18 Hith, Haujau jea hasānavadagu, hauddusetheaugune henajanede? hanau nananena denehena nananenau deausāguthaugaunee haujaunauau hehethee Beelzebub.

19 Nau hith nananenau hausāguthaugaunee hehethee Beelzebub haujaunauau, hanaa hāahenau hadnausāguthaude? hadedauchuwuwuna.

20 Hau hith nananenau hejadenethedaunaugu Hejavaneauthau hausāguthaugaunee haujaunauau, hethauwuu henajanede Hejavaneauthau hedasāna.

21 Henane danāahethe hedauchuaunau haunaunedehuk hedauauwuu, hevatheyau-nau nedādauyaunee:

22 Hau hāejavaādāāhenethe javaāhehuk hedasāhuk, nau veavehāhaugu, hadnedanauwunāde vahee hedauchuaunau heaanadauwaudenau, nau hadjaanenee hesehaudenau.

23 Daun najenethaunāde hasānavānau: nau daun najenethauāyāvāde naneāsauauwaude.

24 Hāenauthaethe wauchāde haujau henanene, nehedesade hadaujenajenenee, denaudedede dauyānusenade; nau janeveedethe, naneenehede, nananenau hadjaesanau naudauauwuu needaujenuahenau.

25 Nau jaenauusathe, neveedede nesewaudeauhunee nau neyauauthaunenenee.

26 Naeneejathāaude, nau naneedanauwaude hanesaudauchunethe hauthauau haujaunau javaānauhauganenethe javaāhede; nau nanejedāthee, nau nanejanauguthee: nau waunee henee henane naeneejavaānauhauganede nedauaunejeethāde.

27 Nau hethauwuu, hajeseanadede nuu hayauhuhau, jasaa hesā hehethee henanedaa haevasanade, nau hathauhuk, Hauwunaunade henesaunehe hājanesauthāde Nananene, nau hethanau nedaunenane.

28 Hau hahagu, Haa, nausunee, nauwunaunathee nethāejaathededuu hedanadedaunene Hejavaneauthu, nau naunaunedethee.

29 Nau henanedanede hāeneenanauthenanedauhuu, hanaāejasesenehede, Nuu nanaa wausauau henaedede: nevadaunauhauthāthee; nau hegau nauhauthaude hadvenau-nauau, hau vavade nauhauthau nananede Jonas haeyāhe.

30 Hanau Jonas neesenauhauthaude Ninevites, nechau jea Heau henane had-naathāde nuu henaedede.

31 Nenauchuwusā janauhuu hadjaegauhāde naudedaunadenesee nauguu henanenau nuu henaedede, nau hadnauthauwuvāna: hanau dejewaunejaatheaude hehethee hāauauvadenee naunaudāhenith Solomon; nau naune, hejavaāhedaune Solomon hanedaunith.

32 Henanenauau hehethee Nineveh hadjaegauhāthee naudedaunadenesee nauguu

nuu henaedede, nau hadnauthauwuvāna: hanau dauaugauthethajauduu hedau-thedaunene Jonas; nau, naune, hejavaāhedaune Jonas hanedaunith.

³³ Hegau henane, hāesedeauchauuu nauauuthayau, hehauwujenane yauthee, daudause hehauwugaudauyauvasenaunaa, hau dasee nauauuthayauneetheaugnee, nethāejedāthee hadnenauhauduu naunauasādane.

³⁴ Hanesenee vadanayannaa nanaa nevasesānee: nanaa hāenesadee hasesānenau nananena, nananene hadnaunauudauyauau hadanayau jea hanechauchaunaa hese; hau hāene nananene hasesā wausuu, hadanayau jea hadnechauchaunaudene vaneeyauau.

³⁵ Haunauyauhaudauwauau hanau henee hesee hathāsadaude nananene jeva veeyauha.

³⁶ Hith nananene haunauudauyauugu hadanayau hanau hadnechauchaunaudene hese, hadnehauwugauveeyau haunauude hadnechauchaunaa hese, waude nau-nauasādāe nauauuthayau nevenāna hese.

³⁷ Nau hajesanadede, jachau Nesethajauhu haeadethaa hadnethevethewau: nau haewaunejedā, nau haejanaugu dauvethede.

³⁸ Nau hāene Nesethajauhu nauhaudauau, haegaudauvanava daujaheseuhunith nedauau hajesejevethenith.

³⁹ Nau Vahadāhenith hathāhuk, Hewaunehaa nananena Nesethajauhuhauau neyauthahenauwuna jathee vāenaunau nau saenaunau; hau nananena hethauvaa hanechauchaunaudena vahedayaude nau hauhauganede.

⁴⁰ Nananena janethauvahena, gaujenane Hejavaneauthau nenesedede jathee gaujee henesede jedauwuu?

⁴¹ Hau hevāe hauwuyau daun hanetheyaunenau; nau, naune, vahee hayauhuhau hadnesewaudeanauwunana?

⁴² Hau naunauthauau hadnedasāna nananena Nesethajauhuhauau, hanau nananena hadvāna vadadauchu wauhaunauau nau naneujaudevejechau nau vahee hathāejajāesuu vejechau, nau hadjavechaudauwuna vavesauchuwude nau devechauthade Hejavaneauthau; nuu hāvachunaasedauna, nau hānanejenaudauwuna hauthauau nejesehee.

⁴³ Naunauthauau hadnedasāna nananena Nesethajauhuhauau, hanau nananena de-vechaudauwuna najatheaugudaunau jedauwuu vevethahenauauwuu, nau dejachau-thana nedauaudaunauvadee.

⁴⁴ Naunauthauau hadnedasāna nananena, wauthaunauhāhehauau nau Nesethajauhuhauau, nanadaunahena, hanau nananena waude nedaugaudauyauhudaanee dejenauhauwuu, nau henanenauau nedasejavesathee hehauwaenaunā.

⁴⁵ Hanaāauchuhananadede hanesāde nanavaavehe, nau hathauhuk, Hechauhauthethāhe, nuu dauhanadene nananene naunaunauthevāana jea.

⁴⁶ Nau hathāhuk naunauthauau hadnedasāna nananena jea, nananena nanavaave-hehauau, hanau nananena henenauchuna henanenauau nauguu henenauchude hehayaudee javechauhunee, nau nananena nehayau jevavasanauwuu henenauchudaunau hee hanesadee nananena hajadenenau.

⁴⁷ Naunauthauau hadnedasāna nananena, hanau nananena denesedaunauna gaujauaudahenauauwu haeyāhehauau, nau hāsaunaunenau denauauthee.

⁴⁸ Hethauwuu nananena haeyāna henee nananena wauhaunee nanāsedauthee hāsaunaunenau: hanau denauauthee, nau nananena nenesedena hegaujauaudahenauauwunenau,

⁴⁹ Naasauau jea hahagu hedaeyaude Hejavaneauthau, Hadjenanu haeyāhehauau nau vadauhanauau, nau hauthauau hadnenaathee nau hadnenaunaunauchauthethee:

⁵⁰ Henee hevaevenau vahee haeyāhehauau, hanedaunee hehethēe davadeesehee vedauauwuu, hadneenaudedauwuhuu nuu henaedede;

⁵¹ Hehethēe hevaevaa Abel nauuu hevaevaa Zacharias henee nenajaa nahethāe jaanaa nau vadannauauwuu: hethauwuu nananenau nehethathana nananena, hadneenaudedauwuhuu nuu hee henaedede.

⁵² Naunauthauau hadnedasāna nananena nanavaavehehauau, hanau nananena dauhudanauwuna gaunaudauauha haeyaude: nananena hadnehauwujedāva nehayau, nau henee hathāejedāthee nananena najauaunauna.

⁵³ Nau daunenehedauau nuu hayauhuhau yeseē, wauthaunauhāhehau nau Nesethajauhuhauau hanaējaseseneenanaudedadaunāde, nau haeneenadaunanauau hadnau-thedaudauwunith hauwauhuu hayauhuhau;

⁵⁴ Haeaudenauthaa, nau hadnesedanauwunethe hayewhu hehethēe hedenene, hadnāedauwauthaethee.

12

¹ Gaunauwuu, hāene hena hauāchaudeneē hauānee haejedaguu hadauchaā henanedanede, dauwauthaa haeanauguhudaunadenauau, hanaējasesāedauwunaude hethauguhādaunau nedauau vahee, Haunauyauhaudauwauau nananena gauhaujau Nesethajauhuhauau, nenadaunahethee.

² Hanau hehauwuyauthesa, hathāeyauthesaa, daudause hehauwuyauthesa, nethāejaenaunee.

³ Hanau daun nananena hasanadenā veeyaugu hadnedauwuhuu hesenee; nau henee nananena hasenehenā waunaudaunuu jedauwuu hadnauchunana dasee hauauwuu.

⁴ Nau nananena hāedauwunathana Nādaehauhauau, Jevaesaa henee nenadethee henanedayāhau, nau hee hehauwauthesedaunauau.

⁵ Hau nananena hāedauwunathana daun nananena hāchaunenau: Hesaa Naa, hee hesenaānagu naunaudāde hadgauusevāna hadaugauhauchanee; haa, Nananenau hāedauwunathana nananena, Hesaa.

⁶ Hayauthaunethee hajaseaheauau gujeaudaunaune hee hanesāeneē nevaāheneē, nau hanesāde hehauwunauneethedaunā Hejavaneauthu?

⁷ Hau daudausee hadauchāe hāthaanenau haudauguhuanenau vahenayāee. Jevanāthajauau henaheee: nananena javaānauwauhuana hadauchtethee hajaseaheauau.

⁸ Jea Nananenau hāedauwunathana, Daun naujaudauthehāde heseē henanedaa, nananede Heāhene henanene jea hadnehauwaudauthehaa heseē hautheaunau Hejavaneauthuu.

⁹ Hau henee nauyauhāde heseē henanedaa hadneyauhade hathaāhenethe hautheaunau Hejavaneauthuu.

¹⁰ Nau daun hayādaunaude Heāhene henanene, hadjaegudanauwunade: hau nananede heneē hauhauganedauau Vadanauwauthauwu hadnehauwujaegudanauwunau.

¹¹ Nau hāejedanānā vevethahenauauwuu, nau hauchuwunanenauau, nau najanauau, jevagauguanadauwuu wauāthe daunhayewhu nananena hadnesauchuhanehena, wauāthe daun nananena hadnesenehena:

¹² Hanau Vadanauwauthauwu hadnāedauwunāna nauauchaugu daun nananena hadnesenehena.

¹³ Nau hanesāde hehethēe hananedaa hathauhuk, Hechauthethāhe, hanadesene nasaa, hadegauguanauwaunauau vathayaunau.

¹⁴ Nau hathāhuk, Henane, hanaa nanesehāde hadnauchuwuhathane nau hadjaanauwunathane nananene?

¹⁵ Nau hasenehethauhuk, Haunauyauhaudauwauau, nau naseduhuu jevavathehāe: hanau henane hedenaedede hehauwunedavevaa wauthayāgaune hevathayaunau henetheyaunau.

¹⁶ Nau haeanaadetha haejegausudenanadetha, Vedauauwuu jasaa nethauyāsenane haenauthauthā:

17 Nau hasethajauhuk nehayau, hewauau hauaudnesedaunaune, hanau hajanethenauwau jedauwuu hadnedauthānauwau navethenau, hahagu?

18 Nau hanaāenehede, nuu hadnaasedaunau: hadthauwunauwau nathāyānauauwuu, nau hadnesedenau hadjavaāvasauau; nau hadnaadauthānauwau vahee navethenau nau navatheyauau.

19 Nau hadnaāenehethauau navadathuwu, Vadathau, nananene nanethenauwu wau-nauthāe hanetheyaunau janenanee hadwauthāe jajene; hedanau nanethauaunenaede, hevethehe, hevaveyā, nau haunauwunaede.

20 Hau Hejavaneauthu hathāhuk, Nananene Hauhauga, nuu dauveeyauau nananene havadathuwu hadnedauwunane: heee hanaa hadnethenauau hajanayaunau?

21 Nananede haenathaunau heveaunauaudenau, nau hehauwuveaunauau hese Hejavaneauthu.

22 Nau hathauhuk hethauguhādaunau, Naa nehethathana, Jevaegaugauanadauwuu hadenaededaunenau, daun hadnevethedaunenau; daudause heee hadanayaunenau, daun hadnāsaunenau.

23 Henaedede javaāsaa vethevaa, nau vadanayau javaāsaa hāchaunaa.

24 Gaugauanavaa huunauau: hanau dejejenayāthee nau dejegauausauhāthee; hehauwunethenauwu thāyānauauwu nau vethewau nedauthāsanenee; nau Hejavaneauthu nauchauwaude: gauhajavaāneenaede va neahenaa?

25 Nau hanaa nananena vanadauanāde heee neejahehee?

26 Hith nananena wauhā jeneenesedaunagu henee haugajuhuu, naudu hajanethajaudauwuna hauthauau?

27 Gaugauanadauwuu nenaugaānuu nejajaesaānuu nesevesee: hehauwunethānaunau, hehauwunethaudayānaunau; nau nausenee nāedauwunathana, henee Solomon vahee hevasāthade heehauwunaasenu hasaunee nuu.

28 Hith wauhā Hejavaneauthu heneenudehuk wauchuunau, nuu desenee nauau, nau naugaagu hadneewaudeadaunenee; hāduthāejavaāvenāva hāchaunau, Hau nananena vanehaa hethauwuthajauna?

29 Nau jevanaudedee nananena daun nananena hadnevethedaunenau, wauāthe daun hadnevaveyādaunenau, jevaauwaugaugauuthajauau.

30 Hanau vahee nuu neauthudan hathāauauvaa nenaudethāthee: nau nananena Hāsaunaunenau haenauau henee nananena hāvathehādaunenau nuu hayauhuhau.

31 Hau henaudedee nananena henajanede Hejavaneauthu; nau vahee nuu hayauhuhau hadnethedaunanauwunana nananena.

32 Jevanāthajauau, hāhauwuauthaheva; hanau nananena Hāsaunaunenau hayethanadauwunādaunenau hadvenāna henajanede.

33 Heaudaunaa henee hanetheyaunenau, nau hauwunaunaa hadavenuhuhauau; jasedauau nesevāejethāwaunau henee nejethauuthauauchusāe, haenathaude hane-duu hejavaa henee nejethauuyauhuu, nedaujavedadenee, hehauwujuudenauau nuvanauauau.

34 Hanau haduu hadaenathaunenau, hena hadahenau jea hadnaaduuu.

35 Duujehee, nau haunauauuthayaunenau gauhauchanauha;

36 Nau nanehathahena henanenuu henee nedauyauhauwauthee hanau Hada-hethedaunādaunenau, hāejejaesathe hehethee gauwuhaude; henee hāejenauusathe nau hadwaudāhaude, hadgaunanauwunade nauhauhaunee.

37 Hauwunaunaa henee nesethāhehauau nananenethe, Vahadāde hāejenauusathe hadveenaude hadnaunauyauhauthānehe: hethauwāedauwunathana, hadduujede nehayau, nau hadjanauguhaude hadvethehenethe, nau hadjeedauchaude nau hadnau-nauchauwaude.

38 Nau hith jenauusahek naneseauwaude haunauyauhauthāhe, wauāthe jenau-usahek naneseauwaude haunauyauhauthāhe, nau hadveenaude hadnesaanunethe,

hauwunaunaa henee nesethāhehauau.

³⁹ Nau nuu hāenauwuu, henee hith henane hedauauwuu haenauaugu daun hāauchaunee havedehew neenausanith, haunaunauyauhauwaude, nau hanājechuwauthedaunenauhunee hedauauwuu.

⁴⁰ Nananena hadnaaesaaunana jea, hanau Heau henane hadnauusade daun hāauchaunee hāejenauanauwaunā.

⁴¹ Peda hanaāanadethaude, Vahadāhene, gauhanadethāa Nananene nuu heee jegausude wauāthe vahee?

⁴² Nau Vahadāde hahagu, Hanaa henee chuvahagu nau hesenaedehuk hadāhevāhe, nananede hadāhewaunādaune, hadnevenaude gauuu vethewau nauauchaunee?

⁴³ Hauwunaunaa henee nesethāhe, nananenith hadāhewaunādaune hāedasāthe hadveehāde hadnaasehāde.

⁴⁴ Hethauvaa hathāedauwunathana, henee hadnesehāde hadāhewaude vahee hethāenetheyaunau.

⁴⁵ Hau nau hith henee nesethāhe hesethajauhuk, Nadāhewaunāde jeguthenauusahek; nau henenese gauhahek henanenau nesethāhehau nau hesānau, nau hevethehagaunee nau hevaveyāhaugaunee, nau henaunauneseavagaunee;

⁴⁶ Hadāhevāhe henee nesethāhe hadnauusanith hajesesenenee hāejejauwuwuhauthe, nau, neejaenauau, nau hadgudanāde nau hadjenanaude jethauwaudahehau.

⁴⁷ Nau henee nesethāhe haenauaugu hadāhewaunādaune hathanavāde, nau jesaanuhuk, daudaus dejesedaude hathanavāthe hadnenenesegauhude dejauaunee.

⁴⁸ Hau henee jaenauaugu, nau hesedauhauk nesenenese guhededaunenee hanājauwaunenese gauhude, hanau daun hauwauhuvenāde nananede hadnauwaunedauwunade; nau nananede henane hauwauhauhauthade, nananede hadnauwaunedauwunade.

⁴⁹ Hadjejenanauwau heseda dasee vedauauwuu; nau hayew navathehāde wauwu gauhauchagu?

⁵⁰ Hau nanethenauwau dusaahede hadneedusaahedaunee; nau hanahauwau dauaunānau haunaude hesedaudeyāgu.

⁵¹ Haneējaude hadjenanauau dādaunee vedauauwuu haāthanaveva? hadāedauwunathava, Hegau; hau wauāthe hanāgauanauwau:

⁵² Hanau hehethee heee yauthaunenanaedauneagu hanesadee hauauwuu hadgaaunee, hadnasaunauthee hanesenethe, nau hadnesaunauthee hanāenethe.

⁵³ Henesaunaun hadgauanathee hadnasānauwaude heau, nau heau hadnasānavāde; hesā hadnasānauwaude hedaunau, nau hedaunau hadnasānavāde, hesā hesave hadnasānauwaude, nau hesave hadnasānavāde.

⁵⁴ Nau hanaāanadedauau jea henanedanede, hāenauhaudauwunā henaunauade jevechauhaugu hehethee nesenaesade, chauchaunu nananena, Hadnauchuhauwauwau; nau naenesauau.

⁵⁵ Nau hāenauhaudauwunā jenauhuu hanehedasāe, nananena, hadnasedaa; nau naenesauau.

⁵⁶ Nananena nanadaunahena, nananena naenauwuna hedauchaveau haunauau nau vedauauwuu; hau dusaudee haejaenauwuna nuu hewaunehaa?

⁵⁷ Haa, nau naudu daudause nananena haejaenauwuna hasethadee?

⁵⁸ Hāeyehauthānā hasānavādaunenau hauchuwunanenau, nausujavesanagu, nayātheneneevaa hadeenayauhāna; havaehauthāva najanauchuwunanee, nau najanauchuwunane havavena duguthāhew, nau duguthāhe havathānāva duguthānauwuu.

⁵⁹ Hāedauwunathana havajeneenauthauva, haunaude vathaunaudauhunagu havāejethāvenau.

13

¹ Hena hethaa hee jachau haeauthedaunaa Gananeans, hevaewu Pinade hae-wauhaunauwuaunenau nedauausāyāthee.

² Nau Hejavaneauthusaun haeauchuhananadethā, Nauchāe nananena henee nuu Gananeans heauhaugayaugaunee javaānee vahee Gananeans, hanau daujeneetha-jauduu hayauhuhau?

³ Nananenau nāedauwunathana, Hegau: hau, vavade nananena jaaugauthethajau-nagu, nananena hadnavahethahena gaujauaudahede.

⁴ Wauāthe hena nasaudauchunee, dasee hayauauwuu jedauwuu Siloam dethauwu-nauauau, nau haenanaā, gaugauanadauwuu henee gauhujavaānauhauganenauau vahee henanedanede henee theaugude jedawuu Dādaunedan?

⁵ Nananenau nāedauwunathana, Hegau, hau vavade nananena jeneethajauhadede, nananena hadnavahethahena gaujauaudahede.

⁶ Haeheanade jea nuu dajenehede; Jasaa henane haenethena hauuyauchunauhau-dene haejenana jedauwuu dadajevenevese nethauchayaunaa; nau haejenauusa nau haenaunaudede vevenaundenau hanāvenee, hau haejeveede.

⁷ Hanaāenehethaude nesethāhew hedadajevenevese nethauchayaunaa, Naune, nuu hanasāa jajene nananenau hanejaunau daujenaudedenu vevenaundenau nuu hau-uyauchunauhaudee, hau hajeveedenau: dauwauhune; hadevachunauthauyauau vedauauwuu?

⁸ Nau hanaāauchuhanadethāde, Vahadāhene, hauwaa nanehasene nuu hee jaje jea, nadeesenenesede, nau vehethe hadjenanauwau.

⁹ Nau hith hāvāgaune vevenaundenau neee: nauhith jene, hadnaāedauwauhade.

¹⁰ Nau haeechauhauthethā jasaa vevethahenauauwuu vadanesee.

¹¹ Nau, naune hena hesā haujaunehaeheaugauwu nasaudauchunee jajenee, nau haevajanā hauānee, nau haejeneechuwuwauthe nehayau.

¹² Nau hāene Hajavaneauthusaun nauhauwaude, Haedetha, nau hanaāāedauwunaude, Hesā, nananene haunaugunane hehethee hadaugauwudaunaa.

¹³ Nau hanaāēvasanaude: nau chauchaunu hanaāechuvāde, nau haevaveenethedauna Hejavaneauthu.

¹⁴ Nau hauchuwunane vevethahenauauwuu haeauchuhananade nauguu hasenau-naude, hanau henee Hejavaneauthusaun denayauthānith vadanesee, nau haeautheda henanedaa, Hena nanedauchaē hese henane heenesethādaunau hanānaneējauna nau hanānaneenayauhana, hau hegau vadanesee.

¹⁵ Vahadāde hanaāauchuhananadethaude, nau hathauhuk, Nananene nanadaunāhene, gauhājene dajee hanesahena vadanesee haugunauva hauwaugajevenau wauāthe nau-gauchaudaheauau hehethee hewauchuhauchauwauauwuu, nau gāyethaājethauva de-vanauhauna?

¹⁶ Nau gaujenaasaunee naa hesā, hedaunau Ābraham,* henee Haujau heduguthaune, naune, nuu nasaudauchunee jajene, hāaugunade hehethee nuu deduguhude vadane-see?

¹⁷ Nau hāenehedauau nuu hayauhuhau, vahee hejauthauwau haeaudaudāhenenau: nau vahee henanedanede haeneethaujudene hee vahee havathee hayauhuhau he-nee hesethaunau.

¹⁸ Hanaāenehede, dusaune henajanede Hejavaneauthau? nau hayew naudnene-hethau?

¹⁹ Waude nejenanenee mausdaude, henane nedanauau, nau neneāgudede hejenayau-naa; nau neveseaudede, nau hāhe haeavadauhaudene; nau neahehauau hejavaa negauser hedānaa.

* **13:16** “Ābraham” is spelt thus once in this verse and spelt “Abraham” thirteen times elsewhere in the text. It is not known whether the spelling differences have any grammatical significance.

20 Nau jea hanaāenehede, Hayew naudneedajenehethau henajanede Hejavaneauthau?

21 Waude nesaunauchaa henee hesā nedanauau nau nejenanauau nasau dejenauhunee thauauhanau haunaude devahenesaunadāe.

22 Nau haehedesa hauwauhauauwudane nau hajasedan, dechauhauthethāde, nau haejāda hese Dādaunedan.

23 Hanaāanadethāde hanesāhenith, Vahadāhene, gaujewauthanauau henee henayauhathee? Nau hanaāāedauwunaude,

24 Neaunedauwauau hadejedāna hadaugaugunesāde dajanau: newauthana, Nanane-nau dāedauwunathana, hadnenaudedena hadnedaujedāna, hau hadnehauwunedaauva.

25 Hāene hechauhauthethāhe hauauwuu thauwauthehuk, nau haugauhahagu dajanaune, nau nananena hanānaāetheauguna jathee, nau hanānaāewardāhauna dajanau, hanānaāenehethauna, Vahadāhene, Vahadāhene, jegaunanauwunāa, nau hanānaāauchuhanehethāna nau hanānaasenehethāna, Hāhauwaenaunathe daun hadesane:

26 Hanānaāenehethauna, Nevethehenauau nau nevaveyānauau hathaāhene, hau nananene dauthedaunāanehadaugauchadee.

27 Hau hadnaasenehede, Hāedauwunathane, Hāhauwaenaunathe daun hadesane; nayāsesave vahee nananena nesethāhehauau wauwauchudaude.

28 Hena hadnevewauhudaunee nau hadnegaugauchaugudasenana, hāenauhauwaunā Abraham, nau Isaac, nau Jacob, nau vahee haeyāhehauau, Jedauwuu henajanede Hejavaneauthau, hau nananena nehayau nenuguthadena.

29 Nau hadjenauuchaudenee hehethē nejeethevesesanith, nau hehethē nesenaesanith, nau hehethē nanavee, nau hehethē janauhuu, nau hadjanauguduu hena-janedaunene Hejavaneauthu.

30 Nau, naune, hena hedauaude hadnedauvade, nau hena nanedauvade hadnedauchude.

31 Hajesesenee hena haejenauusa jasaa Nesethajauhuhauau, hasenehethāhuk, Nauahe, nau jathāau, hanau Herod hadnaāne.

32 Nau hanaāāedauwunāthee, Najesaa, nau hadāedauwunauva hena vachuhuu, Naune, nenuguthu haujaunauau, nau nenayauthānau nuu desenee nau naugaagu, nau nanaseauwauau hese hadnaāesedaunau.

33 Hau hadnenesanau nuu desenee, nau naugaagu, nau jea hathavenaugaagu: hanau hehauwunaasau henee haeyāhe denaade Dādaunedan.

34 Hau Dādaunedan, Dādaunedan, nanathee nenauauthē haeyāhehau, nau nenauchauwathē hauunaugāe henee hejejenanauwunaudenenau; dauhudauchu naudnauāchauhanauau nananena hadāeyaunewauau hauānee waude neauthuneahee dauānaude henesaunau hethauvaa hethaenaa, hau hāhauwuvatthehāva.

35 Naune haudauauwunenau, naunaudauwunana hadnadauyewu: nau hethauwuu nāedauwunathana, Nananena hadnehauwunauhauwuva haunaude nauauchaugu had-neenehena, Hauwunaunaa henee jaunaude hee heneseedaunene Vahadāhenith.

14

1 Nau hethauwuu, daujedāde hedauauwunene hanesāhenith najane Nesethajauhuhau hadvethee jauaujau vadanesee, henee haeaunauyauhauvaa.

2 Nau, naune, hena jasaa henane hathaāhede haenenesaunenauau.

3 Nau Hejavaneauthusau haeauchuhananadetha nanavaavehehau nau Nesethajauhuhau, gaujenanavanau henayauthaude vadanesee? hāthauhuk.

4 Nau haedādaunaugunauau. Nau hanaāedanaunith nau haenayauha, nau haejenana;

5 Nau haeauchuhananadetha, Hanaa hedauneau naugauchaudahehau wauāth waugaje janesenayaugaune hadaundaunadenee, nau gauchauchaunu gauhadnau-guthauva vadanesee? hathauhuk.

⁶ Nau haeyauhuune nesenehethauthee jea nuu hayauhuhau.

⁷ Nau haedadajenehetha henee hathāadethavathe, hāenauhauwaude hasayāchauhauwunethe najatheaugudaunau; hanaāāedauwunaude,

⁸ Hāene nananena hadethaunā henanenauau gauwuhaudeneagu, jevajanauguu najatheaugudaunaa; havajavaānethā henane havajavaāheva henee hadethade;

⁹ Nau henee hadethāde nau nananede hadjaude nau hadnethāne, Venene naa henane hadehedaugu; nau nananene haddayāhene janaugunenagu hesaudavaa.

¹⁰ Hau hāene nananene hadethanenagu, haddeyehau nau hadjanaugu hesaudavaa henee hāene hadethāde hadjaude, hadethāne, Va javesa; hadnaāene nananene vechauthānaune henee hanethevethehevādaunauau.

¹¹ Hanau daun nanajathajau nehayau hadnausādauaude; nau henee nausādauauadede nehayau hadnajanede.

¹² Hanaāenehethaude jea henee hadethādaune, Hāene nananene gauusevanenagu wauāthe hethunevethehevanenagu, jevaadesene hādaehauhauau, wauāthe hāthesaunauau, daudause hādauānauau, wauāthe nethauyādahagu hanedaudewau; havaadethaa jea, nau havaaunaudaunā.

¹³ Hau hāene nananene vethehevanenagu, hadadethaunauau hadavenuhuhauau, henesenehauau, jeneejavesahauau, nanenauguhuhauau;

¹⁴ Nau nananene hadnauwunaunane; hanau daujeneaunaudaunānaune: hanau nananene hadnaunaudaunane jaegauhadenegu hathāethadee.

¹⁵ Hāene hanesāde henee henethevethehevādaune daunedauwaudauwunith nuu hayauhuhau, Hauwunaunade henee hadvethee jauaujau henajanedanene Hejavaneauthu, hathāhuk.

¹⁶ Hanaāāedauwunaude, jasma henane haeavathethunevetheheva, nau haeauwauhadethānanena;

¹⁷ Nau haejenana hewauwaune dauethunevethehedane hadnāedauwunaunith henee hadethavathe, Jenajesaa; vahee hayauhuhau wauwu hanesejenanee.

¹⁸ Nau vahee haenesadene hathaichuwuhadethee hadnudanathee. Nandedauwauaude hasenehethauhuk, Neaudaunaudauwau vedauauwuu, nau hadneyehaunau nau hadnauhaudauwau: Nehethathane hadnudanene.

¹⁹ Nau jasma ahagu, Neaudaunauthu yauthauyauna hedauhuwaugaje, nau hadneyehaunau hadnayāduuhuu: nenehethathane hadnudanene.

²⁰ Nau jasma hahagu, hedauwunenenu, nau naajenejaunau.

²¹ Hanaāējenauusade henee wauwau, nau hanaāenauhauthehaude hadāhewaunādaune nuu hayauhuhau. Wauhā hechauhauthethāhe hauauwuu hanaāasenaunade hanaāāedauwunaude hewauwaune, Yegahu nauhauhaunee hadaugauchaudāe nau hadaugauchane hedane, nau hadjāthaunauau hede hathāadavenuhunethee, nau henesenehauau, nau jeneejavesahauau, nau nanenauguhuhauau.

²² Nau wauwau hasenehethauhuk, Vahadāhene, naasedaunau hasenehesene nau nausunauthauyauau, hathāhuk.

²³ Nau Vahadāhede haeāedauwuna wauwaune, Yehau hathenavaunaa nau nethauchayaunaa nau hadjādasauaunauau hadejejedāthee, henee naudauauwuu hadechauchaunaa.

²⁴ Hanau nāedauwunathane, henee hegau hena henanenauau neadethathee hadne-hauwuvajadawu nadethunevethehewau.

²⁵ Nau hena haenethaunau havathenedanede: nau hanaāējaagude, nau hanaāāedauwunaude,

²⁶ Hith daun henane hedsānaugu, hau jasānauwauhuk henesaunaune, nau henaune, nau henene, nau dāeyaunauau, nau henethesaunau, nau hedsāwau, haa nau nehayau hedenaedede jea, nāhauwuneethauguhaa.

²⁷ Nau daun janenevaa henaugachu, nau thaughānaugu, nāhauwuneethauguhaa.

²⁸ Hanaa nananena vanadaunesedede hayauauwun gauhadjejanaugu nedauau had-nayādede hadauchuunee, wauau hanaadauchanenee hesehenee?

²⁹ Havaene hesejenanauhuk hauunauganau, nau hanājeneesedede, vahee henee hathāenauhaudauau hadneevavavayaudenenee.

³⁰ Naa henane nenesedede, hau hajeneesedede, hanāthāde.

³¹ Wauāthe daun naja, vadauvauthauhuk jachau najane, hanājanaugude nedauau, nau hanāgaugauanadauau wauau haneene nauuu vadadauchu vasevadadausauau had-nenuchaunaude henee hejevenahedaunau nauuu nesauau vasevadadausauau?

³² Wauāthe, hajesenausujechaugunethe, hanāyethautheavede, nau hanānayāthenedauāwaunaude.

³³ Nau naasauau, daun nananena henee janenaunaudauau vahee henetheyaunau, nāhauwuneethauguhaa.

³⁴ Nejauauwuu hethadee: hau hith nejauauwuu jevanujaudāgu, hayew hadneene-jauauwujauau?

³⁵ Daudause hehauwuuthade vedauauwuu, wauāthe hee vehethe; hau henane-nauau hanāneāgudede. Daun henaudaununede heenedauvahek jaathedehe.

15

¹ Hanaāeauchauāde vahee hauāyāhehau nau wauwauchudauhuhau hee hadjaathehāde.

² Nau Nesethajauhuhau nau Wauthaunauhāhehau haeneneedenenau, Naa henane hanesedanaude wauwauchudauhuhau, nau nanethevethehewaude, hathāhuk.

³ Nau haeauthaunanadetha, hasenehethauhuk,

⁴ Hanaa henane nananena hedauneede vadadausauau juaunawaudā, hith hanauhauhuk hanesahenith, gauhadnautha theaudausauau nau theaudaichunee nauaunee, nau gauhadnaudeha henee naunethauaunith gauhaunaude hadveeha?

⁵ Nau hāeveehauthe hadthāegauhaude hejaanaunaa, hadneneethajaude.

⁶ Nau hāenauajegauhuthe, hadnadethaude hauānee henedaehauhau nau henedaudevādaunau, netheneethajaudauwunee hanau daujaveehauau naudauāve nenaunethauaude, hathauhuk.

⁷ Nananenau hāedauwunathana, nuu hadnaasauau neethajaude hayāene hāene hanesāde wauwauchuduhu haunaunevethajauhuk javaānee theaudausauau nau theaudaichunee hathauwunane janenethenauau haunevethajaude.

⁸ Daudause daun hesā nethenauaugu vadadauchu gauneevāejethā, hith hanadehuk hanesadenee gaunee, gauhadjedeauchauau nauauuthayau, nau gauhadwaudeau hauauwuu, nau gauhadvavesenaudene haunaude gauhadveede.

⁹ Nau daun hāeveenuu hanadethaude henedaehauhau, nau henedaudevādaunau hauānee netheneethajauwuu, hanau daujaeveenauwau hanesadee nāanathau, hanāthau.

¹⁰ Naasauau, Nananenau nāedauwunathana, haneduu neethajaude hathaāhethee hautheaunauau Hejavaneauthuu hanesāde wauwauchuduhu haunaunevethajauhuk.

¹¹ Nau hasenehehuk, jasaa henane neseyaugaune heauhau:

¹² Nau hajauchaugade haenehetha henesaunaune, Nāchau jevene gauuu vattheyau-nau henee nāudnedadahedaunau. Nau hanaāgauuvenaude hethāenetheyaunau.

¹³ Nau haunauauhaejewauthanenau hese hajauchaugade hāesauānauau vahee hauānee, nauhanaāejathāaude hese vavāaune vedauauwuu, nau hena hanaāevadauthedede hethāenetheyaunau hee hauhaugānenaedede.

¹⁴ Nau hāevathedede vahee, hena haanaāenauauchauau naunauthauau hasenaude hena vedauauwuu; nau hanaāadavenuhunedede.

15 Nau hanaāeyehaude nau hanaāewauhaunesade nehayau hauwauhauauwunane-nau henee vedauauwuu; nau haejenanaa hethauauwuu hadnauchauwaude neauthuwauchu.

16 Nau hanāneanadauau hanāchauchaunaude henaude hee jeyauwaunau henee neauthuwauchu hevethedaunenenu: hau hegau henanene hevenaa.

17 Nau hāaenaude hanaāenehede, Waunauthanethe hedautheaunau nāsaunau nenethenauau jauaujaunau naenedauchanene nau nejeesesanene, hau hadnenadaugauyānau?

18 Hadgauhānau nau hadeyehaunau nāsaunau, nau hadnaasenehethauau, Nāchau, nananenau nanethenauwau wauchudaude hese hayāene, nau yese nananene,

19 Nau nananenau hegau hee hāhauwauthēve: jeneshe waude haudautheaunauau.

20 Nau hanaāegauhāde, nau hanaāedauchaude henesaunaune. Hau hajesejedauchaude, henesaunaune haenauhauvaa, nau haeauwunauna, nau haeyeseneegau, nau haenaethesaunaunagutha, nau haenedana.

21 Nau heau hathāhuk, Nāchau, nananenau nanethenauwau wauchudaude yese hayāene, nau nananene, nau nananenau hegau hāhauwautheneēve.

22 Hau henesaunaune hathauyugaune hedautheaunene, Jādee chaunauguuthadee hu, nau hauyauunaa; nau thānauwunaa nechaunathathau hejadena, nau jedauaunee:

23 Nau hadjāthauva hede daun gauchujāde wauuu, nau hadnauauva; nau hadvethehenauau, nau hadeaunauwuthajaunauau:

24 Hanau naa nāa nenajaa, nau jaenaedede; nenaunethauaude, nau jaeveenade; nau hanaāejasesaunauwuthajauthee:

25 Wauhā vanachauganith heau haenedaune nauau: nau daunausujaude nau hāyānauusade hedauauwunenau, haenedauwaude haenevaudenene nau haevadaudenene.

26 Nau haeadetha hanesānith haunauaheau, nau haenaudedana dusedaudene hathauhuk.

27 Nau haeāedaunauwunaa, Nananene hahavaa nauusade; nau nananene hāsaunau nau-nauaude gauchujānith wauuu, hanau daujaesedanaude nanethauaunee.

28 Nau haeasenauna, nau haejejedā: hanaāejenuahenith henesaunaune, nau haedadadasevaa.

29 Nau haeauchuhananadetha henesaunaune, Naune, nuu hawauthāe jajenee hānesedaunathadenau, daudause hāhauwujethauwadaunathe hanāene hanathauwuhunaune: hau haunauau nananene hāhauwuthauuvene haudāsau, henee hanānesedenau haunauwuthajaude nauguu nādaehauhauau:

30 Hau chauchauu hasenauusade naa hāa, hāgaujauauthedaunādaunau hāheenaededaunau hee henesahehau hesānau, nananene hanadaunaude gauchujānith wauuu.

31 Nau hanaāāedaunauwunau, nā, nananene nanethenaedevene, nau vahee henee nāthāenethayaunau nanehanāhene.

32 Dauudasadee henee haneenesehē haunauwuthajaude, nau hadneethajaunee: hee naa hahavaa denajaa, nau jaenaedede; nau denaunethauaude, nau jaeveenade.

16

1 Nau hanaāāedaunauwunau jea hethauguhādaunau, hena jasaa haenethauyādā henane, haenethena hadāhevahew; nau haenanene haeauthauwuvaa henee daunethauyādauchude hevathayaunau.

2 Nau haeadetha, nau hanaāenaudedanaude, Duthanee henee daunedauunathane nananene? nayāde hādāhevaudenau hanau nananene hadnehauwuguthadāheva.

³ Hadāhevāhe, Hewauau hauaudnesedaunaune? hasethaujauhuk, hanau navahadāhewaunāde haedanauwunānau nadadāhewau: hajeneenauchauhānau; thaununedauwahunenau.

⁴ Haenauwau hadnesedaunau, henee hāenudanānaune hadāhewaude hadjedanethee hedauauwunenau.

⁵ Hanaāadethaude haunauude hadāhewaunādaune hethāesayānedanauwunādaunene, nau hanaāāedauwunaude nanedauwauaunith, Dauhudauchanau hasayānedanauwunaudenau nananene nadāhewaunāde?

⁶ Nau hāheyaugaune vadadausauau dejenauhuu javeda. Nau hanaāāedauwunaude Hedanau hauwauthaunauha, nau janaugu nauhauhaunee, nau hadwauthaunau yauthauyauau.

⁷ Hanaāāedauwunaude jachau, nau dauhudauchanau hasayānedayaunau nananene? Nau hanaāāedauwunāde, Vadadausauau dejenauhunee thauauhanewauchuunau. Nau hanaāāedauwunaude, Hedanau hauwauthaunauha, nau hadwauthaunau nasaudausauau.

⁸ Nau vahadāde haevaveenethedauna janechuvāhenith hadāhevahew, hanau dauhaenauau hasedaude: hanau dāeyaunauauau nuu hathāauauvaa hedenaededaunenau hāenuu javaānee hesenedāeyaunauauau.

⁹ Nau nananenau hāedauwunathana nesedee nehayau henedaehāvadede hee nethauyādahede hehauwuthade; henee hāejenenaedenā hadeesedanāna nedaujethaujenenaededaunenee.

¹⁰ Henane henee chaunuvāde hee haugajuhuyāgu haneechuvāde jea vasee: nau henane henee janechuvāde vanehaa hehauwuuchuvā jea vanasaunee.

¹¹ Hith naaheene nananena jechuvahena hāhauwuuthaheva nethauyādahede hanaa hadvenāde nananene hadanethaude hethauwuu veaunauaude?

¹² Nau hith nananena hejechuvahenagu hee henehanahede jasaa henane hanaa hadvenāde nananena henee hanehanahede.

¹³ Hegau nesethāhe hehauwuneeesedauna hanesenethe hechauhauthethāhehau: jachau hanāasānauwaude hanesāhenith, nau hanāvechauthaude jachau; wauāthe hanādudevede hanesānith, nau hanāthauchaunauhauwaude jachau. Nananena hāhauwuneeesedaunauva Hejavaneauthau nau nethauyādahehehauau.

¹⁴ Nau Nesethajauhuhauau jea, haevenauwu vāejethā, haenedauwaudauwu vahee nuu hayauhuhau: nau haeauchaudanavanauau.

¹⁵ Nau hanaāāedauwunaude nananena nethadee hasehadenā hathaāhethee henane-nauau; hau Hejavaneauthau naenauau hadahenau: hanau henee nechauguanavade-thee henanedaa newauchanavathee hathaāhenethe Hejavaneauthu.

¹⁶ Nanavaavedaunau nau haeyāhehauau haunaude nauuu Jaun: hee hena hena-janede Hejavaneauthau deheauthedaunee, nau haunauude henanenauau neheenethenadethee.

¹⁷ Nau hehauwunauthau hejavaa nau vedauauwuu heyauhuāgaune javaānee hanesadee haugajuhuu nanavaavede hadneeyauhuu.

¹⁸ Daun hausānaude henene, nau heneyaugu gauchuhunee, wauchudaudehaugau-thenenede: nau daun hausāyaune nanewaude wauchudaude.

¹⁹ Hena jasaa nethauyāsenane, haeneenu haevejayaunenau nau haegaugunesaunenau, nau haeneechauna hadauchenenee:

²⁰ Nau hena jasaa nedauwuhu Lazarus haseagu, haesaese hedajanaunaa haevaha-seva,

²¹ Haevadauugaudaude hee jeyauwaunau nejanesanenee hehethee nethauyāsenanene hevethededaunene: jea hathave haedasaa nau haenenesaudauwu hedasewaunau.

²² Nau hethauwuu, henee nedauwuhu haenaja, nau haenauaunechauhaa hautheau-nau yesee Abraham haenedauguva: nethauyāsenane jea haenaje, nau haejenanau;

²³ Nau hadauveeyaunee haejenāauguau, haeaudauwuthajau, nau haenauhauva Abraham vavāaune, nau Lazarus haenedauguvane.

²⁴ Nau haeneduva nau hathauhuk, Nāchau Abraham, jeauwunaune, nau jeautheavene Lazarus, henee hadejegunauhade naunauchuu hejadena naje, nau hadedauyauvanauau nāthaune; hanau nananenau hanavachuunau nuu hesedaa.

²⁵ Hau Abraham hahagu, Nā, hāenau henee nananene deenaedene neesedanauwu neethadee hayauhuhau, nau neesaunee Lazarus neewausaunee hayauhuhau, hau hewaunehaa hauwauthenaedede, hau nananene naunauchauthenaedene.

²⁶ Nau jea vahee nuu, nahethāe nananee nau nananene haneduu vanasauau vanethaunauau janenane: hadnejeneehedechedaunee hehethee hede hese nananene hehauwunee; daudause hehauwuneejeauchusanauau hadaunee, henee nevadaujauthee hehethee hethaa.

²⁷ Hanaāenehethaude, Vanevethedaunathane hena heee, Nāchau, henee nananene hadejejenanaude nāsaunau hedauauwu:

²⁸ Hanau yaunauthaunethee nauhauwauauau henee hadeāedauwunaude, jea hava-jaunenau nuu haduu naunauchauthauau.

²⁹ Abraham hanaāēdauwunaude nanethenauthee Mosaseau nau haeyāhehau; jaathehaunauha.

³⁰ Nau, hegau, nāchau Abraham: hau hith hanesāde jaeyehauhuk hehethee degaujauaudāde, haunaunaunevethajauthee, hathāhuk.

³¹ Nau hanaāēdauwunāde, Hith jenedaunauhaugaunee Mosaseau nau haeyāhehau, daudause hāhauwunee nādaunauau, daudause hanesāhenethe jaegauhāyagaune hehethee degaujauaudāhenith.

17

¹ Hanaāēdauwunaude hethauguhādaunau, Hāhauwunee hau henee dauusenadenau hadnauauchuu: hau naunauthauau hadnauauchaude daunjaunaude.

² Hanāneene henee thauyānauunaugane henauānauyagu, nau seāguthadagu hadaje, hauhanāheejegaudavāhenethe henee haneedausenethe jachau nuu hajasedāeyaunauau.

³ Haunauyauhauwauau nehayau nananena: Hith hahavaenau havawauchuhāva, hadanadethauva; nau hith haunaunevethajauhuk, hadjaegudanauwunauva.

⁴ Nau hith wauwauchuhānagu nesaudauchu hajesesenee, nau nesaudauchu hajesesenee naujaeyethaagudaunānagu, haunaunaunevethajaunau, hethānagu: nananena hadjaegudanauwunauva.

⁵ Nau vadauhanauau, Vahadāhene, hethedaunanauwunāa hedethauwaudaudenede, hathauhaugaunee.

⁶ Nau Vahadāhenith hathāhaugaunee, Hith nananena hethauwaudauwunagu hethāee hethāuu mausdaude jenayaunau, nananena hanāna nuu segaumau hunauhauedene, Hanāgauchauhana hethājee, nau hanājenanauna hadajee; nau hanāthauwaudaunāna.

⁷ Hau hanaa nananena, hanāwauwauwavede hanāthauwauwujethānith wauāthe hanana-jauānith, hanāthauna waunee hāenauusathe hehethee nauau, Najese nau hadjanaugu nau hadvethe?

⁸ Hau hanājenaasenehethauna, Hesetheva nayaudenee hadnevethenau, nau duujehe nehayau, nau hadjeenechaudaune haunaude hesevethenau nau hesaveyānau; nau heuhauwune jenaevethene nau hadevaveyā?

⁹ Gauhadvaveene henee wauwau hanau dauhunaasedaude henee hanasenehethāthe? Haunauchāe hegau.

¹⁰ Naathahena, hāene nananena vahesedaunagu hena hayauhuhau hathauchuwhana, Hāhauwuneejavaājasethānau wauwaunauau; vavade nanesedanauau hadnesedaunuu, hadeva.

11 Nau hethauwuu, daunsausuyehaude Dādaunedan, haeehedesa nahethāe Samaria nau Gananee.

12 Nau hāewaudasade jasaa hauauwudan, haenuchaunaa vadadauchu henanenau haenaujaune hedaugauwudaunenau, haetheaugunenau vavāaune:

13 Nau haeneduvanauau, nau hanaāenehethauthee, Hejavaneauthusau, Hecauhauthethāhe,* jeauwunauāa.

14 Nau hāenauhauwaude hanaāēdauwunaude, Waunenauhauthehaa hadanayaunenau vevethahevahehauau. Nau hethauwuu, henee daunsausuyehauthee, haejegaudauvāhenauau.

15 Nau hanesāde, hāenauhaudauau henee dauunayauhade, haejaaagu, nau haevasenehe dauvaveenethedaunaude Hejavaneauthu,

16 Nau haeuāneseve heauthene, haevaveenethedauna: nau haenaadāde Samaritan.

17 Nau Hejavaneauthusaun haeauchuhananadethā, gaujenayauhaunauau vadadauchu? hau daude theaudauchu?

18 Hajenauhauvathee hajejaeyehauthee hadvaveenethedaunauthee Hejavaneauthu, vavade naa henuwauhu.

19 Nau haeāedauwuna, Gauhā, najesa: nananene hadethauwaudaude henayauhāne.

20 Nau hāenaudedauwunāde Nesethajauhuhau, daun henajanedauene Hejavaneauthu hadneenauauchaunee, Haeāedauwuna, Henajaned Hejavaneauthau hadnehauwunauauchaune nausujauwuwuhadagu:

21 Daudause hehedauneagu, Nauhaudauwuu hede, wauāthe, nauhaudauwuu hena, hanau, naune, henajaned Hejavaneauthau thanāsadena,

22 Nau hanaāēdauwunaude hethauguhādaunau, Hese hadnauauchu, hāene nananena vadaunauhauwunā jasae hese Heau henane, nau hadnehauwunauhauwunā.

23 Nau hadnanethāna, Nauhaudau hede; wauāthe nauhaudau hena; jevayehauau, wauāthe jevathauguhaa,

24 Waude hasauau jahagude, henee naunauasānauuu hehethēe naugauthanee nau-gauauwuu hejavaa neenauasādaa jasaa naugauthanee naugauauwuu hejavaa; hadnaasauau jea Heau henane hadnaasaunee hedeseve.

25 Hau nedauau hadnanasenedauau wauthanee, nau hadnausāguthade nuu henaedede.

26 Nau waudeneesaunee deenaedede Noe, hadnaasaunee jea hedeseve Heau henane.

27 Neauwauthevethehedaune, neauwauthevaveyandene, neauwauthenenedaunee, neenenehathee, haunaude nauuu henee Noe dejedāde havathee thewaunaa, nau hanaāenanadawuauau, nau haenauauhā vahee.

28 Waudenaasauau jea deenaedede Lot; neauwauthevethehedaunee, neauwauthevaveyandene, neauwauthaudaunaudene, neheaudaunaudene hayauhuhau, neauwauthenayandene, neauauvadene;

29 Hau hajesesenee henee Lot haenaude Sodom haeesedanausaude nau haegauhauchanauauhauunauganauau hehethēe hejavaa, nau haenauauhā vahee.

30 Hadnaasauau hese hāene Heau henane hāenauhauthethāthe.

31 Henee hese, hānedauthēe dasee hauauwuu, nau hevatheyaunau jedauwuu hauauwuu, nanehajejeauwusade hadejedanauau: nau henee hanedaude nauau, nanehajejeajeaude.

32 Dauyuwuu Lot henene.

33 Daun vanadawunayaudede hedenaedede hadnanadede; nau daun hadnanadede hedenaedede hadnenayaudede.

34 Nananenau nāedawunathana, henee veeyaugu hadnesethee henanenauau hanesadenee hauau; hanesāde hadnedanade, nau jasaa hadnathauaude,

* 17:13 Missing "h" in "Hec(h)auhauthethāhe" ("Master").

³⁵ Hanesethee hesānauau hadthauayāthee wauhaunee; hanesāde hadnedanade, nau jasaa hadnathauaude.

³⁶ Hanesethee henanenauau hadnanaedauthee nauau; hanesāde hadnedanade nau jasaa hadnathauaude.

³⁷ Nau haeauchuhananadethanauau, Daude, Vahadāhene? Nau haeāedauwunā haduu vadanayau, hanaadauhauāneauhuthee neahehauau hauānee.

18

¹ Nau haeanaedetha hauthaunauhānee nuu heee, hena henane hāvachudajauaunevevetha, nau hājethauujesevenauau;

² Hahagu haeanedau hedan hauchuwunane, haejesa Hejavaneauthu, daudause hathauwunanenau;

³ Nau haeanedau henevesā hena hedan; nau haejeedasa, Jeaugaunayewhu naujauthavaa, hathauhuk.

⁴ Nau haejevadaunaasedau: hau waunee hasethajauhuk, hewauāthe nejechauau Hejavaneauthau, nau hathauwunanenau;

⁵ Hau nausunee hanau naa henevesā hajanauchuhānau, hadenayauhauau havaedajauaunejau navanadauchuhaa.

⁶ Nau Vahadāde hasenehehuk, Jaathehaa hasenehede janechuvāhede hauchuwunane.

⁷ Nau gauhujavaneauthau gauhadnenayauha nehayau hanayāsanaunau, hauwauaundaunādaunau hesee nau dajāee, hau negudauchuhaude?

⁸ Nananenau nananena nāedauwunathana henee hadnauchuhanenayauhaude, Hau hāejauthe Heau henane, gauhadveede hethauwaudaude nuu hathāuauvaa.

⁹ Nau haeauthaunanadetha jachau nethauwaudaunadenethe nehayau henee dauchuvahethee, nau newauchānauwauthee hauthauau:

¹⁰ Hanesethee henanenauau haeyehaunauau vevethahenauauwuu hadvevethahethee; hanesāde Nesethajuhu, nau jasaa hauāyāhe.

¹¹ Nesethajuhu haetheaugu nau haevevetha waude heee nehayau, Hejavaneauthau, nananenau vaveenethedaunathane, henee nāhauwunaathā hauthauau henanenauau hathahethee, hedanauwuyāhehauau, janechuvahethee, jatheaudauwuyāhehauau, daudause naa hathāde hauāyāhe.

¹² Nananenau nenaugauyānau nese hanesadee hauchauvadede, Nevānau vadadauchu vahee henee nāthāenetheyaunau.

¹³ Nau hauāyāhe haetheaugu vavāaune, daudause haejejenāauguau hejavaa, hau haeanaedesejāhede, Hejavaneauthau jeauwunaune wauchudaunau, hathauhuk.

¹⁴ Nananenau nāedauwunathana, naa henane haejaeyehau hedauauwuu haeauwunaunau haejavaāhe jachau: hanau dathājee hanesāde henee nevadaujavaānajanethee nehayau hadnauwujenanade; nau henee nenehanethaunadede hadnejanade.

¹⁵ Nau haejādaunanauau jea hajasedāeyaunauau, hadnevasanaude; hau hāenauhaudauwunethe hethauguhādaunau, haeneneuvanauau.

¹⁶ Hau Hejavaneauthusau haeadetha, nau hahagu, Nanehajauthee hajasedāeyaunauau, nau jevadauduvaa: naathāhenethe henehanahedaunau henajanede Hejavaneauthau.

¹⁷ Hethauwuu nāedauwunathana, Daun hadjesedanauau henajanedanene Hejavaneauthu hasenaedenethe hajasedāeyaunauau hadnehauwuneejedā.

¹⁸ Nau jachau hauchuwunanene haenaudedanaa, Hethāhene Hechauhauthethāhe, nauddusedau hadnedanauwau jethauujenenedede? hathauhuk.

19 Nau Hejavaneauthsaun* haeāedauwunaa, Naudu hethāde haesene? henaneda hehauwuthā, vavade hanesāde, nananede, Hejavaneauthau.

20 Nananene haenauwu nanavaavedaunau, Jevawauchudauau hee haugauthenenede, Jevanaa, Jevaaveda, Jevajyauwāedauwauthadee, Vechauchune nananene hāsaunau nau hānau.

21 Nau hanaānehede, Vahee nuu haunaunedenau hee daujeeseaunau.

22 Wauhā Hejavaneauthsau hāenedauwaudauau nuu, Hanaāāedauwunaude, Hanesadee hāhauwusenethene: Vaheaudauna henee hāthāenethyaunau, nau hadjaanauwunau-nauau hadavenuhuhauau, nau nananene hadnethenauwu haenathau hejavaa, nau hadejau hadjethaugu.

23 Nau hāenedauwaudauau nuu, haeaudauwuthajau: hanau deethauwunethauyā dāde.

24 Nau Hejavaneauthsau hāenauhaudauwunith henee dauaudauwuthajau, Duthāenauthaune henee nanethenuu veaunauaude hadnesejedāthee hena-janedaunene Hejavaneauthu, hathauhuk.

25 Hanau hehauwujajathaune hee camel hehedesahagaunee hajasevāhau nedau-daunaudenee, javaāneenauthaunee nethauyāsenane hadnesejedāde henajanedau-nene Hejavaneauthu.

26 Nau hathāenedauwauduu, Hanaa hadnenanedanede? hahagaunee.

27 Nau hanaānehenith, hayauhuhau hejethauuneethaunenau henanenauau neneedede Hejavaneauthau.

28 Hanaānehede Peda, Naune, naunaudauwunauau vahee, nau thaunauguhane.

29 Nau haeāedauwuna, Hethauwu nāedauwunathana, hena haunauude henane henee hehauwunaude hedauauwu, wauāthe henehā, wauāthe henauhauwauau, wauāthe henene wauāthe henesaunau, hee henajanedau-nene Hejavaneauthu hedenaededaunene,

30 Nananede hadjavaānesedanauau nuu hewaunehaa, nau hathāauauvaa hadnauu-sanauau henaedede hadnejethauuvadauauau.

31 Hanaāedanaude nesenee, nau hanaāāedauwunaude, Naune, hadneyehaunauau Dādaunedan, nau vahee hayauhuhau hathāewauthaunauhuu haeyāhehauau hee Heau henane hethauwunauauchauau.

32 Hanau hadvenavathe Neauthu, nau hadvavavanauchuhāde, nau hadnaunau-nauchaudauchuhāde, nau hadneguthahayauthāde.

33 Nau hadnenesegauhude, nau hadnaāde: nau nasese hadnaājeagauhāde.

34 Nau haejaenauwu nuu: nau nuu hauthedau haeyaudaunaunauau, daudause haejaenauwu hathauthedaunāthee.

35 Nau hethauwu, hāyāedadauau Jericho, jasaa haenanenaugu henane haetheaugu nedechaudenenee dauhunedauwaude:

36 Nau haenedauwaude henanedanede dadavechaudenenee, haenaudedauva haesedaunenenee.

37 Nau haeāedauwunau, henee Jesus Nazareth hanehedesade.

38 Nau hanaāevasanadede, Hejavaneauthsau, nananene Heau David, jeauwunaune, hathauhuk.

39 Nau henee nandedauvathee haeneneuvanauau haddādaunaugunith: hau haevasanade haugauthe, Nananene Heau David, jeauwunaune.

40 Nau Hejavaneauthsau haedauusa, nau haeautheave hadjādaunade: nau hāyājenuusanith, haenaudedauva,

41 Hauddusehathe henee hadenaasehathane? hathauhuk. Nau hanaāāedauwunaude, Vahadāhene, nanaa hadeesedanauwau nauhaudauwaude.

* 18:19 Missing letter "u" in "Hejavaneauth(u)saun", which often appears (as does "Hejavaneauthsau") where we would find the name "Jesus" in the KJV.

⁴² Nau Hejavaneauthusau haenehetha, hanesedanauwu nananene nauhau-dauwaude: hadethauwaudaude henayauhāne.

⁴³ Nau chauchaunu haeesedane henauhaudauwaude, nau haethauguha, hae-vaveenethedauna Hejavaneauthu: nau vahee henanedanede, hāenauhauduu, hae-vaveenethedaunanauau Hejavaneauthu.

19

¹ Nau Hejavaneauthusau haewaudasa nau haechaugusa Jericho.

² Nau, naune, haenedau henane Zacchaeus haseagu, haenajawauna hauāyāhehau, nau haeveaunauau.

³ Nau haeneenavadaunauhauva Hejavaneauthusaun haedāhenethe; nau haejeneene daunauthethenedaunenee, hee daujaahede.

⁴ Nau haesayāgau, nau haenauahu sycomore hunauhaudee hadnauhauwaude: hanau hadnehedesanith.

⁵ Nau Hejavaneauthusau hājeedadauau, haejaāne, nau haenauhauva, nau hathauhuk, Zacchaeus, nauhauhuhu, nau jeauwusa, hanau nuu desenee hadnanaunau haudauuwuu.

⁶ Nau haenauhuhu, nau haejeauwusa, nau haedasa nauuu neethajaude.

⁷ Nau hāenauhauvāhede, vahee haeneānaune, Henee hadneejādavenethe henanene he-nee wauwauchudahu, hathāhuk.

⁸ Nau Zacchaeus haetheaugu, nau haeāedauwuna Vahadāhenith; Naune, Vahadāhene, vayaugauuu naudaununaunau vanenu hadavenuhuhanau; nau hith hedanavanaugu hayewhu hehethee daun henane hanājayaudauvāedauwauthauau, hanājavaāvenauau yāyaunanee.

⁹ Nau Hejavaneauthusaun haeāedauwunaa, Nuu desenee henayauthāhe hedadauau nuu hauauwuu, hanau nechau haneāvāde Abrahamvene.

¹⁰ Hanau Heau henane nauusade hadnaudethāde nau hadnenayauhaude daun naunethauaunith.

¹¹ Nau hajesenedauwauduu nuu hayauhuhau, haeethedaunane nau haeauthau-nauhānanadetha, hanau dauhuauchauau wauwu Dādaunedan, nau hanau daunau-naduu henee henajanedanene Hejavaneauthu chauchaunu wauauhaadenauhauwu.

¹² Hanaāenehede henaheee, Jasaa naja haehau vavāaune vedauuwuu hadnesedanauau hee nehayau najanede, nau hadjaejaude.

¹³ Nau haedetha vadadauchu hewauwaunauwau, nau haejaanauwuna vadadausauna vāejethā, nau haeāedauwuna, Hadeaudaunava haunaude jaenau-sanaugu.

¹⁴ Hau hauauwunanenau haeasānavaa, nau haeyethautheavedaunene thauguu, Nāhauwuvadaunethenauva naa henane nāhauwuvadaunajawaunāva, hathāhuk.

¹⁵ Nau hethauwuu, henee hājeaenauusade, haeesedane najanede, hanaāaichuwuhaude nuu wauwaunau hadnadethaude, hevenaunau vāejethā, henee hadnaenauau haedauchu dathājee henane haedauchujavaājasedethe hee hedaunaunau.

¹⁶ Hanaājenauusade nanedauvade, Vahadāhene, havāejethāwau javaājasedede vadadausauna vāejethā, hathāhuk.

¹⁷ Nau hanaāāedauwunaude, Hethadee, nananene hethāhene wauwau; hanau nananene nethauwaudauwu hee naugajuhuhuu hadnajawaudauwu vadadausauna hedan.

¹⁸ Nau naneseauwaude haejenauusa, Vahadāhene, havāejethāwau javaājasedethee yau-thauyauna vāejethā, hathāhuk.

¹⁹ Nau vavade hanaasenehethaude, Hadnehanāhene yauthauyauna hedan jea.

²⁰ Nau jasaa haejenauusa, Vahadāhene, Naune, heyewnau havāejethāwau, neaunaune-denau nejenanauwau hāheāhaunaa, hathāhuk:

21 Heee dauhusathane, hanau nananene daugaugaunauuwunanenene: nananene hedanau henee hājejenayaunau, nau hadegauchu henee hājejenayaunau.

22 Nau haeāedauwuna, hehethee nehayau hadenaa hadauchuwhathane, nananene hauhauganene wauwau. Haenauwu henee daugaugaunauuwunanenena, hedanauwau henee nājejenayaunau, nau hadgauchauwau henee nājejenayaunau:

23 Naudu gauhājevā navāejethāwau nedauhaenaevāejethā, henee hājejenausanaune hadeesedanauwau nehayau javaānee?

24 Nau haeāedauwuna henee daunauthetheaugunethe, Hedanauwunaa vāejethā, nau hadevenau henee vadadauchuvāejethāvade.

25 (Nau hathāhuk, Vahadāhene, nanethenauau vadadauchuvāejethā.)

26 Hanau hāedauwunathane, Henee dathājee hanesāde nanethenauau hadnevenade; nau henee janejasedede, daudause henee henetheyaunau hadnedanauwunade.

27 Hau hena naujauthauwauau, henee najevadaunajawaunaunauau, hadjāthauva hede, nau hadnaunauauva hathaājenau.

28 Nau hāesanāsenehede nuu, haenedauva, haenauauhuyehaunauau Dādaunedan.

29 Nau hethauwu, hāyānausade Bethphage nau Bethany, haua Olives haseāgu, Haesayānauthaeva hanesenethe hethauguhādaunau.

30 Najesaa nananena hesee hajasee hauauwudan hathaāsana, hathauhuk; nanaa wau-dasanagu hadveehauna dātheveehauchavesau hadduguhude, hehauwuthauune henane dachaugu: hadaugunauva, nau hadjāchaudauneva hede, hathauhuk.

31 Nau hith daun henane naudedauānagu, Naudu hauaugunauna hethānagu? hesau jenaasenehethauna, hanau Vahadāde haddaununaude.

32 Nau henee hautheavathēe hanaāejathāauthēe, nau haeveehanauau neesenehethaude.

33 Nau daunsausaugunauthēe dātheveehauchavesaune, hedauneeenith, Naudu haugunauna dātheveehauchavesau? hathāhaugaunee,

34 Nau hanaāedauwunauthēe, Vahadāde haddaununaude.

35 Nau haenauchaudaunanauau Hejavaneauthusaun: nau haedadasanauwunauau hedāchaunenau dasee dātheveehauchavesaun, nau haeaugaugunaunanauau Hejavaneauthusaun dasee.

36 Nau daunsausuyehaude, haesasaanauwu hedāchaunenau vaunaa.

37 Nau hāyānausade, wauwu haeauwusa hauanee Olives, haunauude hadauchude hethauguhādaunau hanaāaunauwuthajauthēe nau haevaveenethedaunanauau Hejavaneauthu naugu haevāsānadedauune heee vahee hathāenauthaunee henesethaunene henee henauhauthaunenau;

38 Haunauwuthajauau Naja henee jaunau haneesee Vahadāhenith: danādauyauau hejavaa, nau vaveenethedauwu javaājauudaa, hāheagu.

39 Nau hauthauau Nesethajauhuhau hehethee henanadaa, Hechauhauthethāhe, neuwune hāthauguhādaunauau, hathāhuk.

40 Nau haeauchuhanāedauwuna nau hasenehethauhuk, Nananenau nāedauwunathana henee, hith nuu dādaunaugagaunee, hauunauganauau chauchaunu hadneduhuthee.

41 Hau hāyānausade, hāenauhaudauau hedan, nau haevewau,

42 Hanaāenehede, hith heenauwunagu, ha nananene, ha nuu hadeseve, hayauhuhau naathuu hadādaunahedaunaa, hau hewaunehaa yaunaudaunane hasesāe.

43 Hanau hese hadnedasāna henee haujauthauwauau hadnesedethee havathegau- uha heee nananene, nau hadnechauchuaunāna nauanee, nau hadnaunaunehāna dau- dauna hehethee,

44 Nau hadnanaunauvaenāna, nau hadāeyaunewauau hanedauchaunawaunauau; nau hadnehauwunaudanauwunā hanesāhenith hauunaugane hanathaugunethe; hanau nananene daujaenauwu hāenaujādaunathana.

⁴⁵ Nau hanaāeyehaude vadanedaunauauwuu, nau hanaāenudanaude henee neaudaunanethe jedauwuu, nau henee naudaunanethe;

⁴⁶ Hanaāēdauwunaude, Wauthaunauhuu, Naudauauwuu haneauauwunee hadnevevethahedaunee: hau nananena haesedena nedaunaudee heyāenau havedehauhau.

⁴⁷ Nau haeautheda hayauwusenenee vadanedaunauauwuu. Hau najanauau vevethahevahehauau nau wauthaunauhāhehauau nau najavahehauau henanedanede haeneenanaudehaa hadnaāde,

⁴⁸ Nau haeyauhuune nesenehāde hanau vahee henanedanede haenāedevenenau dauhujaathehāde.

20

¹ Nau hethauwuu, henee jasia hena hese, denausunauthedade henanedanede vadanedaunauauwuu, nau haeauthedaude waunauyaunee hethadenee, najanauau vevethahevahehauau nau wauthaunauhāhehau haeedasaa nauguu vachaugananenau,

² Nau hanaāanadethauthee, Jeauthedaunāa, hayew hāenaudahede hāenesedaude nuu hayauhuhau? wauāthe hanaa henee havenāde nuu hāenaudahede?

³ Nau hanaāauchuhananāedauwunaude, Nechau hadnaudedauunathana hanesadee hayewhu; nau hadjeāedauwunewa:

⁴ Heedusaayāde Jaun, gauhuhuthaune hejavaa, wauāthe hehethee henanedaa? hathauhuk.

⁵ Nau haeeegaugaugauudenauau, hith hesauhesenehethaunauaugu, hehethee hejavaa; hahagaunee, Naudu haejethauwaudaunauna? hanāthānauau.

⁶ Hau hethaunauaugu, hehethee henanedaa; Vahee henanedanede hanāedaudauauvānauau hauunaugāe, hanau hethauwaenaunauthee henee Jauneau dauhaeyānith.

⁷ Nau haeāedauwunanauau, daujeneauthedaunauthee daunathaunee.

⁸ Nau Hejavaneauthusau hanaāēdauwunaude, Daudause gauhaudnauthedaunathava daun nāenaudahede nāenesedaude nuu hayauhuhau.

⁹ Hanaāejasesanadedauau henanedanede hee dajenehede; Jasia henane haejenane dadajevenevesenethauchayau, nau haehathauauauwujethāhehau, nau haejathāau hese vavāaune vedauauwuu haegudaunā.

¹⁰ Hāenauauchaunee haeyethautheava wauwaune hese thauauauwujethāhehau, henee hadjevenāde vevenaundenau hehethee dadajevenevesenethauchayaunaa: hau haenenesequuu, nau haejathethajenāhee jessaa.

¹¹ Nau jea haeyethautheava jachau wauwaune; nau haenenesequhunauau jea, haedadayānauchuhanauau, nau haejathethajenāhee jessaa.

¹² Nau jea haeyethautheave nanaseauwaunee: nau haenasenehanauau jea, nau haenuguthanauau.

¹³ Hanaāenehede hadāhevāhe dadajevenevesaa, Hewauaujeesedaunaune? Hadautheawauau navechauthau nāa: Nauchāe hadeneehauthee hāenauhauwaunauthe.

¹⁴ Hau thauauauwujethāhehauau hāenauhauwauthee, haegaugaugauudenauau, Naa nananede hadvanahanāde: nahājauau hadenauaune, henee headevanahanahedaunau hadenehanahenauau.

¹⁵ Hanaāenuguthauthee dadajevenevesenethauchayaunaa, nau haenaanauau. Haudneduseha hadāhevāhe dadajevenevesenethauchayaunaa?

¹⁶ Hadejaude nau hadnauauhaude nuu thauauauwujethāhehau, nau hadgauchuhuvāde dadajevenevesenethauchayau, hathauhuk, Nau hāenedauwauduu, hadnehauwunaasau, hahagaunee.

17 Nau haenāuhauva, nau hanaāēdauwunaude, Dusau nuu henee wauthaunauhuu, Hauunauganau hauauvāhehauau hausāguthaunenau, hanānanenith hāhe hanadāde nedautheaunee?

18 Daun janesee dasee nuu hauunaugane hadthausee, hau dasejaneseagu hanānauchauwuthauathāaunaude.

19 Nau najanauau vevethahehehauau nau wauthaunauhāhehauau chauchaunu haegaugauanavanauau hadnesedanauthee; nau haedauwu henanedanede hee dauhāenuu henee dauhuanadede nuu dajenehede hee.

20 Nau haeauauyauhauvanauau, nau haeautheavanauau haunauyauhauthāhehau, hadnanadaunethānethe hadchuvāhevathe henanenau, henee hadnesedanauwunethe hedanadedaunau, henee hadenauuchaudaunauthee hejadenenau nau nau-naudāhenethe hauchuwunanene.

21 Nau haenaunaudedananaunau, Hechauhauthethāhe, haenaunee henee hasenehenaune nau nethauwuchauhauthethāne, daudause hāhauwujāvedaugauhauwaunauau henanedanauau hegau, hau hanechauhauthethāne hesee Hejavaneauthuu hethauwuu:

22 Gaunaasauau hee nananee hadnevenade hauāyaunau Caesar, gauwauāthe hegau?

23 Hau haeauenauwu henadaunedaudenenau, nau hanaāēdauwunaude, Naudu haevadauvasehena?

24 Jenauhauthehee vāejethāe. Hanaa hewauthaunenauaudene, nau hanaa hewauthaunauhanede? Haeauchuhanāedauwunanaunau, Caesar.

25 Nau hanaāēdauwunaude, Jauaunaudanaa hee Caesar hayauhuhau henetheyau-nau Caesar, nau Hejavaneauthau hayauhuhau henetheyaunau Hejavaneauthau.

26 Nau haejeneesedanauwu hedanadedaunene hathaājedaunenee henanedanede: nau haegaugauanadauwu hedauchuhanehedanene, nau hanaāedādaunauguthee.

27 Hanaājeedauchauthee jasae Sadducees, hayāthajauhuhau henee hadjejaegauhadenene: nau haenaudedananaunau,

28 Hechauhauthethāhe, Moses hathauthaunauwunānauau, Hith daun henane henauhauwauau gaujauaudāheyaugaune, heneneyaugaune, nau gaujauaudāheyaugaune jedāeyauneveyaugaune, henee henauhauwauau hanādanaude henenene, nau hanānesaunede hee henauhauwauau, hathauhaugaunee.

29 Hena hee haenesaudaunauau henahavaevadehehauau: nau jasaa nedauau haenenene, nau haenaja haejedāeyauneve.

30 Nau naneseauwaude haeneva, nau haenaja haejedāeyauneve.

31 Nau naneseauwaude haeneva; nau vavade hanaasene nanesaudauchaunauwaude jea, nau haejenauthanauau dāeyaunauau, nau haegaunjauaudāhenauau.

32 Waunee vahee hesā haegaunjauaudā jea.

33 Henaheee jaegauhadeneyāgu hanaane hadnevādaune? hee hanesaudaunethe daunevāde.

34 Nau Hejavaneathusau haeauchuhanāedauwuna, dāeyaunauauau nuu hathāauauvaa nenevadedanene, nau nenenehadenee:

35 Hau daun naunauguthee hadnenaedeeuu hena henaedede, nau jaegauhade-neagu hehethee gaujauaudahede, hadnehauwunevadedanene, hegau hadnenenehadedaune:

36 Daudause hadnehauwauthenajadene: hadnaathahedaunee hautheaunauau; nau hadnenedaunevāthee Hejavaneauthu, naathedāeyaunenedaunee jaegauhade.

37 Wauhā henee gaujauaudahehehauau hadjaegauhāthee, Moses denauhauthehade jauauadee, deadethāde Vahadāhenith Hejavaneauthu Abraham, nau Hejavaneauthu Isaac, nau Hejavaneauthu Jacob.

38 Hehauwujavaneauthune heyauhauade, hau henaedede: hanau vahee ha-nenaededaunenee.

39 Hanaāene jasaa wauthaunauhāhe haeauchuhananadetha, Hechauhauthethāhe. Nananene hethade hasenehene.

40 Nau heee haejauthenaudeaunanaau.

41 Nau hanaāēdauwunaude, Naudu haena hanee Chris Dāvid* dauhuāwaude?

42 Nau Dāvid nehayau hasenehede wauthaunauhanaa Psalms,† Vahadāde hasenehethaude Navahadāhewaunādaune, Hadjejanaugudaune hejavesanee,

43 Haunaude nadeesehaunauau haujauthauwauau hadnedaugāaugunene.

44 Dāvid henaheee haeheenesea Vahadāhenith, dusee heau?

45 Nau vahee henanedanede haenedaunau hanaāēdauwunaude hethauguhādaunau,

46 Waudauau wauthaunauhāhehauau, neneanadu javesanee sauaunausāchaude, nau vechauduu jachauthadede nedauaunaunavadedaunenee, nau najatheaugudaunau vevethahenauauwuu, nau najanau nedaugunethe vanethehedaunenee;

47 Naudauvāe henevesānau hedauauwunene, nau hanau denauhauthethāthee deguthevevethahethee: hadnathee hanesedanuu vanasaunee gudanadede.

21

1 Nau haejaāne, nau haenauhauvā nethauyāsenanene haejenanauwu hevaudenenu haenathaunaa.

2 Nau haenauhauva jea jachau hadavenuhu henevesāne haethāgudene hanesāenee nevaāhenee vāejethāau.

3 Nau hanaāenehede, hethauwuu nananenau nāedauwunathana henee naa hadavenuhunede henevesā javaājenanauau vahee;

4 Hanau vahee nuu nanethauyādahethee dejenanuu dejenanauwunauthee Hejavaneathu: hau hadavenuhunede hajenanauau vahee heenaededaunau hathāenethenauau.

5 Nau haehegaugaugauudenauau vadannauauwuu, haseneehenee nauguu hethāhenethe hauunauganau nau hausāyaunau, hanaāenehede,

6 Nuu hayauhuhau hānauhauthaunenau, hese hadnauaichuu, hadnehauwunathauau hanesāde hauunauga hanathaugude hadvajanesee.

7 Nau hanaāenaudeaunauthee, Hechauhauthethāhe, hau hadduunaasau nuu? nau hayew hadnauhauwuu hadnesauau hāene nuu hayauhuhau hadneenauchuu? hathauhaugaunee.

8 Nau hanaāenehede, haunauyauhaudauwau henee nananena hadejenanedaunehana: hanau hadnewauthathee hadjauthee Naneseedaunaa, Hanejavaneauthusaunenau, hadnethee; nau hayānauauchauau: jevāthauguhaa.

9 Hau hāenedauwaudauwunā vauthadede nau jajayauthadede, jeva nathajauau, hanau nuu hayauhuhau hadnedauunauchuu; hau hadneevadauauau hadguthauau.

10 Hanaāēdauwunaude, jajaesenanedanedede hadnevauthadee jajaesenanedaa, nau najanede hadnevaudauau najanede:

11 Nau hadnavathethauthauwunauauau vedauauawuu, nau hasenaude, nau havathaugauwude, nau naunaunauchaudauhauthaude nau hadvasauau naunauhauwuu hadnauaichauau hehethee hejavaa.

12 Hau hadnejesejenauaichuu vahee nuu, hadnedanāna, nau hadnaunaunauchauthethāna, nau hadnevaudenee nananena hauāchaude, nau duguhunauauwuu, nau hadnenauuchauhana hathaājethee nenauchuwuthee nau hauchuwunanenauau hanau Naneseede heee.

13 Nau hadnaasejenanauwunana heee haenathau.

* **20:41** “Dāvid” is spelt thus here and in two other places nearby, 20:42 and 20:44. The name is spelt “David” in its other ten appearances in the text. (See note for 13:16.) † **20:42** “Psalms” is capitalized here but not in 24:44, but both are almost certainly deliberate. As per the KJV, “Psalms” in 20:42 is the name of a book in the Bible, but in 24:44 the common noun “psalms” is meant.

14 Hāenauwuu heehena nananena hadahenauau, jevagaugauuthajauau nedauau daun hadnesenehena:

15 Hanau hadvenathana vade nau haeyaude, vahee hasānavādaunenau hadnehauwuneayādaunāva hegau hayethaagudaunādaunenau.

16 Nau nananena hadnavethevāthee nesauuu hanehānenau, nau hāthesaunenau, nau hādauānenau, nau hādaehahenau; nau jasae nanaena hadneenaana.

17 Nau hadneevahasānavāhena vahee henanedaa hanau naneseede heee.

18 Hau hegau hāthaanenau haudauguhuanenauau haudnehauwugaujauaudāhenaunau.

19 Hanāedevedaunenau hadnaunaunehaudde havadathuwunau.

20 Nau hāenauhaudauwunā Dādaunedan hadnechauchuaunāna vanenanenauau, nanehāenauwuna henee nauauhadede wauwu hadneaudaa,

21 Nanehadaugauhuthee hese huanee hathāanedauthee Judaea; nau henee hathāanedauthee nahethāe nanehanauhuthee; nau jevajejedānauha henee hathāanedauthee gauchuhunee vedauauwuu.

22 Hanau nuu hese hadneauthedaudenee henee vahee hayauhuhau hathāewauthaunauhuu hadnethauwunaasauau.

23 Hau naunauthaunee hadnethauauvāhethee hathāenesaunethee, nau hathāeneauauhuthee hena hese, hanau hena hadnavathasenaudenee vedauauwuu, nau hasenaundaunāhenauau nuu henanedanede.

24 Nau hadneaunathāhethee gaugauthau, nau hadnejathechauhāthee hadwauwaunenethee vahee jajaesenanedanede: nau Dādaunedan hadnauguhuthee Neauthu, haunaude Neauthu nauauchaudauhaugaunee.

25 Nau hadnauhauthaunee hesesee, nau vegusesee, nau hauthuuu; nau nanadee hathāauauvaa hadnaunauādaugauhudaunee jajaesenanedanede, hadnehauwaenauwu; hadaje nau hadnaunaudānaunee;

26 Henanenauau hedahenau hadnadenāthajaunee, nau hanau naunauyauhauduu hena hayauhuhau hadnauauchaunee dasee hathāauauvaa, hanau hathāenauthauau hejavaa hadnauauwunauauau.

27 Nau hadnaāenauhauwauna Heau henane hadnenauusade henaunauade nauguu naunauthaunee nau hadnavathenauasāauau.

28 Nau hāene nuu hayauhuhau hāenauauchuu, nauhadnaāenaunauānena; nau hadnenāauguauna heee hadneejaenauthana hadnaāeaudaa.

29 Nau hanaāedadajenehethaude; Nauhauvaa hauyauauchunauhaude, nau vahee haudenauau;

30 Hāeguugauāhenauthe, hadnauhauwauna nau hadnaenauwuna nehayau henee veja dauhuaudaa.

31 Hadnaasauau nananena hāenauhaudauwunā nuu hayauhuhau hadnethauwu-naasauau, hāenauwuu henee henajanede Hejavaneauthau haneaudanee.

32 Hethauwuu nāedauwunathana, nuu henaedede hadnehauwuvadauau, haunaude vahee hadnethauvāe.

33 Hejavaa nau vedauauwuu hadneyauhuu; hau Nadanadedauunau hadnehauwuthauuyauhuunau.

34 Nau haunauyauhaudauwauau nehayau, naseduhuu daunāene hadahenau havaehayaundenau hee haudauhauganedaunenau, nau havanadenenau, nau haunaunethaunenau nuu henaedede, nau henee hese hadgauduaunāna hau hadnehauwaenava.

35 Hanau waude nauyaudenau hadnauauchauau vahee hathāetheaugude dasee hathāauauvaa.

36 Haunauyauhaudauwauau henaheee, nau hevevethahee dajauaunee, henee nananena hadeheenauguauna hadegauchuhauwuna vahee nuu hayauhuhau henee hadnauauchuu, nau haddetheauguna hathāāhede Heau henane.

³⁷ Nau hesenee haechauhauthethā vadanauauwuu; nau hāeveeyaunee haenauā, nau haeadāne hauanee henee neseeyāgu hauanee Olives.

³⁸ Nau vahee henanedanede haejevanauuchaudene naugusāje daunauganenee hadaude vadannauauwuu, hee dauhujaathehāde.

22

¹ Wauhā hadneevasevenee janenesaunauchauanauhuu jauaujaunau haeayānauauchau, Hadavechaude neseāgu.

² Nau najanau vevethahevahehau nau wauthaunauhāhehauau haegaugauanadauwunenau hadnesenaāde; hau haeedauwu henanedanede.

³ Hanaāejedāde Haujau Judas hejaveede Iscariot, haenethanedau vadadauchuneseenee.

⁴ Nau hanaāejathāde, nau haeanaadetha najanau vevethahevahehau nau hauyauhauthāhehau, hadneseavedaudaunauwaude.

⁵ Nau haeneethajaunauau, nau dechauchuwuhadethee hadvenāde vāejethā.

⁶ Nau haesayānehetha, nau haeanauyauhauwau hadneeneavedaudaunauwaude henanedanede.

⁷ Hanaāenauauchauau hesee janenesaunauchauanauhuu jauaujaunau nanaa hadavechauthau hadnāede.

⁸ Nau hanaāauthewau Pedahau nau Jaunau, Najesaa hadesaanudeva hadavechauthadede, hadevethenauau, hathāhaugaunee.

⁹ Nau hanaāēdauwunauthee, Daudu hadauvathehāne hadnedauusaunuu?

¹⁰ Nau hanaāēdauwunaude, Naune, hājedānā hedan, hena henane hadnuchaunāna, hadnewauunauau hauānau hadjaāsanenee naje; hadethauguhauva hauauwuu hadnedaujedāde.

¹¹ Nau hadethauva henane hedauauwunede, Hechauhauthethāhe nejeethāne, daudu jādanauauwuu hadnedauvethenauau hadavechauthadede naugu nāthauguhādaunauau?

¹² Nau hadnauhauthehāna vanasaunee dachauauwuu hadnesewaudeanee: hadnesaanuhuu.

¹³ Nau hanaāeyehauthee, nau haeveedenauau neethāedauwunaude: nau hanaāesaanudethee hadavechauthadede.

¹⁴ Nau hāenauauchaunee, hanaāejanaugude naugu vadadauchunesenee hevadauhanau.

¹⁵ Nau hanaāēdauwunaude, hethauwuvadavethenau nuu hadavechauthadede naugu nananena hajesejasauwauwuthānau:

¹⁶ Hanau nāedauwunathana, Nadnehauwauthevethe nuu, haunau hadnauauchauau henajanede Hejavaneauthau.

¹⁷ Nau hanaāedanauau vāenau, nau hanaāevāde vaveenede, nau hanaāenehede, Hedanauwuu nuu, nau hadjaanauwauva nehayau:

¹⁸ Hanau nāedauwunathana, Naudnehauwuvanethede dadajevenenaje, hanaude henajanede Hejavaneauthau nauauchauyāgu.

¹⁹ Nau hanaāedanauau jauaujau, nau hanaāevade vaveenede, nau haejeane, nau haevana, Nu nanaa nadanayau havenadenenau: nuu hadneejenaunethedaunena, hathauhuk.

²⁰ Naasauau jea vāenau hāesethunevethehedaunee, Nu vāenau waunauyauau hesānaavede Navaevaa, hanedaunauwunana, hathauhuk.

²¹ Hau nauhauvaa, hejadenaa henee haneavedaudaunade nananenauau nandedauguvānauau vethehedaunaa.

²² Nau hethauwuu Heau henane hadjathāde, neesedaunade: hau naunauthaunee henee henane haneavedaudaunadenenee.

²³ Nau hanaāenaunadedauwunadethee nehayau, hanaadee hadnesedaude nuu.

²⁴ Nau hena jea haeneenayaudenauau, hanaadee hadjavaāvasāthaa.

25 Nau hanaāēdauwunaude, Nenauchuwuthee Neauthuu haevahadahethedauwu; nau henee nanethenuu naudahede nanadee hesenaedehehauau neseadagaunee.

26 Hau jevanaathāhee: hau henee havasāthawaunādaunenau, hadenahavaewauva; nau henee naja waude henee henechauthāhehau.

27 Hanaa vanasāthaa, henee vanethede, wauāthe henee henechauthāhe? gaujenane henee vanethede? hau hanedaundaunathana waude henee henechauthāhe.

28 Nananena daudajauaunenethaunena denaunaunauchauthehanau.

29 Nau janenanauwunathana najanede, waude Nāsaunau nejeesejenanauwunānau;

30 Hadevethehena nau hadevaveyāna navethehedaunaa Nanajanedaunaa, nau hadetheaugudauwuna najatheaugudaunau hadnauchuwuhauna vadadauchunesenee jajaesenanedanede Israel.

31 Nau Vahadāde hanaāenehede, Simon, Simon, nauhauwune, Haujau nevadaunethenāne, hadvachuuguthāne waude thauauhanewauchuunau:

32 Hau nevetethasathane, henee hadethauwuthajaude hadejenadegaundenauau: nau hāejauaugauthethajaunaune hadedāewaunauau hahauwauauau.

33 Nau haenehetha, Vahadāhene, Nananenau hanesaanunau hadnennenethaunathane, nesauna duguhunauauwuu, nau gaujauaudahedaunaa.

34 Nau haeāedauwuna, hāedauwunathane, Peda, neauthuneāhe hadnehauwunedu nuu desenenee, hajesejenehenaune nasau hadnethedauwaune henee nananene daujae-naunene.

35 Nau hanaāēdāuwunaude, Deathavejenanathana hāehauwunewauunava nesevāejethāwau, nau newaugusajaānauchu, nau wauaunau, gauhājevathehāva hayewhu? Hegau, hathauhaugaunee.

36 Hanaāēdauwunaude, hau hewaunehaa henee nanethenauau nesevāejethāwau nanehaedanaunau, nau jea henevāejethāwau; nau henee janenethenauau gau-gauchu, nanehaeaudaunade heddu, nau jeaudaunaude gaugauchu.

37 Hanau nāedauwunathana, henee nuu wauthaunauhuu hethauwunaathauthaunauhunau, Nau haewauhaunau wauwauchudauhuhau: hanau nethauthedauthanau hethauvaa.

38 Nau hathauhaugaunee, Vahadāhene, nauhaudau, heyewnau hanesāe gaugauthau. Nau haeāedauwuna, Naadauchāe.

39 Nau haejenaua, nau haejathāau, nesedaude, haua nee Olives; nau hethauguhādaunau jea haethauguhaa.

40 Nau hāanauusade, haeāedauwuna hevetethahee henee hadejejedāna vasehadede.

41 Nau haejāvesa hehejese nejechauthaunenee, nau haechagujanaugu, nau haevetha,

42 Nāchau, hith Nananene vadausedaunenagu, jegudanauwune nuu vāenau hehethēe Nananenau: hau nāhauwuvathehaa, hau Nananene, hadnaasauau, hathauhuk.

43 Nau haenauhauva hautheaune hehethēe hejavaa, haedadāevaa.

44 Nau haeneenajeneethajau haeneenavevetha: nau heguwauaude waude davathe-jajaneauthēe vaewauau dejanesee vedauauwuu.

45 Nau hāegauhāde hehethēe devevethahede, nau haejeedasa hethauguhādaunau, Haeveena haeseenaugauhunenau hee haudauwuthajaude,

46 Nau haeāedauwuna, Naudu haenaugauhuna? gauhāe nau vevethahee, hadejejedāna vasehadede.

47 Nau hajesanadede, haenauhauwu havathenanedanede, nau henee Judas neseade, jasaa vadadauchunesenee, haenedauva, nau haeayāedasa Hejavaneauthusaun hadnedanaude.

48 Hau Hejavaneauthusaun hathāhuk, Judas, gauhāavedaundauna Heau henane gauhad-neenedanau?

49 Hāene henethauguvādaunau daunauhaudauwunethe hadneshade, Vahadāhene, gauhadjedauauwaunauau hee gaugauchu? hathauhaugaunee.

⁵⁰ Nau hanesāde haedauauva hewauwaunavene vasnajane vevethahevahew, nau haegauadathāhe hejavese.

⁵¹ Nau Hejavaneauthusau haeauchuhananadetha, Hauwaa nanessedau nuu. Nau haevasane henaudaununene, nau haenayauha.

⁵² Hejavaneauthusau hanaāenehethaude najavevethahevahehau, nau hauanauyauhauthāhehau vadannauauwuu, nau vachaugananenau, hejewaunedasādaunau, Gauhāejauva, waude hee havedehe, nauguu gaugauthau nau vachau?

⁵³ Denethenaedevathana hayauwusenee vadannauauwuu, nananena hāehauwudaneva: hau nuu nauauchaudauna, nau naunauthauau vaneeyauau.

⁵⁴ Hanaāedanauthee, nau haejathechauhanauau, nau haejedananauau Vasenajane vevethahevahew hedauauwunene. Nau Peda haejesedauchu.

⁵⁵ Nau hāesewaudeaunathee nahethāe hadauvasenejesauau, nau haeauājanaugunauau, Peda haejanaugudauna.

⁵⁶ Hau jasae hesāhedāeyaune haenauhauvaa daujanaugudaunaude hejava hesedaa, nau haenaunauchaudauhauvaa, nau hathāhuk, Naa henane jea nanethenaedewaude.

⁵⁷ Nau haeethedauwautha, Hesā, nahauwaenaunau, hathauhuk.

⁵⁸ Nau naunade jachau haenauhauvaa, nau hathāhuk, Nananene jea hanehedāhene. Nau Peda hahagu, Henane, nananenau hegau.

⁵⁹ Nau hee jasaye denauachauau waunee jachau haeethauwunehene, hathāhuk, hethauwuu naa jea nanethenaedewaude; hanau nananede Gananaean.

⁶⁰ Nau Peda hahagu, Henane, Nāhauwaene daun nesenehene. Nau chauchaunu, daunausunanadede, neauthuneāhe haenedu.

⁶¹ Nau Vahadāde haejaaagu, nau haenāauhauva Pedaheau. Nau Peda haethauchutha-jaude hedanadedauunene Vahadāhenith, neesenehethāde, Hajesejeneduhude neauthuneāhe, nananene hadnethedauwauchune nasauna.

⁶² Nau Peda haenaua, nau haeneenavewau.

⁶³ Nau henanenauau henee daununauthee Hejavaneauthusaun haevavavanchuhanauau, nau haedaudauauvaa.

⁶⁴ Nau hāesajeājethauthee, haenadeāhenauau, nau haenaunaudedauunanauau, Haeyāhe, hanaa henee haudauauvāde? nethāhuk,

⁶⁵ Nau wauthanee haeewauwauchuvaa nanāsanadethāde.

⁶⁶ Nau chauchaunu hasenaugusājenee, vachaugananenauau henanedanede nau nanauau vevethahehehauau nau wauthaunauhāhehauau haeauāchaudaunanauau, nau haejedananauau hadauhanadethee,

⁶⁷ Gauhanane Chris? jeāedauwunāa, hathauhaugaunee. Nau haeāedauwuna, Hith Nananenau hāedauwunathanagu, nananena hanājethauwaudaunena:

⁶⁸ Nau hith nananenau jea naudedauathanagu, nananena hanājauchuhananadesena, wauāthe hanājejenanena.

⁶⁹ Hewaunehaa hee Heau henane hadtheaugude hejavese naunaudāhenith Hejavaneauthu.

⁷⁰ Hanaāenehethee vahee, Gauhanane Heau Hejavaneauthau? Nau haeāedauwuna, Hasenehena Nananenau.

⁷¹ Nau hahagaunee, Hehauwauthevathehāanauau naudedauyaunauau? hanau nehayau nanedaunaunauau Nehayau hedenaa.

23

¹ Nau haunauude henanedanede haegauhādene, nau haeyehaudaunanauau Pinade.

² Nau hanaāevavasevāde, Vaneenaunauau naa gauchuhuchaudede jajaesenedanede, nau nedauduwaude hadjevenauthee hauāyaunau Caesar, daunahagu Chris Nenauchuwude, nethadede, hathauhaugaunee.

3 Nau Pinade haenaudedana, Gauhanane Dauhunauchuwuhunene Jews? hathauhuk, Nau haeauchuhanāedauwuna, Hethauvāne.

4 Hanaāedauwunaude Pinade najanau vevethahehehau nau henanedane, Nāhauwuveedenaune wausaunee naa Henane.

5 Nau haenaunauchauthedauhaudene, wauwauyauchudede henanedane, hanechauhauthethāde hehethee vahee Jewsevedauauwuu, jejasesee hehethee Gananane nauuu nuu vedauauwuu, hathauhaugaunee.

6 Hāene Pinade nedauwauthaude Ganane, haenaudedauva wauau hagananenane.

7 Nau chauchaunu hāesaenauau henee daunaadāde Herod hadaunajavanethe, haeathavenane Herod, jea haeanedau Dādaunedan hena hese.

8 Nau hāene Herod nauhauwaude Hejavaneauthusaun haevaseneethajau: hee devadaunauhauwaude dajauaunee hanau dauhuwauthanedauwauthaude; nau hae vadaunauhauwuu jasaa venauneguthau hadnesedaunith.

9 Haenaunaudedana hauwauhuu hanadedana; hau haejauchuhananadetha.

10 Nau najanau vevethahehehau nau wauthaunauhāhehau haetheaugunenau nau haenaunauchautheva.

11 Nau Herod nauguu vauānanenau haejenananauaugaugauyaune, nau haevava vanauchuhanauau, nau haeneenuhanauau neaudahenene hu, nau haevenanauau jea Pinade.

12 Nau hajesesenee Pinade nau Herod haenedaehāvadenauau nesauuu: hanau nedauwuu haeasānavadenauau nehayau.

13 Nau Pinade, hāesauānadethaude najanau vevethahehehau nau hauchuwunanenau nau henanedane,

14 Haeāedauwuna, Nananena nauchaudaunena naa Henane, nanahagu henee gauchuhuchaudede henanedane: nau, naune, nananenau, haunauchuwuhauau hathaāhena, nāhauwuveedenaune wausaunee naa henane hee henee hayauhuhau nanāsevasewauna:

15 Hegau, hehauwune Herod: hanau neathavejenanauwunathane; nau naune, hehauwunenauau hehauwugaudauwudau.

16 Hadnesesegauhaa, nau hadjenanauau.

17 (Hanau hadnaugauhusenaasedaude hadjenanaude hanesāhenethe vasevethededauneagu.)

18 Nau haunauude haevasānadenauau jasānee, Hausāgutha naa, nau jejenanauwunāaa Barabbas, hahagaune:

19 (Nanane hanau jasaa nejaevauāde hedan, nau hanau nenaade, nethānade dughunauauwuu.)

20 Pinade henahee, haevadaujenana Hejavaneauthusaun, haeanedetha jea.

21 Hau haeneānaune, Saethechuhuu, Saethechuhuu, hahagaunee.

22 Nau haeāedauwuna nanaseauwaunee, Dusee, dusewauchudau? Nāhauwuveedenaune hadneegaujauauthaude: Hadnaasedana hadnesesegauhaa, nau hadnaājejenanauau.

23 Nau haeneenavasānadenauau, haeneenavadausaethechuhunauau. Nau haeneānadenauau nau najanau vevethahehehauau haechauwauauwaunauau.

24 Nau Pinade haechuwardā henee hadnaasaunee hasevathehāthee.

25 Nau haejenanauwuna nanane henee hanau nejaevauāde nau nenaade haethānau dughunauauwuu; nanane heenedauwaudenenau; hau haevā Hejavaneauthusaun hathanauwauthee.

26 Nau hāejathechauhauthee, haedananaunau hanesāhenith Simoneau, hehethee Cyrenene, hananeedesade vedauauwuu, nau hanane haenehanauwunanaunau nau nau gauchu, henee hadnanewauunauwunith thaugu Hejavaneauthusaun.

²⁷ Nau hena haethauguhaa havathenedanede, nau hesānau, haeaudauwuthajauha nau haeviewauhunauau heee.

²⁸ Hau Hejavaneauthusau haejaaāne haeēdauwuna, Dādaunedan hedaunauhau, jevahevewauhuu heee Nananenau, hau heevewauhuu nehayau, nau heee hadāeyaunevenau.

²⁹ Hanau, naune, hese janādauuu, hadneenedaunee, Haunauwuthajauau jene-saunehehauau, nau henaudaunenau henee nejethauujanesāthee, nau hethanenau hehauwunethuaunenau.

³⁰ Heee hadnaāejaseseneduu hauane, Gauduaunānauau; naa jauaudane, gaudauyauhunauau.

³¹ Hanau hith heenesedauhaugaunee nuu hayauhuhau janadanegaugaheyaugaunehauhaudene, haudneedusedaune wautheyaugu?

³² Nau hena haenesenauau gauchuhunee jea, wauwauchudauhuhau, haenethaunaa hadnaugunaade.

³³ Nau hāene hāedaduu, Calvary hanaaseenee, hena haesaethechuhunauau, nau wauwauchudauhuhau, hanesāhenith hejavese, nau jachau nauwauthe.

³⁴ Haenaāenehede Hejavaneauthusau, Nāchau jaegudanauwunene; hanau daujāenuu hasedauthee. Nau haejaanauwaunenau, hedāchaunene, nau haeheedaudausadaunenau.

³⁵ Nau henanedanede haetheaugudaune dauhasauhauvade. Nau hauchuwunane-nau jea nauguu haeauchaudanavaa, haseneheyaugaune, Nenayauhaude hauthauau; Nanehanenanayauhadede hethauwuu Chrisdeyaugu, Neayāsanāde Hejavaneauthu.

³⁶ Nau vanenenau jea haenaunaugauthedaunaa, haeedasaa, nau haevenaa naneujaudenee dadajevenenaje,

³⁷ Nau hathāhuk, Hethauwunajawaunaudagaunee Jews, henayauhade nehayau.

³⁸ Nau haewauthaunau jea haewauthaunauhune hejavaa hedanadedanene Greek, nau Latin, nau Hebrew, Naa Nanajawaunaude Jews.

³⁹ Nau jachau wauwauchudahu chaunaunauaunith haewauwauchuvaa, Hethauwuu Chrisdenagu, henayauhade Nehayau nau nananee, hathāhuk.

⁴⁰ Hau jachau haeauchuhananadene haedauduva, Gauhajeadaunau Hejavaneauthu, hanau nananene nanesadee hathauchuwuhane? hathauhuk,

⁴¹ Nau neehanauau; hanau hanesedanauwunauau nanāsedanauau: hau Naa hehauwuwauchudau.

⁴² Nau hanaāenehethaude Hejaneauthusaun,* Vahadāhene, dauyewuwuthedaune hāanaususanaune Hanajanede.

⁴³ Nau Hejavaneauthusaun hathāhuk. Hethauwuu hāedauwunathane, Nuu desenee hadnethenaedevene Paradise.

⁴⁴ Nau hāethauthaunesade, nau hanaāeveeyauau nanadee vahee hathāauuvaa haunaude nanasuusee hāenauauchauau.

⁴⁵ Nau hesese haeveenenauau, nau hauguthau Vadannauauwuu haethauwunauau nahethāe.

⁴⁶ Nau Hejavaneauthusau hāevasānadede, Nāchau, hajadanaa hadaunaunehau Navadathuwu, hahagu: nau hāesenehede nuu, haevadauwauthauwu.

⁴⁷ Wauhā vanenenaja hāenauhaudauau hasedaudenenee, Haeauwauaudauna Hejavaneauthu, Hethauwuu naa chaunuvāde Henane, hahagu.

⁴⁸ Nau vahee henanedanede henee hathāejeauānuusathee hadnauhauwauthee, hae-nauhauwuu hanasedaudenenee, haeandesejāhedenauau, nau haejaajegauhudaune.

⁴⁹ Nau vahee henedaehauhau, nau hesānau hethāethauguhādaunau hehethee Gananee, haetheaugunenau vavāaune, haenauhauwuu nuu.

⁵⁰ Nau, naune, henane Joseph haeese, najananadehe; nau haeethā, nau haechuvā:

* **23:42** "Hejaneauthusaun" possibly should be "Hejavaneauthusaun". (See note for 18:19.)

⁵¹ (Naa haejechuwardā hasenehedaunene nau hasedaunethe;) haenaadāde Ari-mathaea, hedan Jews: nananede jea nehayau haejauwuwude henajanedauene Hejavaneauthu.

⁵² Naa haeyehau Pinade, nau haenedauwaude hedanayaunene Hejavaneauthusaun.

⁵³ Nau haejanana, nau haeauyauuna naunaujānaunee, nau haejenana nedau-thānavathe gaujauaudahehehau hauunaugāe, haunauau henane haejethauujenana.

⁵⁴ Nau hena hese haeesaanudaune, nau vadanese dayānauauchauau.

⁵⁵ Nau hesānau jea, hejenauunethaunādaunau hehethee Gananee, haethauguhaa, nau haenauhaudauwu hadausaesenanethe, nau hedanayaunene hathaudanee.

⁵⁶ Nau haejaenauthau, nau haeesaanudenauau hathāeneevaudene nau chauayaunau; nau haedauyānusenauau vadanesee hasauau nanavaavede.

24

¹ Wauhā nandedauwardaa hese hauchauvadede, hajesejevesesanith haejeedadauwu hadausaesenanith, haenauuchaudenauau hathāeneevaudene heesaanuthaunenau, nau jasae hauthauau nauuu.

² Nau haenauhauvanauau hauunaugane haeausānene hehethee hadausaese.

³ Nau haejedānauau, nau haejevedenauau hedanayaunene Vahadāhenith Hejavaneauthusaun.

⁴ Nau hethauwuu daugaudauwuthajauthee hee, naune, hanesenethe henanenau haetheaugudaunā haenauasāaunenau hedāchaunene:

⁵ Nau daunāthajauthee, nau haenaunauagunauau vedauuwuu, haeēdauwunā, Naudu nananena haenaudehauna hanenaededaunade nethee gaujauaudahehehau?

⁶ Hehauwanedau hede, hau jaegauhāde: dauyewuwuu neethāedauwunāna de-nausunatedaude Gananee,

⁷ Neesenehede, Heau henane hadvenavathe hejadenene wauwauchudaunanenau, nau hadsaethechauhude, nau nasee hadjaegauhāde.

⁸ Nau haedauyewuwunauau hedanadedauene,

⁹ Nau haenauwuu hehethee needausaesenanith, nau haeauthedaunanauau vahee nuu hayauhuhau jasānee, nau vahee hauthauau.

¹⁰ Haenane Mare Magdalene, nau Joanna, nau Mare henaune James, nau hauthauauau hesānauau henee henethaunādaunenau, neauthedaunauthee nuu hayauhuhau vadauhanau.

¹¹ Nau hedanadedauenenau hathanadauwuyaugaune gaugauyaune, nau haejethauwardaunaunauau.

¹² Hanaāegauhāde Peda, nau haeyeseneegau hadausaesenanith, nau haeewauguau, haenauhaude naunaujānaunee haeānaudanenau jessaa, nau haenaude, haegauguanade hasaunee.

¹³ Nau, naune, hanesenethe haeyehaunenau henee hajesenee hajasee hauauwu-dan Emmaus haseagu, hehethee Dādaunedan wauau nesaudauchu nau gauuu dau-gauha.

¹⁴ Nau haenanadenauau wauhaunee vahee nuu hayauhuhau hasaunee.

¹⁵ Nau hethauwuu, henee, dauanadethee wauhaunee nau haenaunaudedau-nauau, Hejavaneauthusau Nehayau haeauhauna, nau haenethauna.

¹⁶ Hau hesesānenau haedunenenu henee hadjaenaunauthee.

¹⁷ Nau haeēdauwuna, Hayewnau hadanadedauenenau nuu henee nananena hānegudaunenenu, daujajāwauaunadenu, nau daudaneāauna?

¹⁸ Nau jasaa hanaaseede Cleopas, haeauhananadethaa, Gauhanane vavade dauhadavesane nuu Dādaunedan, nau gauhajaene hayauhuhau hasedaunene hena nuu hese?

19 Nau haeāedauwuna, Hayewnau? Nau haeāedauwunaa, Heee Hejavaneauthusau Nazareth, nananede Haeyāhe naunaudāde hanasedaude nau hedanadede hathaāhenith Hejavaneauthu nau vahee henanedanede:

20 Nau najanauau vevethahevahehauau nau hadauchuwananevene neesevānethe gaujauadahede hadneachuwhude, nau nesaethechauhude.

21 Hau nejauwuwuau nau Nananede hadnenayaude Israel: nau nauguu vahee nuu, desenee nanasāe hesee hāesenesedaunee.

22 Haa, nau jasae hesānauau jea hadahenauau nenāvnauau, naugusāge neanedauthee hadausaesenith;

23 Nau dejevēedethee hedanayaunene, nejenuusathee, neauthedathee, henee jea haenauhauvanauau hautheaunau neethāhaugaunee henee daujaenaedeyaugaune.

24 Nau hauthauauau hānethaunādaunene deyeaunauau hadausaese, nau haeveede-nauau vavade hesānauau neesenehenethe: hau haejenauhauvanauau.

25 Hanaāedauwunaude, Hau hāhauwaenava nau gaunauanu hadahenau hethauwau-danee vahee henee haeyāhehauau nethauthedathee:

26 Naasauau Chris hadnasenede nuu, nau hadjedāde hadnedauvasāthaa.

27 Nau jeejasee Mosese nau vahee haeyāhehauau, neevavesāedauwunaude hee vahee hanathauthaunauhenee hayauhuhau hadnesenaedede Nehayau.

28 Nau haeeachauwu hajasee hauauwudan hasesathee: nau nehayau haenandauneha hadjavesade.

29 Hau haeneenadaunanauau, hathauhaugaunee, Hanedaunā: hayānaesade, nau hesee hayāenauwusanauau. Nau haejedā hadnandaunauau.

30 Nau hethauwu, daujanaugude haenethevetheheva, Haeedane jauaujau, nau haevaveene, nau haejeane, nau haevena.

31 Nau hesesānenau haegaunanenenau, nau hanaāenaunauthee; nau haeyauhaude-nauau.

32 Nau hadāhene gauhauchāe hethauvaa, hanathadagaunee jae, deanadethānauau jāthee, nau hāegaunanauwunānauau wauthaunauhanau?

33 Nau haegauhānauau chauchaunu nau haejaeyehaunauau Dādaunedan, nau haeveehanauau jasānee haeauauudaunāhenenau, nau hauthauau henee hanedaunādaunenau,

34 Vahadāde gauhāde hethauwu, nau haenauhautheha Simon, hathahaugaunee.*

35 Nau haeauthedanauau hayauhuhau hanasedaunith hadesathee, nau hasae-naunāde daujeanaunauau jauaujau.

36 Nau daunausunanadethee, Hejavaneauthusau Nehayau haetheaugu nahethāe hadauthee, nau hathāhaugaunee, Danādauyauau vanenathana.

37 Hau haenānauaunauau nau haenāthajaunauau, nau hasethajauhaugaunee henee haenauhauvanauau vadathu.

38 Nau hathauhuk, Naudu nananena haenāthajauna, nau nauduhagaugauuthajauna gauhānauha hadahenau?

39 Nauhauwuu Najadenau nau Nauaudau, henee Nananenau nehayau: Vasanee, nau nauhauwu; hanau vadathau hehauwudaunānune nau hehauwudechaunave, hathauhauwuna.

40 Nau dauhanadede, haenauhautheha hejadenau nau heaudau.

41 Nau haejethauwuthajaunauau hee haunauwuthajaude, nau haegaugauuthajau-nauau, Haeāedauwuna, Gauhajeveheneva hede?

42 Nau haevenanauau hanesāhenith nauwu haeaujaunene, nau gauhauaugunau-gaue.

43 Nau haedane, nau haevethe hathaājenethe.

* **24:34** The last word of the verse is unclear and could be “hathahaugaunee” or “hathahaugauee”. The former was chosen as being closer to what is used in other instances of direct speech.

⁴⁴ Nau haeāedauwuna, Nuu nanāe hanadedauwuna hāauthedaunathadenenau, denausunethenaedevathana, henee vahee hayauhuhau hadnethauwunauaichuu, hanauthaunauhuu henanavaavede Mosese, nau haeyāhehauau, nau psalms hee Nananenau.

⁴⁵ Hanaāegaunanauwunaude hadnaenauwunethe, henee hadnaenauwunethe wauthaunauhanau,

⁴⁶ Nau haeāedauwuna, Hathauthaunauhuu, nau naasauau Chris hadnasenede, nau hadjaegauhāde hehethee gaujauaudahede nasese:

⁴⁷ Nau henee haugauthegaugauuthajaude nau hadjaegudanee wauchudaudenau hadnautheduhunee hee Heneseede nanadee jajaesenanedane, hehethee Dādaunedan.

⁴⁸ Nau nananena haenauwuna nuu hayauhuhau.

⁴⁹ Nau, naune, Nananenau vanenathana sayānee Nāsaunau hau theauguu hedan Dādaunedan, haunaude nananena hāchawunagu nauguu naudahede hehethee hejavaa.

⁵⁰ Nau haejasesenedauwauna hajechedanee Bethany, nau haegauha, nau haevethasa.

⁵¹ Nau hethauwuu, daunauvevethauchaude, Haenautha, nau haeejehauhau jethee hejavaa.

⁵² Nau haevethedaunanauau, nau haejaeyehaunauau Dādaunedan nauguu vase-neethajaude:

⁵³ Nau dajauaunee haenedaunauau jedauwuu Vadannauauwuu, hauwaunede nau haevethedaunanauau Hejavaneauthu. Hethauvaa.